

萬 有 文 庫

第二集七百種

王 雲 五 主 編

宋 詩 紀 事

(一十)

厲 鶚 馬 日 瑄 輯

商 務 印 書 館 發 行

宋 詩 紀 事

(一十)

馬 日 增 輯
厲 鶚

國 學 基 本 叢 書

萬有文庫

第二集七百種

總編纂者

王雲五

商務印書館發行

宋詩紀事卷六十九

歐良

良南城人官司戶劉後村序其詩

句

壁固君所奇鏡亦妾所惜乍可返君璧妾鏡不可得雜興紅黃冬樹葉紫翠夕陽山後村題跋

黃昇

昇字叔暘號玉林

胡季直云玉林蚤棄科舉雅意讀書閒從吟咏自適游受齋嘗稱其詩為晴空冰柱樓秋房聞其與魏菊莊友善併以泉石清士目之

游金精山在贛州寧都縣道書三十五福地漢女仙張麗英生有異質長沙王吳芮強委禽焉麗英乘雲空中語人曰吾金仙

之精降治此山言訖冲天而去

曳履江城北逍遙訪仙鄉埽卻千里恨愛此六月涼雲根埋宿雨木末酣斜陽峭崖列岳竇老樹攀穹蒼地坼三關暗天開一隙光青霄麗太白應此金之芒雙桃幾日熟冷笑癡吳王洞開人已去剛風舞霓裳

錢唐厲鶚輯
海寧陳晉錫
錢唐汪沆
勘定

仙凡本相近。此理自可量。學詩未學仙。凡骨生慚惶。金精風月

吳汝式

汝式字伯成。盱江人。有雲臥詩集。

游石仙分韻得觀字

閑攏兩袖秋。步入冲寂觀。古樹老雲中。仙居毀巖半。是時零雨高。葉脫西風亂。怪禽走何忙。澀水流不漫。那知張郎仙。譎幻敢懸斷。雷書貯紅崖。愚下浪傳贊。符碑儻長靈。鬼物豈歌喚。尙云劔埋山。安得急推斷。冷翁亦張徒。精氣不如散。死坐豫樟空。鑿竅競窺看。何不葬山原。不然棄江汧。烏鳶與螻蟻。豈食吾一貫。獨流天地閒。萬古亘光燦。神仙固渺茫。此事良可惋。忍哉偷兒狂。更擣泥腹爛。我來擬少休。亭壓不敢玩。黃冠三四人。拙野只欲竄。延坐無好言。令我住涼館。飯餘且從觀。逸興薄霄漢。琴鳴著高彈。弈勝出奇算。嘯咏壺隱樓。撫事發長歎。大書同人名。聊欲記遊翫。陰霾淪輕寒。日色倏昏晏。倩人買村醪。煮芋疊肴案。清坐二更深。一睡各鼻鼾。曉來登巖頭。棘路解羈絆。劃開天蓋寬。遠景過飛翰。幽叢摘新查。窺險身發汗。居然束歸裝。重下西巖畔。我思古之人。豈只局窮閭。觀海登泰山。深高世閒冠。斯巖雖荒榛。樂事實昭燦。人心本然同。今古未容判。終當駕風雲。高蹈無畔岸。作詩示兒童。茲游吾豈憚。雲臥詩集

李顥卿

溪行

枯木扶疎夾道傍。野梅倒影浸寒塘。朝陽不到溪灣處。雷得橫橋一板霜。後村千家詩

陳天錫

絕句

舍南舍北雪猶存。山外斜陽不到門。一夜冷香清入夢。野梅千樹月明村。東皇雜錄

劉祖尹

祖尹字怡堂義烏人。

題石壁精舍

結廬投老瞰羣峯。隱隱松杉曲徑通。剩種池邊千蘂竹。近營林下一巢風。敲眠盡絕春來夢。趺坐閑看月墜空。檢點吾生婚嫁了。子孫無事惱衰翁。義烏縣志

劉仕龍

仕龍字時甫。祖尹子。知廉州。

知廉州條上邊事落職。主管台州崇道觀賦感。

人生百年中。窮通無定跡。譬如風前花。榮謝亦頃刻。當時牧牛豎。尊貴誰與敵。顛顛種瓜翁。乃是封侯客。丈夫苟得時。糞土成拱壁。一朝恩寵衰。黃金失顏色。古今諒皆然。我獨何歎息。義烏縣志

曹旣明

過林和靖舊址

短棹不歸雙鶴去。一丘烟草寄山陰。水邊疎影黃昏月。無限風騷在客心。

有懷湖山。雷題惠因院。

湖山平生鄰。松竹亦瓜葛。深期說情話。跬步成契闊。豈無朝夕思。或以塵累奪。何當淡相從。長年席不割。
冷泉亭

朱簷日轉軒窗上。碧嶂雲低草樹香。山影倒沈波底月。夜闌相對瀉寒光。

與同舍待浴靈芝寺中

一雨洗秋色。湖山增眼明。翻翻水中荷。作此淒涼聲。我輩本憔悴。客飯千里程。願言滌塵土。冠蓋臨華京。
夜宿浙江亭

夜半潮聲撼客牀。臥聽柔櫓鬧空江。驚迴倦枕鄉關夢。海日烘山上曉窗。以上咸淳臨安志

吳玠

龍興寺 在昌化縣千頃山

松檜陰中六月清。異花靈草不知名。客從瓊液山頭過。人在水晶宮上行。千尺翠嵐分月色。一軒寒籟動秋聲。登臨不厭躋攀峻。貪看雲從鳥下生。

梵安院 在昌化縣石筍山

山腰小徑細如繩。山鳥關關喜弄晴。黃菊有情留客醉。白雲無事伴人行。野流合處堪分字。草藥枯來欲問名。回首渡頭詩思逸。漁舟一笛晚風清。以上咸淳臨安志

黃文雷

文雷字希聲。盱江人有看雲小集。

晚立

獨游得荒蹊。晚意與心會。水聲遠纔聞。山色靜可對。鳥語林塘邊。犬吠籬落外。柴門未須關。月在東峯背。

西域圖

大哉天地閒。品類不可齊。誰爲好事人。貌此縣度西。松花瑣碎沙草肥。是閒可牧羊千蹄。可憐羣鹿正走險。或爾剝割衣其皮。啜唾樹樺尙有理。穴頰插齒吁何爲。吾聞中原全盛時。重譯四走朝京師。懷方象胥飭乃事。幻人詭伎何能奇。還君此畫雙涕淚。願賦周官王會詩。

二橋圖

翔龍下卷江東土。孫郎初得橋家女。橋家本是重曹瞞。隻雞斗酒空酸楚。衿情正用畱阿瑜。尙得人前稱肺腑。百年王氣竟銷沈。妙寫丹青嬌欲語。香閨搦管記何書。並蒂芙蓉按花譜。那知不是未嫁時。本末無從勘形史。詞人多事管閑愁。銅雀紛紛底歌舞。儘強被髮向黃壚。只與東阿傳洛浦。

昭君行并序

白石季倫始賦昭君曲。以後作者寢多。不容措手。每恨沿襲之誤。作漢初和親意著詠。非也。又按竟寧元年。呼韓邪旣壻漢氏。其年五月宮車晏駕矣。因併著之。不惟祛詞人之失。亦以解昭君於地下云。君不見未央前殿羅九賓。漢皇南面呼韓臣。無人作歌繼大雅。至今遺恨悲昭君。內殿春閑馮傅掖。庭新花隔烟霧嬈。姚枉奪燕支山。玉顏竟上氈車去。人生流落那得知。不應畫史嫌蛾眉。癡心只恐琵琶語。

歸夢空隨鴻雁飛。穹廬隨分薄梳洗。世閒禍福還相倚。上流厭人能幾時。後來燕啄皇孫死。野狐落中高臺傾。宮人斜邊曲時平。千秋萬歲總如此。誰似青冢年年青。

往年因讀岳王傳。嘗爲之賦。今過東林。睹其遺像。感而申頌之。

欲壞長城豈自由。江人重唱白符鳩。熏天富貴還須盡。從古忠良類若讎。獄吏但能書牘背。相公終欲割鴻溝。書生志念閑無用。長想朱雲地下遊。

冬郊

冬郊見初晴。空林夕陽暝。歸牛無人驅。欲涉行轉緩。新橐明屋山。失喜雀爭喚。絕勝門外人。流冗及歲亂。以上看雲小集

胡仲參

仲參字希道。清源人。有竹莊小橐。

晚雨

勃姑鷓舅叫樓西。春色陰晴景不齊。濃墨四垂收不起。明邊一片夕陽低。

雪晴泛湖

雪後湖清淺。令人心眼開。林疎知寺近。冰合礙舟回。寒色欺吟鬢。斜陽入酒杯。山行已清絕。況復是尋梅。

過永春縣

距城纔百里。世路便難平。碣石唐人墓。桃源晉地名。危巖依嶽勢。荒市帶溪聲。往日羅兵火。頽垣蔓草生。

寒夜作

生計尚茫茫。微吟思故鄉。羈愁消不盡。寒夜未爲長。門掩梅花月。禽翻竹葉霜。挑燈裁錦字。明發有歸航。

和伯氏春雨中韻

兩隄楊柳拂新亭。怪底遊人懶踏青。手撚梨花成小立。半窗湖水雨冥冥。以上竹莊小集

陳伯山

伯山號東湖寓客。

同廖繼道游洞霄

勝日事幽尋。乘興從所適。西風飄杖屨。偶作洞霄客。穿雲渡澗岡。捫蘿轉空碧。七人今何在。九鎖峯巒密。黃冠喜我輩。傾懷論宿昔。汲泉煮山苗。異氣穿几席。區區名利人。到此塵機息。洞霄詩集

程以南

以南理宗朝官祕閣校理。

茗溪晚泊

一笑茗溪上。微茫駐日曛。鷺沙行个字。魚浪出圓紋。晚色三家市。秋容幾樹雲。行藏知有分。莫誦北山文。

湖州府志

杜東

東字晦之。號月渚。

綠珠

以色危身豈不知。甘心死別不生離。樓前甲士紛如雪。正是花飛玉碎時。

平山堂

平山堂下水雲重。孤笛淒涼淡月中。不見龍蛇飛素壁。只餘狐兔戍離宮。仙翁已去風流盡。世事俱隨夢
幻空。廣武無人同此意。慨然止有淚臨風。以上詩家鼎鑿

何宋英

題六和塔下秀江亭

吳國山迎越國山。江流吳越兩山閒。兩山相對各無語。江自奔波山自閑。風帆烟棹知多少。東去西來何
日了。江湖淘盡古今人。只有青山長不老。咸淳臨安志

薛師魯

師魯鄆人官郡判

苦雪

六出夫何甚。經旬散野堂。喜心翻作厭。瑞物恐爲殃。歲晚思薪火。天寒望太陽。荒村風雪裏。賴有隔年糧。
甬上耆舊集

陳俞

雨後過馬瑙寺

借屋傍精廬。無事數來往。披草通泉流。刻樹記筍長。微風四山落。小立領松響。詎名息諸緣。暫盍脫塵網。
咸淳臨安志

潘中父

題釣臺

焚阮禍作逃園綺。明哲保身寧餓死。溺冠漫罵又一秦。織畚鼓刀恬不恥。子房託疾封畱歸。齊魯大臣那可比。此意寥寥二百載。阿諛往往居帝師。中興天幸有光武。下士謙恭冠千古。布衣本以道義交。不問故人登九五。場來過我路幾程。征衫猶作戰血腥。睡餘伸脚稍加腹。安得細事關天星。歸歟宜審苞桑戒。勿念潔身增感慨。君持□□理乾坤。我把絲綸老滯瀨。
釣臺集

李時

途中遇雪

天寒鴉欲棲。客路尚遲遲。泥滑寒驢澀。風斜破帽敲。雲藏山斷絕。梅苦雪禁持。客裏愁無著。愁邊卻有詩。
後村千家詩

吳季先

季先臨川人

遊梅壇有感

小立仙壇挹斗箕。著身高處覺天低。南昌吏隱清風在。喚醒時人一枕迷。
梅仙事實

陳亦梅

梅花

江郊車馬滿斜輝。爭赴城南未掩扉。要識梅花無盡藏。人人襟袖帶香歸。全芳備祖

聞人祥正

宮詞集句

春風院院落花堆。花氣濃熏入酒杯。日午殿頭宣索鱠。小舟撐出柳陰來。王建 鄭獬 花藥夫人 徐師川

珠簾約住牡丹風。金殿香銷翠綺櫳。應作巫陽春夢句。日高猶睡綠窗中。宋景文 李商隱 晏叔原 白居易

珠箔輕明拂玉墀。漢宮仙掌露淋漓。金釵墜鬢分行立。等候官家未出時。李商隱 文潞公 歐陽公 花藥夫人

學畫蛾眉獨出羣。越羅巴錦不勝春。承恩數上南薰殿。無奈宮中妒殺人。潘閔 張曙 杜甫 李白 後村千家

詩

黃祖潤

祖潤官戶曹。有和劉潛夫百梅絕句。

梅花

天籟消沈斗柄斜。繞枝忽起護巢鴉。素娥青女新梳洗。來鬪寒梅半夜花。

林閒翠羽啄枯槎。邂逅孤筇次水涯。飛過小溪畱數語。殷勤報有隔橋花。後村題跋

黃 詩

鑄字亦顏號乙山。日鑿按絕妙好詞作晞顏

贊見洪帥

風烟入暝少人行。獨鶴來依帝子城。華表柱頭霜月冷。□□清夢到鐘聲。詩家鼎鑿

趙愚齋

客中清明

紅塵烏帽寄他鄉。欲語春愁怕斷腸。惆悵清明歸未得。借人門戶插垂楊。梅磻詩話

陳琰

琰字粲山

題二陸祠

塵暗香殘二俊祠。可憐詞藻妙當時。聯鑰入洛成何事。一段淒涼鶴不知。梅磻詩話

郭君舉

天聰洞

混沌何年鑿。天聰亦強名。我疑龍窟宅。人說鬼經營。梯向巖邊接。雲從洞裏生。此行頑健甚。腳力十分輕。

雁山志

龔桂馨

題桃花源

碧樹花開醉晚春。靈槎幾度汎天津。可憐太守仙緣薄。不是衣冠不屬秦。桃花源集

金子潛

子潛、休寧人。潭州司戶。

雲巖

丹崖何突兀。與客共躋攀。一嘯九天闊。斷雲千古閑。杖行龍虎背。袖拂斗牛閒。願言覓刀圭。乘風弄羽翰。
齊雲山志

王月浦

荷花

雨餘無事倚闌干。媚水荷花粉未乾。十萬瓊珠天不惜。綠盤擎出與人看。

瓊花

蕃釐觀裏瓊花樹。天地中間第一花。此種從何探源委。東風無處著繁華。千鬚簇蜨團清馥。九萼聯珠異衆葩。幾見朱衣和露翦。金瓶先進帝王家。以上全芳備祖

程元岳

元岳、字申甫。歙人。理宗朝。官工部侍郎。

雲巖

直上雲巖絕頂峯。始知塵世有仙蹤。懸崖蘚潤經年雨。滿地花飄昨夜風。日月往來蒼翠杪。烟霞舒卷畫

圖中瑤臺禮罷笙簫歇。萬壑松聲自羽宮。齊雲山志

薛師石

師石字景石永嘉人有瓜廬詩。

東閣趙汝回序云瓜廬翁每與四靈聚吟獨主
古淡融狹爲廣夷澁無素神悟意到自然清空

荆山劉植跋云瓜廬耕釣于會昌湖上多肥遯
之辭舒性情之正得象外之趣酌繩尺之嚴

瓜廬

近來有新趣。買得薛能園。疎壤延瓜蔓。深鋤去草根。花前長載酒。月下只開門。最識田家樂。辛勤更不言。

漁父詞

鄰家船上小姑兒。相問如何是別離。雙墜髻。一彎眉。愛看紅鱗比目魚。春融水暖百花開。獨棹扁舟過釣臺。鷗與鷺。莫相猜。不是逃名不肯來。

題南塘薛圃

門對南塘水亂流。竹根橘柢自成洲。中間老子隱名姓。只聽漁歌今白頭。

送葉宰赴豐城

君往爲官處。江西寇已平。獄閑空劒氣。堂靜響琴聲。有法催常稅。無私得衆情。時方急賢路。名定達公卿。

大龍湫

昔聞天下士，衡嶽稱崇正。又聞天下水，江漢爲巨流。古有山海經，歷歷敍九州。李唐三百載，詩書無一留。及觀鄜道元，此地亦不收。不知諾矩那，何事能窮搜。我來元妙境，萬丈懸清湫。石壁去無極，百里彌道周。雲氣冒羣岫，龍宮深以幽。輕輿巖壑底，竟日涉溪游。陰晴異瞻矚，遠近難搜摎。飄如飛素練，粲若散琳瑯。風掀一潭雨，佛坐四時秋。喧呼勢益驟，洶湧聲彌遒。變化有如此，溥博誰與儔。吾謂神龍力，豈繫人鬼謀。稽首荷元遇，久坐勞雙眸。一杯卻嵐暑，旋步轟雷稠。以無澹世慮，欵起杞人憂。何當騎天狼，滿引射斗牛。

以上瓜廬詩

句

半洞容千佛，諸峯共一雲。游雁山 泉涌龍頻躍 山靈鳥不來
石橋 瓜廬詩王汝跋

李炎子

炎子號竹溪

定玉臺

長安釐土築高臺，帝子規模亦壯哉。世事幾經羊胛熟，邊愁多趁鴈聲來。城頭煙樹旌旗合，柳外雲山水黑開。萬里乾坤歸老眼，不堪西望正風埃。詩林萬選

徐寶之

寶之理宗時貢士

句

炊熟風瓢動。吟歸雪硯枯。盡日飛花急。隔溪芳草深。後村題跋

黃大受

大受字德容。南豐人。有露香拾藁。

鄭安晚跋云。黃君詩如行澗谷。秋空月曉。松竹簾策。

有聲。再世屈于右階。會有知者。其勿督過一丁字。

油口夜飲。醉臥一室。及覺三鼓矣。秋夜新冷。雨溼蟲鳴。展轉不能成寐。於是浩然有歸志。

一榻翛然著醉儂。沈沈清夜大槐宮。夢回作惡酒氣重。枕上不眠歸興濃。點滴落塔添悶雨。清哀遠壁訴寒蟲。計行良未成端緒。何處高樓撞曉鐘。

寧化白水礫

雪瀑從天下。餘流亦建瓴。雙崖逼秋氣。九地殷雷聲。虎穴山川險。蛟涎草木腥。負巖由此徑。異日不堪行。

枝江九日簡周宰

日車不照出郊車。門外天陰雲尙麤。青州未有居士供。白衣知是誰家奴。江山有恨橫飢眼。萸菊無情對臥壺。贏得閒關吟苦句。定無人敢喚催租。以上露香拾藁

葛起耕

起耕字君願。丹陽人。有檜庭吟藁。

記夢

綺寮縹緲敞虛明。鵲峙鸞停護碧城。珠蕊一枝春共瘦。玉環雙佩月同清。曾題洛賦緘新意。卻拊湘弦寄遠情。十二闌干風細細。覺來依約記棊聲。

次子泉韻

月轉庭花玉一闌。寶釵不卸侍郎看。丁香擬結相思夢。無奈東風作社寒。

樓上

樓上何人吹玉簫。數聲和月伴春宵。斷腸喚起江南夢。愁絕寒梅酒半銷。

宮詞

銀漏疎風透玉屏。碧梧枝上雨三更。依稀似寫華清恨。雲冷香消夢不成。以上檜庭吟藁

陳子予

秋思

柳岸風條頓老。橘林露葉猶香。門對一天秋色。人行十里斜陽。詩家鼎鑿

薛泳

泳字叔似。一字沂叔。天台人。

游洞霄宮

羣山皆玉立。中有一峯危。天近秋容薄。松深夜月遲。洞因尋藥入。席爲聽泉移。此趣無人會。臨風酒一卮。

句

柳斷橋方出，烟深寺欲浮。新堤小泛，歸心如病葉。一片落江城。
早秋歸興 深雪偶談

馬宋英

宋英，温州人，以畫名。

游淨慈寺，寫古松于壁，因題。

磨出一錠兩錠墨，掃出千年萬年樹。月明烏鵲誤飛來，踏枝不著空歸去。

圖繪寶鑑：丁大全丞相賞其詩畫，急命索之，人忌其能，閣不令出，卒不遇。

楊潛

題釣臺

遐想當年隱富春，生涯只寄一絲綸。幸逢白水為真主，肯向青山訪故人。試問勒功依日月，何如占象動星辰。回頭四七皆陳迹，獨有先生迹未陳。釣臺集

黃宜山

題竹閣

移自孤山占北山，荒涼老屋萬琅玕。櫻桃楊柳空花夢，千古清風滿閣寒。

題和靖墓

墳邊疎影尚橫斜。鶴老苔荒處士家。獨立東風難著語。只攜樽酒醉梅花。以上咸淳臨安志

李仁本

仁本號裕齋

桂殿秋辭

飛翠蓋。走籃輿。亂山千疊爲先驅。洞天迎目深且窈。滿耳天風吹步虛。洞霄詩集

陳元鑑

元鑑號東澗

金陵懷古

英雄戰守幾春秋。虎踞龍盤古石頭。北固只憑江水在。中原長對夕陽愁。曹劉漫有經營志。王謝空遺富貴羞。舉目便懷千古恨。鳳凰臺上不須游。詩家鼎鑪

沈說

說字惟肖。龍泉人。有庸齋小集。

紙衾

繭面新乾帶露揉。春回斗帳伴吟愁。殘年已辨蒙頭過。風雪從教打戍樓。

溪樓

心遠俗塵隔。樓高野興多。稻花黃雀雨。山影白鷗波。灘澗推船上。橋危挽客過。日斜闌倚徧。無句奈愁何。

馮公嶺

曉上馮公嶺。艱難見客情。雨和殘葉落。身逐亂雲行。野店山腰出。秋泉石罅生。若將世途比。此路更爲平。

晚春

白頭何計是生涯。日日尊前臥落花。綠滿池塘無一夢。夜來風雨過誰家。

以上庸齋小集

魯應龍

應龍字子謙。嘉禾人。有閑窗括異志。

題飛星石

錦石雙飛下翠微。忽看移入小巖扉。靈光夜靜歸山徑。翠影秋寒上佛衣。溟海始知鯨欲動。零陵不獨燕能飛。只今五色曾何補。自採奇峯築釣磯。

閑窗括異志。陳山觀音殿。曩年忽有兩石。從半山鬪墜而下。一從殿後壁滾入大土座下。一墜殿之西。屋瓦無損。不知從何而入。今二石尙存。留題者甚多。余乙卯歲到祠下。嘗賦詩于壁。以記其事云。

李堅

題宜興沖寂觀

玉兔朝天去不回。空餘露井薦晨杯。屋鈴不語明如掌。無復凌波逸士來。

咸淳毘陵志。沖寂觀在縣西北六十里。唐周長官所居。井有白兔升天。捨爲觀。南唐隱者許堅至此。浴瀉湖履波而逝。李堅詩云。

邵梅溪

梅溪錢唐人。

曹娥江

客舟艤盡江頭月。忍聽寒潮聲哽噎。那知江上無情波。總是曹娥眼中血。娥江題詠

宋詩紀事卷七十

謝 耘

耘字耕道天台人

送石深之歸沃洲

東邨志略
懶踏紅塵地。結廬巖壑閒。酒催清夜別。身伴白雲還。賀老湖邊月。支公屋外山。沃洲吟不盡。天與老翁閑。

句

路深容馬窄。樓小插花多。

貴耳集謝耕道自號謝一犁。有犁春圖。諸公喜于納交。善滑稽。三十年閒天下詩人未有不至其室。詩軸不知幾牛腰。巾高二尺餘。方口大面。行于市。孰不曰謝一犁。因是名滿京洛。壁閒寫詩中有一聯云。事繼母極孝。母九十七。八該慶典。初封人榮之。

吳 浚

浚字允文。盱江人。有集。

宋詩紀事 卷七十

錢唐 厲鶚 輯
錢唐 汪震奎 勘定

重過瑞金江

水瘦灘聲健。天寒霜意新。犬牙舟過石。魚貫路行人。到眼心應識。回頭跡易陳。時平刀劍息。失喜問遺民。

客中

斷雁嘯雲天。雨霜客中何事不淒涼。玉梅約住東風信。更讓黃花半月香。

春日

畫堂簾箔碧籠蔥。午夢模糊燕語中。微雨嫩晴天似醉。鬧紅吹上海棠風。以上吳允文集

張 濡

濡號松窗。

遊大滌山

危樓拱翠出層空。畫棟朱闌縹緲中。客散月明風露下。一箇天棘伴絲桐。洞霄詩集

韓 準

準號鶴山。

九月梨花

粉膩迷春月滿枝。誤隨秋日弄芳菲。料應潛作春宵夢。剛被西風不放歸。詩林萬選

陳叔堅

叔堅字堅甫。號遜齋。

送素上人遊方

不是無衣鉢。師心酷愛山。自言行腳好。卻厭住菴閑。野木寒林外。孤雲夕照閒。清遊何處寺。須寄好碑還。
詩家鼎鑪

葉善夫

芹溪小隱 在建陽

芹溪處士古人風。寶劍塵埋未化龍。舊隱至今名不朽。扁題原出紫陽翁。
建寧府志

仇從簡

從簡號芋田

句

雪翻夜鉢裁成玉。春化寒酥剪作金。
詠酥黃芋 山家清供

周彥夫

天津橋二首

下車聊復問何如。尚憶重來四紀餘。鐘阜秦淮俱好在。祗憐雙鬢自蕭疎。

聯鑣去作蔣山遊。路轉天津遶御溝。忽作故都禾黍恨。洛陽宮殿鎖千秋。
景定建康志

黃文度

文度號小園

白藕

白藕花前一信風，颯然吹雨到梧桐。可憐一段淒涼意，併入西窗客夢中。詩林萬選

劉清軒

句

可笑吳癡忘越憾，卻誇范蠡作三高。

陳郁話腴嘗見有人彈范蠡文云。吳江三高，即越之范蠡、管季鷹、唐陸魯望也。范蠡越則謀臣，吳為敵國，假扁舟五湖之名，居笠澤三高之首，況當無邊勝地之上，著此不共戴天之讐，其視范蠡、管季鷹、唐陸魯望，假扁舟五湖之名，豈容與之並駕

臨風，聯鑣釣雪耶。劉清軒云：見譏固已深矣。

薛琦

琦、鄴人。

題荆浩畫青山白雲卷

渺渺山上山，隱隱樹邊樹。雞犬不聞聲，居人在何處。甬上書齋集

李

檝、號碧山。

有約

楊柳垂隄水邊門。可人清景近黃昏。明朝有約誰先到。手搯花梢記月痕。詩林萬選

王輝

古汴人。

楊柳枝

密密陰陰漢將營。春風吹斷鼓鼙聲。少年不說封侯事。柘彈銅丸落曉鶯。詩家鼎鑪

史繩祖

繩祖字慶長。曾遊魏鶴山之門。著學齋佔畢。

紅莧

易稱紅莧美柔英。夬決窮陰日旅辰。不以色紅爲貴尚。何因赤莧有仙人。圖經。明州赤莧山。土傳赤莧仙人所種。學齋佔畢。

周伯仁

伯仁字及之。南昌人。

句

照天不夜梨花月。落地無聲柳絮風。春雪 桃源手聽

易寓言

杜鵑花

輕翦梢頭薄薄羅。子規滴血恨難磨。園林莫道香飛盡。嫩綠枝頭不用多。全芳備祖

會蘭墅

西湖夜景

閨窗放入四山青。古篆無烟氣自清。風不鳴條花著露。一湖春月萬蛙聲。咸淳臨安志

李 軾

畫楊妃扇

頗憶前身是謫仙。硯煩親捧玉堂前。如今再閱嬋娟面。不覺人閒五百年。翰墨大全

王公焯

梅花

枯霜翦盡千林葉。纔放江頭第一春。瘦影看來天愛畫。孤根生處地無塵。夜郎歲晚逢羈客。谷口寒雲見
似人。絕是精神吟不盡。好枝和月插紗巾。後村千家詩

葉豈潛

豈潛字潛仲。金華人。佐廣西漕幕。

蟬

柳邊曉立看蟲蛻。化作風餐露宿身。林靜晝長吟不絕。騷騷清苦似詩人。

鱖魚

漁翁今度答簪富。政是桃花水膩時。網得文鱗如墨錦。貫來楊柳是金絲。以上後村千家詩

黃登

登字瀛父。號南溪。有適意集。

山中曉行

上到山巔曉色分。眼看殘月待朝昕。望迷四顧渾如海。立欲移時祇是雲。隱隱樓臺平地見。行行鐘磬半天聞。舉頭頓覺青霄近。我欲乘風謁帝君。後村千家詩

黃師參

師參字子魯。號魯菴。

過廬陵

昔年棲迹處。今訪不知門。華屋半塵土。故人餘子孫。少留誰共語。欲去轉銷魂。落日江樓遠。江山空復存。

李鹹谷歌

李鹹谷真詩人。無枝可棲雲水身。去年縣官爲架屋。纔有數枝堪寄宿。朝廚無烟吟正高。癡兒叫怒吟轉豪。人間六月盡絳服。獨著春衫涼自足。黃雞白酒東家留。西家欲留還住休。鑿池養魚未盈掌。有客過門須舉網。網收魚盡鏡匳空。菜羹作供尤春風。谷之山。竊復深。誰其友之紫芝民。谷之水。清且泚。誰其似之巢父耳。再拜號君鹹谷子。白頭結交從此始。以上詩家鼎鑪

潘亥

亥字幼明號秋巖種子

寄趙紫芝

長安獨跨驢。一別二年餘。朝士不能薦。承明空有廬。窗虛桐影薄。權冷桂花初。莫怪無書札。心親迹任疎。

前賢小集拾遺

社日

聽得東風急。吹乾小徑泥。雨多花放早。水滿燕飛低。貧女不知緯。幽人只此棲。依依懷去歲。摘茗白壇西。

東甌詩集

葉茵

茵字景文。笠澤人。有順適堂吟藁。

偶成

春來時復陰。因物悟浮生。杜宇鄉心重。楊花世事輕。知非蘧伯玉。覺是晉淵明。此意誰人會。騎牛訪耦耕。

蘇隄

南北山圍翡翠隄。隄邊綠漲軟琉璃。參差臺榭無餘地。雜遝輪蹄了四時。楊柳又多前日樹。梅花祇少近人詩。停篙不看春風面。閑伴漁翁理釣絲。

山行

青山不識我姓字。我亦不識青山名。飛來白鳥似相識。對我對山三兩聲。

室人墓下

楚愴埋香地，卿須念橐砧。齊眉中道訣，同穴百年心。刀尺凝餘澤，松梧帶老陰。可能如鮒婦，相對白頭吟。

有所思

仰天有所思，心遠目苦短。西風驅殘雲，千里月華滿。

元夕

夢相傳柑宴，村醪可試沽。漫酬元夕爾，不復去年吾。舊事思清汴，幽情卜紫姑。六分春已一，秉燭步通衢。

香奩體

千里相思兩寂寥，東陽應減舊時腰。書中喜有歸來字，攜傍紅窗把筆描。

以上順適堂吟集

潘鄭臺一作鄭臺

詠梔子花

未說司花刻玉工，已知名與佛相同。可憐結了薰風子，依舊身歸色界中。

全芳備祖

周吟軒

蒿

野蔬山芋慣寒酸，羹綠齋黃頓頓餐。及到新年立春日，卻無生菜上春盤。

全芳備祖

李 濤

濤字養源，臨川人。有蒙泉詩藁。

登高正而望遠海

登高正望遠海。萬里長城今安在。坐使神州竟陸沈。夷甫諸人合菹醢。望遠海。登高正。知我者謂我心憂。不知我者謂我何求。歸枕蓬萊漱弱水。大觀天地真蜉蝣。蒙泉詩藥

黃深源

深源字益長三山人

秋日寄懷友人

幾度裁書無雁休。思君天闊水悠悠。自從席上飛花後。又見江頭落木秋。背壁一燈憐瘦影。誰家雙杵動新愁。不知今夜西風裏。人倚月明何處樓。詩家鼎鑿

周承勛

承勛字希稷官瑞州新昌尉

題度門院在瑞州

才入度門寺。先觀覺範詩。昔人吟不盡。今日到方知。地僻寒來早。山高月上遲。池邊老修竹。曾映董生幃。自注龔龍圖端書堂在焉

宿玉龍宮

夜爇松明火。朝焚柏子香。舉家來萬壽。佳節遇重陽。雨止雲穿日。風高天欲霜。吾廬籬下菊。應怪未還鄉。以上娛書堂詩話

鄧林

林字性之。號四清社友。臨江人。有皇琴曲。

蕭小山跋云。皇琴曲詩。古如洞庭。樂其思幽。律如鱗谷。簡其和宣。絕如喬木。嚶其音冶。

玉兒

金蓮華上俞尼子。永壽神仙羅繡綺。苑中荊荻布令嚴。玉像支離瓦官寺。六宮鴨劇起淫風。太白便應縣
姐已。此身肯許兜鍪夫。猛爲東昏判一死。到今羞殺賣降人。去作練兒梁姓臣。

朱彥和

文如玉海動時流。曾以書碁伏隱侯。武德閣前消幾語。卻令梁氏缺金甌。

任蠻奴

千里旌旗已渡江。蠻奴苦諫喚蕭郎。卻持官裏黃金去。望拜韓擒石子岡。

石崇

梓澤神仙第一居。爭豪不惜碎珊瑚。荊州使客知何罪。未必亡身爲綠珠。

送衡山琴畫張道士

滿天風月澹蕭騷。三尺孤桐古調高。不敢問君聽別操。請彈二十五離騷。
滿空煙雨澹模糊。三尺霜縑老墨枯。不敢問君求別景。請描七十二峯圖。

九里松

松是山靈一手栽，堯天長就棟梁材。龍髯怒起春風急，似怪游人喝道來。以上皇華曲

鄭燠

燠字君瑞。

句

月似故人能赴約，鷺如小友可忘年。和劉後村 後村詩話

王默

默字識之。

梅花

知已林和靖，論心何水曹。平生懷玉雪，獨立占風騷。月落香方覺，天寒韻更高。搜吟吟未就，清夢滿江皋。詩林蒐選

張仲節

仲節建安人有玉澗臺。

句

蝴蝶似知春夢熟，穿花飛度畫屏東。閨思 後村題跋

吳鋼

鋼、琚之子官臨安京倅。

崇壽寺在西湖方家峪高宗朝劉妃建。

坳徑石齸齸。梅枝礙竹斜。舊封妃子院。殘照覺王家。亭砌旋風葉。巖流出洞花。飽參塵世味。得似野僧茶。

天申萬壽圓覺寺在西湖之九里松高孝兩朝皆臨幸。

梵室香飄隔竹聞。壁閒肆筆爛奎文。山深翠輦經行處。猶臥從龍數點雲。以上咸淳臨安志

姜補之

補之字伯玉。

雪夜問梅

一年春事五更初。夢覺寒香乍有無。門外不知深淺雪。祇應消瘦玉肌膚。前賢小集拾遺

方菊田

絕句

數葉芭蕉數葉秋。燈長雨久不眠愁。靈溪寺裏夜曾聽。又聽靈溪溪水流。全芳備祖

全大用

海棠

少陵不賦海棠詩。畱待風流相國詞。聞種錦窩三百本。春風纔起蜀人思。全芳備祖

姚顯

顯、雪川人。

遊九鎖山

九鎖碧陰涼。行人古道長。四山松雨過。一路稻雲香。怪瀑驚危磴。殘蟬亂夕陽。長安金屋好。夢不到山房。

洞霄詩集

徐 珏

珏號耕巖。

遊洞霄

凡世纖塵不敢侵。瑤關自鎖白雲深。地靈佳木有仙意。山靜啼禽多好音。五洞暗通蓬島路。九峯密拱石壇陰。步虛聲了幽人暇。一稔爐香三弄琴。

洞霄詩集

蕭汛之

讀秦紀

築了連雲萬里城。春風弦管醉中聽。淒涼六籍寒灰裏。宿得咸陽火一星。

梅磻詩話

徐介軒

桂花

翠葉金花小。膽瓶輕拈款。不勝情。從教失陷沈烟裏。驀地薰心夢也清。

全芳備祖

謝幼謙

醉蕨

香雪支離半墜風。柔條無奈不成叢。阿蠻如許風流骨。打困秋千細雨中。全芳備祖

郭忠謨

溪居

鑿破青山骨。初營數畝工。泉分幽竇乳。峽束大江流。漁唱來花徑。山光落釣舟。沙鷗驚笑語。片片起滄洲。
後村千家詩

黃今是

漁父詞

青烟何處淡孤洲。有客經年業一鉤。芳草渡頭新貰酒。碧雲天際已歸舟。宋藝圃集

吳陵

字昭君

盱眙郡樓

風物淒涼天地秋。憑高不盡古今愁。關河北望三千里。淮泗東來第一州。日暮邊聲傳畫角。早寒霜氣襲重裘。干戈瀕洞何時靜。王粲長吟獨倚樓。詩林萬選

甘邦俊

題梅壇

宋詩紀事 卷七十

火德中微否未傾。朝陽一疏鳳先鳴。如公忠論能旋聽。彼莽姦謀未易成。萬古仙名香宇宙。幾人遺臭腐公卿。至今風吼松聲怒。似爲先生訴不平。梅仙事實

任拙齋

醉醺

一年春事到茶醺。香雪紛紛又撲衣。盡把檀心好看取。與留春住莫教歸。全芳備祖

吳明老

明老建陽人。

小園解后錄。明老剛介有志操。

詩文雖不純。意趣亦殊可采。

偶成

西風颯颯動長林。斗酒沾來伴月斟。慷慨未應憂短褐。悲歌元不爲秋砧。誰云塞馬年年健。自是君門浩浩深。世祖丰神似高帝。楚囚珍重莫霑襟。詩人玉屑

陳疇

題釣臺

故人已了中興事。贏得溪頭伴釣竿。喚起先生同一笑。青山自在白雲閑。釣臺集

謝堯仁

詠芍藥

花萼大如拳。花面或徑尺。紫者棲紫鸞。黃者浴黃鵠。或似扶桑枝。推上一輪赤。或似玻璃盆。稍久擎無力。又有似平叔。愛矜素粉白。又有似蜀人。喜染天水碧。或似包綠錦。未放丹砂坼。或似浴青囊。未放沈麝發。應須和露翦。莫使見顏色。庶幾精神全。免笑花無骨。全芳備祖

徐安國

安國號春渚

大滌洞

大滌山藏碧玉函。神龍護穴虎馴巖。華陽邃道通仙處。始見元同骨不凡。洞霄詩集

妙庭觀

玉笙聲絕瑤池杳。桂殿風生幾度寒。空使時人慕雞犬。埽除槃鼎舐遺丹。杭州府志

王堅

梅壇

曾向梅窗覓隱仙。誰知結屋此山顛。讀書堂下三更月。燒藥爐中幾度煙。鸞影已隨天上去。虹光空盼世間傳。疾邪一疏吾能抗。隱世高名媿獨賢。後村千家詩

孫抗

題隱山南華洞

宋詩紀事 卷七十

一七八七

峭徑入蒼烟。他山盡一拳。上盤朱鳥翼。中寓漆園仙。清可攜壺賞。涼堪枕石眠。九疑生接境。曾此按薰弦。
桂林府志

鄭夢周

漁父

披卻蓑衣翁自漁。青荷包飯柳穿魚。歸時坐在短篷底。白占一溪雲水居。
後村千家詩

李春伯

鷺鷥

春暗汀洲杜若香。風標公子白霓裳。碧天片雪忽飛去。何處人家水滿塘。
後村千家詩

宋詩紀事卷七十一

錢唐 厲鶚 緝
吳 毛德基 勘定

葉紹翁

紹翁字嗣宗，建安人。有靖逸小集。四朝聞見錄。

西湖秋晚

愛山不買城中地，畏客長撐屋後船。荷葉無多秋事晚，又隨鷗鷺過殘年。

秋日遊龍井

引道煩雙鶴，攜囊倩一僮。竹光杯影裏，人語水聲中。不雨雲常溼，無霜葉自紅。我來何所事，端爲聽松風。

出北關一里

脫衣命僕浣塵埃，籬落人家未見梅。出得城門能幾步，船頭便有白鷗來。

嘉興界

平野無山盡見天，九分蘆葦一分烟。悠悠綠水分枝港，撐出南鄰放鴨船。

九日呈真直院

秋風吹客客思家，破帽從渠自在斜。腸斷故山歸未得，借人籬落種黃花。

賦葛天民栽葦

葉礙漁舟入，叢分水國寬。低回藏鷺渚，髣髴釣魚竿。蕩戶和萍送，溪翁當竹看。所憐如許節，不耐雪霜寒。

西溪

一條橫木過前溪，村女齊登采葉梯。獨立衡門春雨細，白雞飛上樹梢啼。以上靖逸小集

貓圖

醉薄荷撲蟬蛾，主人家。柰鼠何。隨隱漫錄

漢武帝

殿號長秋花寂寂，臺名思子草茫茫。尚無人世團圓樂，枉認蓬萊作帝鄉。齊東野語

黃榮仲

江上晚眺

十里滄波自在流，滿天風月下蘆洲。待攜六幅生綃去，畫出江南水墨秋。後村千家詩

王君良

江行

暮雲含雨意，江路轉淒清。秋泊扁舟處，時聞孤雁聲。莫愁秋欲老，只是客關情。不信他鄉恨，吟邊分外生。

後村千家詩

翼字躡父。福唐人。有心游摘橐。

林處齋序云。躡父與子同事樂軒先生。鄙夷場屋之技。獨力于詩。晚而傲世自樂。盡去繩墨法度。自爲樂軒一家之言。如婆羅林中。最後說法。六師諸覲聞者。益懼矣。

伯言見和拙作。以漢隸書之。謝以七韻。

李潮善八分。求歌杜陵叟。有人和我詩。半紙餘科斗。風雲生其懷。劍戟出其手。石經中郎蔡。新樣元和柳。元常文不傳。退之書何有。待我農隙時。載筆隨君後。袖手眼亦明。聊與之飲酒。

山寺聽雨

問道論詩也。一宗燒柴煨芋佛家風。要知真樂人閒少。聽雨空山破寺中。以上心游摘橐

周端臣

端臣字彥良。號葵窗。御前應制。

內人燒香圖

花底燒香深閉門。宮鴉棲了已黃昏。君王未識無人妒。雖不承恩卻感恩。詩家鼎鑪

落梅

條脫空嗟萼綠華。俗塵誰見駐香車。數聲畫角單于塞。一曲山香阿母家。墮砌尙疑妝後粉。點衣猶認唾時花。別來埋沒春風面。幾度虛窗歎月華。

買木犀花

拚卻杖頭沽酒物。湖邊博得木犀花。西風可是無拘束。一路吹香直到家。以上後村千家詩

古斷腸曲

條風窗戶柳陰陰。雲碧春衫護水沈。花裏小闌人不到。流鶯啼起去年心。

依舊斜陽燕子樓。共誰把酒話閑愁。韋娘去後西風老。爛漫黃花滿院秋。詩林萬選

褒親崇壽教寺

萬竹蒼寒擁寺門。寺碑金字御書存。榮華肯信當年事。儀制空留後世恩。影閣有聲塵網暗。殯宮無月土花昏。見梅不敢輕扳折。恐是春風水際魂。

西湖遊覽志。寺在清波門外方家峪。俗稱劉娘子寺。宋紹興十八年。劉貴妃建。妃臨安人。入宮爲紅霞帔得幸。累遷才人。姪奸。婉容等進貴妃。專掌御前文字。工書畫。上用奉華堂印。父愆。因金人南侵。獻錢二萬緡。以助軍費。高宗嘉之。遂令建寺以爲功德。有泉自鳳凰山而下。注爲方池。命曰鳳凰泉。于湖張孝祥書刻。內有松雪亭。觀音洞。筆架池。偃松交枝檜。壁間陳公儲畫龍甚奇。周端臣詩云。

題葉靖逸東菴

一菴自隱古城邊。不是山林不市廛。落月半窗霜滿屋。臥聽宰相去朝天。宋藝圃集

施文炳

金陵作

紫蓋車南久寂寥。石城烟霧壓宮曉。登臺倦客懷千古。宿內閑人夢六朝。御苑雲浮曾拾翠。舊橋月落尚

吹簫諸公不說新亭事。目斷空江半日潮。景定建康志

鄧夢杰

夢杰、盱江人。

廣梅山壁閒韻

媿我身名墮褐冠。無因安得到仙壇。子真雖隱名難隱。萬古高風凜凜寒。梅仙事實

張渠

渠、南徐人。

題雨花臺

莫說南朝勝槩繁。祇今近郭已江村。臺荒浪紀曼花墜。事往空餘古意存。甌缺正緣輕納景。鼎分誰謂不如孫。滔滔千載興亡恨。盡付凭欄對月樽。景定建康志

徐獻可

獻可、永嘉人。官至泉州守。

書齋

十日書齋九日扁。春晴何處不閑行。瓶花落盡無人管。畱得殘枝葉自生。東甌詩集

開九成

九成、餘杭人。

洞霄山隱齋

餘杭之山天柱峯。下有石洞蟠蒼龍。齋居無塵山四合。仙人宴坐空翠中。夜捫北斗罡氣接。晨吸東日精光通。醉凌高風駕白鶴。笑視黃庭驅玉童。人閒自有赤松子。方外或友洪崖公。丹泉吹陰曉霧碧。野果變色秋山紅。獻酬且盡琉璃鍾。笑談便是蓬萊宮。肯如金粟衰病翁。散花丈室談虛空。洞霄詩集

徐千里

茉莉

炎州綠女雪爲肌。十二朱闌月未移。香逼簾紋眠不得。爲渠醒到打鐘時。後村千家詩

饒良輔

良輔字昌朝號竹溪

竹徑步月

素月流空天不夜。清輝散入疎林下。下有幽人獨往來。杖藜縹緲誰能畫。詩家鼎鑿

朱承祖

鶴林寺

鶴林古竹院。馬素舊松關。草合門前路。雲埋寺後山。花神千載去。僧話片時閑。滿壁瑰奇句。慙窺豹一斑。鶴林寺志

鄧雲林

海棠

貪詩閑費一生心。水際雲崖到處尋。可惜春光吾老矣。海棠烟雨閉門深。全芳備祖

范仁仲

題梅仙山

說到神仙事渺茫。壽春亘古此靈場。松邊白隱千年鶴。嶺外紅拖幾夕陽。霞馭月寒時弄影。斗增風冷夜聞香。先生不必真人號。自與乾坤共久長。梅仙事實

蔣夢炎

寒食

不暖不寒寒食天。小橋楊柳未飛綿。三分春有一分在。十日晴無兩日全。桐角喚回前嶂曉。子規啼破隔江烟。麻裙素髻誰家女。哭向墻閒送紙錢。後村千家詩

馬知節

知節字介卿。環溪人。日露按宋史。馬正惠知節字子元。祥符人。此字介卿。環溪人。見宋刊詩家鼎鑿。所選俱兩渡人詩。蓋

與正惠同姓名者。

枯梅

斧斤戕不死。半蘚半枯槎。寂寞幽巖下。一枝三四花。詩家鼎鑿

阮南溪

梨花

續紛紫雪浮鬢細。冷淡清姿奪玉光。剛笑何郎曾傅粉。絕憐荀令愛熏香。合璧事類別集

呂防

防臨川令。

題梅壇

封事悠悠卽挂冠。蒼煙古木鎖空壇。當時不識蓬萊客。祇作南昌一尉看。梅仙事實

王安之

安之字叔安。號藥窗。

寄友

憶昔青燈夜□□。吟猿聲裏早梅香。一從去櫂衝寒雪。幾度凭闌到夕陽。秋思漸于蟬外覺。別愁空入雁邊長。梧桐解得離人意。不遣西風葉盡黃。詩家鼎鑿

張異

異新昌人。

題梅壇

上疏歸來日已西。山中旋製薜蘿衣。謀身豈爲金丹祕。去國應知火祚移。風露滿林蟬幾蛻。松杉遶屋鶴孤飛。瀟香僕僕非公願。自有忠誠天地知。梅仙事實

賈仲穎

仲穎永嘉人。

句

燈花寒影裏。詩句雨聲中。盡開窗戶容秋月。徧倚闌干看晚山。

後村詩話

葛逸

虎丘呈元機上人

樓觀倚雲端。烟收陸海寬。蒼厓畱劍跡。古木見龍蟠。石徑青苔滿。霜林木葉乾。凭闌千里豁。爽氣逼人寒。

虎丘志

富嚴

游虎丘

繚繞禪關鎖翠微。游人到此便忘歸。古今不盡春風恨。一劔清泉沒落暉。

虎丘志

謝子才

柳

嫩葉吹風不自持。淺黃微綠映清池。玉人未識分離恨。折向堂前學畫眉。

後村千家詩

宋自適

自適字正父。金華人。號清隱。

早行

西郊雲起白漫漫。近樹遙峯欲辨難。山下幾多迷路者。人閒方夢大槐安。梅磻詩話

柳

絲絲烟雨弄輕柔。偏稱黃鸝與白鷗。纔著一蟬嘶晚日。西風容易便成秋。全芳備祖

句

江湖多少盟鷗地。莫近平津閣畔行。送愚交弟 真西山題跋

路德章

盱眙旅舍

道旁草屋兩三家。見客搗麻旋點茶。漸近中原語音好。不知淮水是天涯。詩人玉屑

王顯世

顯世字子亦。南安人。官寧都令。有容安橐。

烏駐道中

蹲鴟用事謝黃獨。木奴弄色陵烏棹。落日人行桑柘裏。西風雁過稻梁時。故山秋晚正如此。遊子天寒何所之一笑。沙禽忽驚去。水邊的礫早橫枝。壽家鼎樹

尤 熾

熾。袁諸孫。理宗朝。官臨安府倅。浙東提刑。

題蘇端明書乳泉賦後

萬籟既寂一氣孔神吸彼沆瀣沃此肺膺至陽之精天一所生欽哉此詞展也大成

式古堂書考

喻汝楫

征夫

白骨茫茫散不收朔風吹雪度瓜洲殘陽欲落未落處照盡行人今古愁

詩人玉屑

丁木

木字子植天台人

次揚州何安撫節機韻

送別邗江路梅花作暮愁關情何水部回首古揚州雁影明寒水冰澌澀去舟想應今夜宿霜月滿瓜洲

詩家鼎鑪

葉元素

元素字唐卿號苔磴

絕句

家住夕陽江上村一灣流水護柴門種來松樹高于屋借與春禽養子孫

後村千家詩

吳吉甫

句

真水黃芽長，香風玉杵鳴。不爲三窟計，永伴一輪明。漕試。搗藥兔長生詩。 困學紀聞

李杜

杜號棗坡。

過廢寺

溪沙橫漲水痕平，閑扣雲關壁半傾。殿上土花人不到，斷甃支睡聽蟬鳴。詩林萬選

高鵬飛

鵬飛字南仲，餘姚人，有林湖遺臺。

湖上

好景難逢柰老何，十年此地絕經過。山如得意晚猶碧，雨亦知愁秋更多。造化從渠旋磨蟻，功名笑汝撲燈蛾。湖邊直欲呼船去，更共漁人挂綠蓑。林湖遺臺

李龔

龔字和父，號雪林，笠澤人。家吳興三匯之交，效元白歌詩，不樂仕進。年登耄期，有漱石吟、梅花納翦綃集。

歐楚軒客談和父自作墓誌云：孰生子，孰死子，予不自知。爲文之徒，詩之徒，今瘞于斯，孰知伯道之無兒。未幾死。趙文曜爲誌，葬之何道。兩山閒，樹梅百株。趙德符題碣曰：宋詩人雪林李君之墓。

梅花集句

林蘿深處過溪橋。眼底青山映寂寥。眞態生香難畫得。一枝春瘦雪初消。林逋 蘇養正 又 可止平
吹殺梅花影裏燈。淒涼一似觀堂僧。滿山明月東風夜。茶煮西崑瀑布冰。張翥 周文璞 羅鄴 貫休 梅花梢

公無渡河

屈平沈湘不足慕。公無渡河兮公苦渡。行搔短髮提壺漿。玉白蘭芳不相顧。驚波不在黯黯開。顏色錯漠生風烟。其下無底旁無邊。何用將身自棄捐。李賀 王叡 李咸用 溫飛卿 齊己 盧仝 白居易 玉建

重宿吳林居園亭逢雪

小隱西亭爲客開。舊題詩句沒蒼苔。銀河風急驚沙度。酒作凌澌火作灰。許渾 鄭谷 李咸用 姚合

寒食

一年唯此兩三辰。落拓東風不藉春。歌酒家家花處處。何曾紫陌有閑人。熊孺登 李山甫 白居易 羅鄴 以上翦綉集

盧梅坡

春日

紅芳滿眼鬪風流。誰信春來有客愁。惆悵不下楊李事。故山烟雨憶松楸。

閔雨

百萬人家井水黃。江南大半田無秧。乖龍豈是爲霖物。貪弄明珠簸日光。以上後村千家詩

季履道

履道號澄江

龜山

濁酒三秋館，青燈半夜花。故人渾在目，幽夢暫還家。淮近風偏惡，山高月易斜。新霜何處雁，片影落平沙。

詩林萬選

葉 杲

杲字謙夫，永嘉人，官史館檢閱。

東山堂

何處著詩題，巖邊有隱廬。雲生春樹合，魚響夜潭虛。住久無他姓，山空應讀書。平分謝池月，吾亦百年居。

東甌詩集

方景絢

景絢，字武子，莆陽人，擢第，終于郡掾。

題壁

明月照齊州，玉龍棲欲起。壯士腸夜迴，寒衾潑秋水。

劉後村題跋

何 洪

洪號梅境，淳安人。

溪居冬夜

茅屋瀨溪只數椽，護籬黃犬枕莎眠。柴門不掩松梢月，恐有山陰泛雪船。齊溪詩集

車瑾

瑾字元瑜，黃巖人，號敬齋。

馬家山在黃巖縣

山頭紅日生，山下蝮蛙爭。朝市誰能問，煙雲我自耕。胡牀調紫蕨，黃獨煮香秔。無意隨園綺，逃名更得名。

台州府志

朱輔

虎正

自許胷中著一丘，飽于世路合休休。未陪靖節遠公社，且與景常元慧游。四野凍雲催雪到，五湖春浪蹴天浮。不將拾翠相隨去，碾罷新茶卽泛舟。虎丘志

宋詩紀事卷七十二

張堯同

堯同嘉興人有嘉禾百詠

嘉禾百詠存十首

艾山

丹竈功成後。寥寥掩石扉。但聞蟬已蛻。不見鶴來歸。

蘇小小墓

泉下骨應朽。幽魂獨未銷。幾番清夜月。孤影度南橋。

韭溪

終與雙溪接。分流入市來。市橋人影合。不解洗塵埃。

朱買臣墓

世事春風轉。榮枯一夢閒。繡衣人不見。孤冢舊家山。

天心湖

錢唐厲鵝緝
錢唐許承爨勘定

拍岸浮春綠，菰蒲四遠生。網羅人不到，魚鳥亦忘情。

月波樓

天闊冰河淨，溪平玉鑑寒。卷簾看晚色，鷗鳥傍闌干。

列岫亭

吾州風物好，唯是欠青山。忽有洞庭色，來從一笑閒。

跨塘橋

路接張溼近，塘連谷水長。一聲清鶴唳，片月在滄浪。

樂郊亭

竹下清風好，時來挂幅巾。待逢田叟問，誰是樂郊人。

長水鄉

古鄉也。故楞嚴大師子璿作楞嚴疏文謂之長水疏。

古來名未滅，人好水還清。一讀高僧疏，塵勞悟此生。以上嘉禾百詠

梁佐

佐理宗時人，與史安之倡和。

高山堂

危巔層閣倚雲平，一凭危闌醉魄醒。霽雨亂山生淡碧，帶風寒竹有餘青。孤猿傍石來深磻，幽鳥衝烟入畫屏。卻讓高僧占仙景，蓬萊不獨在滄溟。嶧縣志

毛珮

珮字元白。三衢人。有吾竹小橐。

李彛和父序云。柯山毛元白。詩人之秀者也。惜其少文自晦。不求聞于時。吟藁一帙。清深雅正。跡前事而寫芳襟。有沈千運獨挺一世之作。

廬山栖賢寺

名重于諸刹。前賢舊隱蹤。無人知有路。隔樹忽聞鐘。瀑壯山疑裂。雲深寺若封。或傳遺橐在。三叩昔時松。

墨龍

真人尸居雷八荒。斷軌殘墨生蒼茫。鯢桓下瞰九淵墨。神光倒射角與亢。平聲明明元氣淋漓蹟。水底焚槐海波赤。周流萬化元無極。姑使人心識天則。

浙江

白鷗舊事隨波去。太極陰陽自吞吐。長虹夜貫黑頭船。四紀沙迎相公路。馮夷作劇真等閑。五都有客雄其閒。上林三官浪憂國。千年海底生銅山。

丹陽館

渡江南來第一驛。幾度華堂延雁客。百年運逐曉雲空。愁殺鞮官老無職。南徐今日古陽關。不斷歌聲祖離席。國讐已復事尤多。折損年年春柳碧。

富池廟

船頭蜀錦三千尺。倒影長虹浸寒碧。相逢不是紫髯郎。鸚鵡洲邊眼生棘。江頭簫鼓雜靈鴉。人道陰兵曾護國。安知樓下雪千堆。不是吞曹氣衝激。

滄浪亭

濯纓人去水空寒。事屬明時欲問難。日暮客歸園館閉。鷺鷥飛上石基槃。子美故物。唯石枰存。

石湖

一片湖光接薜蘿。功名餘事屬吟多。至今魚鳥皆堪敬。曾見烏巾照碧波。以上吾竹小棗

黃伯厚

晚泊

片帆寂寞繞孤村。茅店驚寒半掩門。行草不成風斷雁。一江烟雨正黃昏。後村千家詩

范大中

立春寄梅壇楊逸老

仕路蹉跎又見春。區區深厭走紅塵。未能解脫無窮事。長憶逍遙自在人。瓦缶汲泉朝灌藥。羽衣濃露夜朝眞。灑然物外清虛境。呼吸淳元養氣神。梅仙事實

劉 瀾

瀾字養源。號江村。天台人。初爲道士。還俗。干謁無成。卒。

劉後村跋云天台劉君瀾詩四卷短篇如新
戒縛律大篇如散聖安禪詩之體製略備

桐江曉泊

風蕭蕭冰瑟瑟淡烟空濛冠朝日灘頭枯木如畫出鸚鵡飛來添一筆梅磡詩話

夜訪侃直翁

疎瓠亂見星危坐冷無燈索句髮先白餐蔬貌盡青棲禽翻籠雪墮栗破溪冰昨夜中峯頂因看海日昇

瀛奎律髓

句

東風半綠官圩草西日遙紅別岸山梅磡詩話

李 億

柳

倚岸依依一兩株溪風吹影暮烟疎青條拂水長如線釣叟折來穿白魚後村千家詩

劉允升

繭漆花

清晨步上金雞嶺極目漫山繭漆花雪蘂瓊絲亦堪賞樵童蠶婦帶歸家全芳備祖

易元矩

斑竹

一別虞妃去不還，愁雲空鎖九疑山。世間多少相思淚，灑徧脩篁染不斑。全芳備祖

何應龍

應龍字子翔，錢塘人。有橋潭詩藁。

春寒

博山熏盡鷓鴣斑，羅帶同心不忍看。莫近闌干聽春雨，樓高無處著春寒。

有別

樓上佳人唱渭城，樓前楊柳綰離情。一聲未是難聽處，最是難聽第四聲。

臨安儻樓

過了燒燈望燕歸，春寒剗地勒芳期。杏花深巷無人賣，細雨空簾盡日垂。

芍藥

金葉絲頭茜染成，五雲樓映玉盤傾。謝郎一入中書後，二十四橋空月明。以上橋潭詩藁

傷春

玉纖輕揭繡簾開，行到花前淚滿腮。正爾春心無處託，一雙蝴蝶忽飛來。後村千家詩

蔡槃

槃號遠菴，永嘉人。

瓜洲

烟際繫孤舟。蘆花兩岸秋。江空雙雁落。天迴一星流。急鼓西津渡。殘燈北固樓。商人茅店下。沽酒話揚州。

東甌詩集

羅竹谷

竹谷、廬陵人。羅大經之父。名字未詳。

送曾雲巢被召

秦華山人上赤墀。上嗟安在見何遲。老子尙父投竿日。少似轅生對策時。怨鶴驚猿辭舊隱。鞭鸞笞鳳總新知。早陳經國平邊策。歸領雲巢舊住持。

送胡季昭竄象郡

好讀牀頭易一編。盈虛消息總天然。崢嶸齒頰皆冰雪。肯怕炎方有瘴烟。

以上鶴林玉露

羅大經

大經、字景綸。廬陵人。登第爲容州法曹掾。著鶴林玉露。

茶聲

松風檜雨到來初。急引銅瓶離竹爐。待得聲聞俱寂後。一甌春雪勝醍醐。

鶴林玉露

陪桂林伯趙季仁遊桂林暗洞。列炬數百。隨以鼓吹。市人從之者以千計。已而入。申而出。入自曾公巖。出于棲霞洞。入若深夜。出乃白晝。恍如隔宿異世。季仁索余賦詩紀之。

瑰奇恣搜討。貝闕青瑤房。方隘疑永巷。俄敞如華堂。玉橋巧橫溪。瓊戶正當窗。仙佛肖髣髴。鐘鼓鏗擊撞。晶熒左顧龜。嶙嶙欲吠鹿。丹竈儼亡恙。芝田藹生香。搏噬千怪聚。絢爛五色光。更無一塵浣。但覺六月涼。玲瓏穿數路。屈曲通三湘。相傳與九疑通神鬼妙剗刻。乾坤真混茫。入如深夜暗。出乃皦日光。隔世疑恍惚。異境難揣量。鶴林玉露

王荆公

錯認蒼姬六典書。中原從此變蕭疎。幅巾投老鍾山日。辛苦區區活數魚。

鶴林玉露。王荆公新法煩苛。毒流寰宇。晚歲歸鍾山。作放魚詩云。物我皆畏苦。舍之寧啖茹。其與梁武帝窮兵嗜殺。而以麪代犧牲者何殊。

吳規父

蛙

斂藏鼓吹寂無言。踈跳何曾離草根。舉世盡貪生處樂。坎中應自有乾坤。後村千家詩

劉汝進

汝進號山翁。漫塘幼子。

與客九日遊龍山。以塵世難逢開口笑。分韻得口字。

縱步龍山顛。放舟尤蕩口。羣然雁鰲行。雜之牛馬走。我拙不能詩。我病不能酒。試問賞花人。還有菊花否。
山房隨筆

呂

炎、炎
字仲明。

閨思

夜久香銷翡翠匳，十分春恨上眉尖。茶蘼謝了櫻桃過，人影參差月半簾。
詩林萬選

車若水

若水，字清臣，號玉峯山民，黃巖人。從杜清獻公游，有腳氣集，玉峯穴竅。

江湖偉觀

十年不向此凭闌，景象依然一望閒。龍蜃吐雲天入水，樓臺倒影日銜山。僧于僻寺難爲隱，人在扁舟不
是閑。孤鶴似尋和靖宅，盤空飛下復飛還。
咸淳臨安志

庚申

襄陽耆舊總堪羞，只有龐公已入州。自向芭蕉眠夜雨，不堪更鼓在牀頭。
赤城詩集

陳嘉言

嘉言，候官人。仕爲建州司戶，咸淳末，築室台嶼，人稱書隱先生。

題太姥墓

墓存焉

太姥山在福寧州東，堯時有種藍老姥，家於路傍，有道士求漿，姥飲以醪，因授丹砂服之。七月七日乘龍上升，有虛

吾聞堯時種藍媼，世代更移那可數。帝堯朽骨無微塵，此閒猶有堯時墓。墓中老媪知不知，五帝三王奚

以爲狼貪鼠竊攫尺土。蘇木未枯已易主。君不見仙人掌。分明指取青天上。騎龍謁帝大羅天。不逐華蟲挂塵網。又不見石碁盤。人去盤空局已殘。當時勝負此何有。爭先劫奪摧心肝。請君絕頂試披寫。左望東甌右東冶。山川不見無諸搖。但見烽烟徧郊野。野老吞聲掩淚哀。茫茫滄海生蓬萊。名勝志

羅興之

與之字與甫。螺川人。有雪坡小橐。

玉梁道中雜詠

清商汎西來。刺刺滿林塢。草木儵變衰。柯葉不相顧。昔時翳空雲。今作連山雨。菊花猶強項。籬邊爭媚嫵。泠泠澗底泉。破碎山根翠。似欲畱佳客。曲折二十四。我行無定止。蠟屐信所詣。偶來儵舍去。乘興聊復爾。灑鴻玉梁境。縹緲雲霞仙。月壇白雲洞。遺址空依然。千年唯亂石。踳踳秋山烟。徘徊莫可覓。酌盡丹井泉。

山居

雨作糟牀注。秋生鱸膾思。卷簾了清景。流水裊烟絲。

一夜

潦收野水淨。雲陣布重陰。一夜西風急。千山黃葉深。身猶披暑服。耳已厭寒砧。對此無心者。還應雪滿簷。

寄衣曲

愁腸結欲斷。邊衣猶未成。寒窗剪刀落。疑是劔環聲。

爲言

日薄寒濃春意微。花鬚柳眼尚依稀。爲言羯鼓休頻打。催得先開卽早飛。

山行

盡日流連興未闌。寒鴉背負夕陽還。遙知今夜空窗夢。只在江南水石閒。

倦倚

蟬聲燕語細相和。池雨纔浮點點荷。倦倚闌干消永日。葡萄陰薄柳風多。以上雪坡小集

陳東之

游沃洲山

我本名山人。屢作名山興。天台一住三十年。盡日捫蘿陟雲磴。上攬四萬八千丈之高秋。參差明河兩肩並。下瞰三百六十度之朝暾。滅沒飛烟八荒淨。或隨氣仙得丹牀。雙闕夜深看斗柄。今年積雨天地晴。一策快作西南征。沃洲最佳天姥勝。連山直下秋崢嶸。竹萌修織會稽箭。芝莖菌蠢商山英。秋陽不碎空翠影。絕壑倒瀉銀河聲。山腰細路如絲直。三兩漁樵行落日。炊烟暝色小茅屋。松子秋聲斷崖石。溪流飯屑胡麻香。土輭春膏霜尤白。送書松際有猿公。問酒磯陰多木客。青冥樓閣仙人家。鬱藍流光瀉晴碧。霓旌隊下鶴萬羣。絳節朝回雲五色。人間但有桃花源。桃花春香水渾。三生凡骨不得到。兩耳夜半空聽猿。李白尋真不得返。支遁卜築遠費錢。至今山靈護光怪。石蘿山薛餘秋妍。陳郎故宅更深闕。雞犬林塘隔塵世。清秋著屐一登之。路僻夕陰門半闕。盤陀石在長楠陰。脫略塵纓換秋意。晴窗示我兩山圖。老眼摩挲觀一二。便揮健筆寫我詩。惜哉賞音今絕稀。謫仙一去五百載。人間山水無清輝。舊時仙人白雲唱。怪

我白首歸何時。我生白首歷浩劫。眼中億萬蟲沙春夢非。陳郎挽我十日住。掉頭不顧自有南山期。餐霞絕粒鍊精魄。長生之學非荒嬉。三千年前有宿約。來已不早歸不遲。長揖羣仙謝兒輩。倒挾萬里冥鴻飛。
越詠

保應廟

投迹空山計已非。江都消息亂來稀。廟前幾種春香草。錯怪王孫去不歸。

新昌縣志縣之十四都。隋諸王避難。歿葬其地。水旱疾疫。祈禱輒應。宋寶慶二年。從鄉民之請。建廣賜額。陳東之有詩云。

吳濟

濟字巨川。號廉靜。

鮑家田

搖旆家家酒。扶犁處處村。草深迷井口。槿密擁籬根。綠水明秧本。青山失燒痕。多應忌蠶事。畏客閉柴門。

咸淳臨安志。鮑家田。在錢塘門外。東山街之北。吳

越相鮑君福。賜田于錢塘。因以名焉。吳廉靜有詩。

野外卽事

橫木渡前溪。藤深路欲迷。瘦筇諳亂石。老屐帶新泥。盡日綠陰合。有時黃鳥啼。多情雙蛺蝶。飛傍帽簷低。
前賢小集拾遺

劉蕭仲

子規

深藏密葉人難見，斷送春光夢一空。
啼後血流成底事，只應都作暎山紅。
後村千家詩

丁先民

游大滌山

我欲避塵囂，乘風入洞霄。
循溪山作路，駕水石爲橋。
臺殿黃金鎖，神仙碧玉簫。
拂衣天柱頂，清思欲飄飄。
洞霄詩集

張簡

簡號槎溪

天津橋月夜

行闕獨崔嵬，垂楊夾道栽。
河通桃葉渡，門對雨花臺。
世事基千變，人生夢一回。
誰知今夜月，曾照六朝來。
詩林萬選

吳震齋

玉簪花

素娥昔日宴仙家，醉裏從他寶髻斜。
遺下玉簪無覓處，如今化作一枝花。
全芳備祖

馬樽山

瓊花

三月淮南鼓戰塵。無雙亭下隘遊人。此花不解興亡意。也向年年閏一春。全芳備祖

王琮

琮字中玉。括蒼人。監永嘉酒稅。有雅林小橐。

題獨醒小亭東嘉酒舍予所創

退食多閒此。翛然一散襟。涼從曉來覺。秋向雨中深。牆竹侵山色。檐茅雜柳陰。有誰能載酒。過我共幽尋。

秋夜有懷醉書十韻

秋風從何來。颼颼入窗牖。殘燈耿不寐。照我客顏厚。故園豈不佳。亦頗興懷否。黃金桂百樹。碧玉池十畝。鶴猿響空山。亭臺映疎柳。觥籌雜野蔌。筆硯得佳友。愁無彈鵠句。雋有持螯手。人生行樂耳。功名有時有。點檢屐幾兩。土苴米五斗。浩然歸去來。萬事不如酒。

舟過孤山

寂寞梅花處。士墳竹圍巖腳。一泉深。偷瞻翠輦曾遊處。水鑰年年護綠陰。以上雅林小橐

李景文

景文號東谷。黃巖人。有東谷詩橐。

病後感興寄車玉峯先生

折梅寄故人。故人青雲開。青雲杳無路。夢裏相往還。我愛梅花媚。彼惜桃李顏。相逢不相契。何事勞追攀。

守此歲寒心，持以遺所懽。

廬墓有感

流水遶門去，愁雲壓徑斜。無人燒柏子，有客問梅花。橘熟猿窺樹，池空鳥啄沙。自傷寒谷日，不及照昏鴉。
以上台州府志

陳以莊

以莊字敬叟，號月溪，建安人。

劉後村跋云：敬叟才氣清拔，力量宏放，穀城黃子厚之甥也，故其詩酷似云。

闕題

鳳簫一去幾經年，古木青蘿鎖洞天。黠鬼不量曾竊藥，真人豈礙作飛仙。細看丹竈凝烟地，知有清朝應世賢。欲下蒼崖卻回首，何時著我弄雲泉。
後村千家詩

春興

輕衫短帽久塵埃，零落香篝媿麝煤。春半工夫花繡了，社邊消息燕銜來。豈無綠野供千騎，幸有黃封可一杯。明日清明能出否，憑誰先爲掃莓苔。
詩林萬選

吳惟信

惟信字仲孚，雲川人，寓吳中，有菊潭詩集。

蘇堤清明卽事

梨花風起正清明。游子尋春半出城。日暮笙歌收拾去。萬株楊柳屬流鶯。

西湖雨吟

溼了荷花雨便休。晚風歸柳澹於秋。一生不作機心事。合轉船頭向白鷗。

曉吟

翠帳香清捲碧紗。風捎殘雨溼檐牙。蜻蜓亦被涼勾引。清曉低飛入水花。

秋夕

南風吹露下秋空。烏鵲無聲占碧桐。天氣微涼人好睡。闌干閑在月明中。

野望

閑興蘆花立水邊。歸心客思兩茫然。夕陽收盡天風急。一樹寒鴉落野田。

拜和靖墓

墳草年年一度青。梅花無主自飄零。定知魂在梅花上。只有春風喚得醒。

自序

一劍辭家竟陸沈。夢思空向故廬深。槎迷河漢千年恨。樹隔關山萬里心。衣垢正憐貧未去。鏡明忽有老相尋。春歸不與人爲約。青草催詩亦嬾吟。

秋夕

雨聲雲氣暮蕭蕭。羅扇恩疎井樹凋。心事暗隨歸夢去。壁燈留與可憐宵。
詠貓

弄花撲蝶悔當年。喫到殘糜味卻鮮。不肯春風留業種。破氈尋夢佛燈前。
以上菊潭詩集
絕句

白髮傷春又一年。閑將心事卜金錢。梨花瘦盡東風嬾。商略平生到杜鵑。

齊東野語。糜先生。吳之老儒也。時吳仲孚客吳。一日遇諸塗。叩以近作。仲孚誦絕句云云。糜老風膝拜曰。子謫仙人也。老夫每欲效顰。則漢高祖唐太宗。追逐不少置矣。

翁元龍

元龍字時可。號處靜。四明人。杜清獻成之之客。

題曹娥墓

自從西子入吳宮。幸有英娥可勸忠。同姓最慙曹孟德。垂名只許叔先雉。虛生浪死人何限。白日青天古
一同。看得家頭三寸草。也嫌桃李嫁東風。
娥江題詠

葉維瞻

維瞻號石軒。

題西陽嶺

杜鵑啼處化成血。燕子忙時麥未胎。舉世但知春易老。不知春老幾人來。
詩林萬選

徐存

存號萬軒

遊洞霄宮

清真羽士舊仙官。日奉琳宮紫翠閒。五洞烟霞龍窟宅。一壺天地道家山。滌泉盤轉冰涵沼。隱石屏開玉敞關。可笑濯纓來覽勝。輸他高臥白雲閑。洞霄詩集

馮輓

輓慈谿人

題慶安寺古松

寒松一幹老蒼蒼。古寺門前歲月長。匠伯偶圖舟楫利。禪翁方患斧斤傷。得全此日同齊櫟。勿翦他年比召棠。可但與君期久遠。相將俱列大夫行。

陳郁話腴。明之慈谿縣。慶安寺前有古松夾道。綿亘數里。其一最巨。蜿蜒若龍。飛僊如蓋。臨池之上。邑長沈時升有造舟之役。睥睨茲松。將斤焉。里士馮文學輓作詩以遺沈。賴以不伐。松因詩而壽焉。

劉元茂

元茂號石澗。性愛菊。

繡帙得菊葉

何年霜後黃花葉。色蠹猶存舊卷詩。曾是往來籬下讀。一枝閑弄被風吹。山家清供

陳潤道

潤道、天台人。

吳民女

吳民嗜錢如嗜飴。天屬之愛亦可移。養女日夜望長成。長成未必爲民妻。百金求師教歌舞。便望將身贖門戶。一家飽暖不自憐。傍人視之方垂涎。朱門列屋爭妍媸。自計逢迎主人意。常時疎棄自悲啼。一日承恩多妒忌。古人怕爲蕩子婦。夜夜孤眠淚如雨。今人甘爲貴人妾。得意失意花上月。蕩子不歸寧空房。主人喜怒多不常。

陳邵語。吳下風俗尙侈。細民有女。必教之樂藝。以待設宴者之呼。使令莫逆。奉承惟恭。蓋觀利贖家。一切不顧。名爲私妓。實與公妓無異也。長大驚爲妾。狼戾則籍之官。勳以千計。習俗薄惡。莫此爲甚。天台陳潤道作吳民女一篇。殊益風教。

施樞

樞字知言。號浮玉。有芸隱橫舟橐。

龜溪市橋見月

樓臺疊翠遠清溪。淺澹雲邊月一眉。行到市聲相接處。傍橋燈火未移時。

滄浪亭

長史遺蹤二百年。直教名字到今傳。渚香細泡蓮須雨。野色輕圍竹尾烟。但得幽情關水石。何煩隱跡隔林泉。客中正有塵纓在。來此清遊亦是緣。

晚思

客路悠悠強自安，亦因吟事可相寬。
小窗過了廉纖雨，細與東風說晚寒。

開爐次夕，以不禁離抱來訪宏菴，挑燈細語，漏促忘歸，卽事有賦。時黃澹翁在焉。

客裏情懷不自如，夜深來訪子雲居。
挑燈細按新翻曲，拂案同看舊架書。
梧葉敲風葢砌冷，菊香消雨鶴庭虛。
相逢且與開眉笑，莫遣吟邊酒琖疎。
以上芸隱橫舟藥

牋 炳

炳字文伯，高郵人。

閑詠

年踰八袞雪蒙頭，時對親朋話舊遊。
萬事無心閑日月，一杯有味小公侯。
癡兒麁爾逃譏議，家訓從來戒克培。
世道漸難宜勇退，爲吾閒早理松楸。
陳郁話腴

鄒登龍

登龍字震父，臨江人有梅屋吟。

真西山跋鄒君之詩，言造理句入律，金至百鍊而精，珠穿九曲而巧。

數石屏跋，讀震父詩卷，如行春風蒼陌，見時花游女，動人心目多矣，使其加以苦心，進進不已，野夫它日當避三舍。

題杜少陵草堂圖

背郭好林塘。誅茅作草堂。因吟白鷗谷。爲卜碧雞坊。籠竹和烟靜。江梅帶雪香。四松經喪亂。閱世幾風霜。梅花

約臂金寒拓綺疏。搔頭玉重壓香酥。含章簷下新妝額。試啓菱花得似無。

王氏山居

聞道山居好。林深遠俗情。茶烟熏壁暗。蘿月射窗明。學稼脩禾譜。栽花識藥名。無人覺幽隱。爲有讀書聲。
以上梅屋吟

余觀復

觀復字中行。盱江人。有北窗詩藁。

次韻

榴簇殷紅竹迸青。風驚檐玉一時鳴。晚來幽趣無人解。流水聲中看月行。
北窗詩藁

左瀛

瀛字睿之。黃巖人。緯元孫。咸淳初卒。有委羽續集。

妾薄命

妾貌微微改。君恩漸漸疎。本期爲匹鳥。深恐作前魚。卻月無心畫。香雲信手梳。佳人多薄命。不必重欷歔。
黃巖英氣

胡子期

子期，黃巖人，理宗時太學生。

訪開公不遇

獨步小菴清，憑軒數曉星。
霜華連野白，山色滿門青。
風定松猶響，香銷室自馨。
孤雲何處宿，案上掩蓮經。

黃巖英氣

李景雷

景雷，號小幘翁，黃巖人。

和宋伯仁韻

自笑馮唐老未侯，短衣匹馬異鄉遊。
臥聞破屋蕭蕭雨，坐聽西風葉葉秋。
藪下已非公幹在，周南徒歎子長留。
丈夫蓋世英雄氣，肯學世閒兒女愁。

黃巖英氣

宋詩紀事卷七十三

錢唐厲鶚緝
休寧汪庭堅勘定

王栢

栢字會之。金華人。初號長嘯。後更號魯齋。受業何北山之門。郡守蔡抗。楊棟。台守趙景緯。相繼聘主麗澤上蔡兩書院。四方從學者日衆。咸淳十年卒。賜諡文獻。有集。

催雨

人世如居甑。驕陽不可鉏。未聞芻作狗。安得夢維魚。賦斂民生槁。干戈國計虛。安危關一飽。雨意莫躊躇。

題定武蘭亭副本

玉華末命昭陵土。蘭亭神蹟埋千古。率更搨本入堅珉。鹽帝歸裝投定武。薛家翻刻愚貴游。舊石宣和龕御府。胡塵橫空飛渡河。中原荆棘穴豺虎。維揚蒼茫駕南轅。百年文物不堪補。紛紛好事競新模。傾敝醜俗無遺矩。如今薛本亦罕見。髣髴典刑猶媚嫵。清歡盛會何足傳。右軍它帖以千數。託言此筆不可再。慨然陳迹興懷語。今昔相視無已時。手掩塵編對秋雨。

八詠樓

樓壓重城萬井低。星從天闕下分輝。傷心風月詩應瘦。滿眼桑麻春又肥。山到東南皆屹立。水流西北竟

何歸倚闌莫問齊梁事。斷石淒涼臥落暉。以上魯齋集

王仁

仁字剛仲。號立齋。劉撝堂。河北山之門人。

冬日雜興

庭際幽蘭手自種。託根不與春華共。苒苒同風數竿竹。襟期元作幽人供。如何江湖浪征逐。芳信卻因鴻翼送。多慚獨處歲將晚。尙想清聲形曉夢。濂洛風雅

饒魯

魯字伯輿。又字仲元。自號雙峯。餘干人。從黃幹、李春學。累薦召不起。卒。門人私謚曰文元。

琵琶洲

潯陽江上譜無傳。化作沙汀越水邊。一段遺音人不識。夜深幽咽下灘泉。饒州府志

陳藻

藻字元潔。福唐人。林網山之高弟。有樂軒集。

劉后村序云。樂軒七十五。迺卒。年出于其師。而窮猶甚于其師。城中無片瓦。僑居福清縣之橫塘。開門授徒。不足自給。至澤游江湖。崎嶇嶺海。積鏹得百千。歸買田數畝。輒爲人奪去。今讀其文。講學明理。浩乎自得。不汲汲于希世求合。登窗雪案。猶宗廟百官也。榮羹脫粟。猶堂食萬錢也。入則課妻子耕織。勤生務本。有拾穗之歌焉。出則與諸生弦誦。登山臨水。有舞雩之詠焉。

寄劉八

六度封書向小孤。一度逢人寄書無。劉郎嗔我無短吟。素書百紙難論心。我愛劉郎可無詩。劉郎愛客還答兒。我爲父執倍其年。見我呼兄挾渠賢。撥棄勿復陳。對君吟此身。憶昔在桂堂。瘧鬼罹我殃。世情疎客病。移我君家牀。兒女不辭勞。僕妾何憚忙。秋風黃葉飛。明燈藥爐傍。我身何日殞。此念何時忘。正嫂晚歲歸。敬我如小郎。他年山下結吾廬。朝暮往來摩白鬢。我抱子。君抱孫。卻使相敍爲弟昆。

題劉氏翠微亭

舊屋紅蕖外。新亭綠樹傍。江晴孤棹見。雨近衆山藏。學圃未成趣。催詩何太忙。他年多橘柚。此地一瀟湘。福州城北吳氏新樓之作

千山匝市繞三山。盡屬危樓一覩閒。雲漢星辰隨道遠。鄰家花木不容慳。憑闌要取西湖盡。落葉尤宜朔吹寒。況是先生莊列輩。眼高人境幾層看。

融州除夜

臘月牂柯三十日。相思覓句上譙樓。遙知今夜柴爐會。說我無家更遠遊。

春日

獨上譙樓日一迴。春風桃李滿城開。狂夫欲語無人聽。呼取閑雲共酒杯。以上樂軒集

林尙仁

尙仁字潤叟。長樂人。有端隱吟藁。

陳必復序云林君詩專以姚合、
賈島爲法而精妥深潤則過之。

適越留別

江亭飲罷起離愁，何事西風又遠遊。
潮信欲來人欲去，夕陽紅蓼滿汀洲。

春日

未逢知己媿蹉跎，又見春風長徑莎。
杜宇一聲詩思減，楊花三月客愁多。
從人乞米貧如舊，借吏抄書字半訛。
懶說江湖十年事，近來平地亦風波。

春晚

春事又無幾，陰晴苦不齊。
久貧交味薄，多病語聲低。
落絮行風徑，歸雲度晚溪。
故鄉二千里，日夜子規啼。

以上端隱吟藁

嚴 粲

粲字坦叔，邵武人。登第，官清湘令，有華谷集。

風雨宿湖心

渺渺平湖四接天，孤舟曾繫夜來船。
折鞭又入風塵去，卻憶秋篷聽雨眠。

秋入

秋入白蘋風浪生，癡雲未放楚天晴。
青山湖外知何處，中有斜陽一段明。

二水聞角

少日鄉關不解愁。閑聽畫角起譙樓。西風依舊闌干月。獨自瀟湘萬里愁。

寄張輯

不見吾張輯。新詩何處吟。身留江介遠。秋入夜涼深。燈影還家夢。蛩聲倦客心。歸來及佳節。細把菊花斟。

宿石潭寺寄黃炳

昨夜湖心共泊船。一天星露宿寒煙。朝來極目無洲渚。知採蘋花何處邊。

午憩僧房

黃塵吹不到禪房。窗紙風翻葉葉涼。觸熱行來牽晝夢。孤篷聽雨下瀟湘。以上華谷集

秋風

門與姑山對。溪邊有故廬。別來三徑菊。閑卻一樓書。水碓長腰米。村船巨口魚。秋風歸去好。畱滯意何如。

兵火後還鄉

萬屋烟消餘塔身。還家何處訪情親。舊時巷陌今誰問。卻問新移來住人。以上詩人玉

句

風池行落葉。

梅澗詩話止一句爲鄭安

晚稱賞次日有中舍之除

陳景沂

景沂天台人。號肥遯。著全芳備祖。

風雨

風雨瀟瀟夕。春寒燈較昏。茅簷數椽屋。荻浦幾家村。網到江鱗活。沽來市酒渾。烘衾供結局。一覺眇乾坤。
全芳備祖

林洪

洪字龍發。號可山。泉州人。有西湖衣鉢。

梅磭詩話。泉南林洪。字龍發。號可山。肄業杭州。粗有詩名。理宗朝。上書言事。自稱和靖七世孫。冒杭貫。取鄉薦。刊中興以來諸公詩。號大雅復古集。亦以己作附於後。時有無名子作詩嘲之。曰。和靖當年不娶妻。只畱一鶴一童兒。可山認作孤山種。正是瓜皮搭李皮。蓋俗語以強認親族者。爲瓜皮搭李樹云。

西湖

煙生楊柳一痕月。雨弄荷花數點秋。此景此時暮不盡。畫船歸去有漁舟。
後村千家詩

釣臺

三聘殷勤起富春。如何一宿便辭君。早知閑腳無伸處。只合青山臥白雲。
釣臺集

陳昉

昉字叔方號節齋溫州平陽人以父任入官累除吏部尙書端明殿學士卒諡清惠

宮詞

桂影婆娑玉殿涼風傳花漏夜聲長內人亦有思仙者月下吹簫引鳳皇後村千家詩

寒食湖上

花瘦水肥三月天畫橈雙動木蘭船人家盡換新榆火唯有垂楊帶舊烟咸淳臨安志

洪 燾

燾於潛人咨夔子以朝奉大夫祕閣修撰兩浙轉運副使兼知臨安府除戶部侍郎咸淳四年除

吏部尙書

咸淳戊辰餘月下漕去郡歸里因訪菊巖龔先生用平舟楊公韻題蓬山堂泉石

人生躑躅塵中幾若駒過隙安得坐此山枕流復漱石洞霄詩集

張 蘊

蘊字仁溥揚州人官幹辦行在諸司糧料院有斗野支臺

江湖偉觀

隄柳朝朝送酒船一闌山色越帆烟蓬萊雲氣東溟外閭闔星辰北斗邊突兀向來無此屋登臨當日有

諸賢夕陽過雁慵回首吟入關河萬里天

西湖清明

芳天新霽惠風和。輭綠平隄凝不波。桃李無言看客慣。樓臺如畫占山多。游裙匝路填車馬。翠榜開筵鬪綺羅。寂寂寒烟生水面。白鷗柰此月明何。

酥

兼味醒醐外。分身乳酪中。江南鳴榔犢。塞上寄飛鴻。乾雨看如幻。生鹽訝漸融。臘殘猶有待。煎取牡丹紅。

食蠟次韻芸隱

相黏成什伯。峯聳若山王。史南人呼明駝爲山王攻處須犀鐵。持來出蟹湯。梅花霜後味。竹葉酒邊香。坐憶游閩樂。今年始得嘗。

重游大滌洞天

澗水泠泠石髮新。松花香靚翠崖深。雲生不沒仙人跡。丹化猶啼藥禽。洗眼人多求聖水。醒心吾獨愛清吟。杖藜更欲過新洞。無奈春空又作霖。

雪川次鶴田韻

蒼雪雙流合。帆檣萬里通。連山黃獨雪。一鴈白蘋風。酒戶春醅淺。魚村晚市同。舊游蕉鹿外。未老已成翁。

秋思

暑退涼生體氣佳。卷簾聽雨感年華。西風葉葉梧桐冷。開徧庭前白鶴花。

垂虹

四岸俱無只有天。烟檣如雨落鷗前。不知笠澤翁何許。波上清風一萬年。

憶著前遊十四年。三高祠下夕陽船。無錢買得鱸魚鱠。吟就橘花香裏眠。

惠山

石苔滑汰屋連斜。第二泉邊古佛家。一壑松風聽不了。卻畱僧坐自煎茶。

毘陵天慶觀龍

殿陰壁老懷仁筆。頭角崢嶸春起蟄。有時麾斥惠山雲。行雨歸來半身溼。

金山

江身臺殿切空雲。夜月魚龍影不分。八十老僧相引說。潮痕不上郭公墳。以上斗野支乘

翠蛟亭呈孫元素鍊師二首

道人鎖蛟天柱半。客來縱蛟作奇觀。飛風動地輻晴雷。雄拏怒攫石欲開。明珠萬斛撒成雨。忽趁流雲入銀浦。仙田種玉耕春烟。潤流九里無凶年。問蛟飛去何時還。道人仰笑意自閑。月中攜手聽潺湲。

剡剡星虹白日寒。山香一曲落雲端。乘蚪道士排空去。怒雨聲搖碧玉巒。洞霄詩集

劉霆午

霆午清江人。

題梅仙壇

吏隱清風幾百年。長松脩竹滿壇前。漢皇若聽三書諫。未必先生便肯仙。梅仙事實

張弋

弋字彥發河陽人有秋江烟草

丁晦夫跋張君彥發湖海豪士不喜爲舉子業專意於詩每以買鳥爲法所著僅成帙清深閑雅宛有唐人風致舊名奕字韓伯世爲孟之河陽人貴耳集張韓伯名弋又名奕頤然而長面帶燕趙色口中亦作北語許定夫館于麾下欲命官不受後死

于建業定夫葬之蔣山下

題曰大宋詩人張奕墓

春晚

萬事今吾飛絮輕此身如燕又巢成
暗思庾信家邊竹綠籜新添有幾莖

楚州

落帆停鼓鶴湖頭兩度因循到楚州
柳下人家曾識面笑求新句寫耒樓

豫章別紫芝

吟苦事俱廢拙深貧未除年來如旅燕
秋至卽移居古道行黃葉空囊貯素書
一生江海恨惟子最知予

子山寺

迢遞前朝寺經過遂一遊白雲鴉樹曉
黃葉鳳臺秋僧舉開山話人消在世愁
殿廊經劫火已費十年修

以上秋江烟草

寄秋塘

五湖風雪分頭去千里淮山信腳行
涉世眞成妄男子談詩長憶老先生
塘邊瓜茹須頻灌郭外田疇粗

可耕莫倚瘦筇吟白髮。浪傳詩句入都城。貴耳集

蕭泰來

泰來字則陽。號小山。臨江人。山則之弟。理宗朝爲御史。附謝丞相。爲右司李伯玉所劾。有小山集。

題梅壇毛慶甫雲悅樓

樓立梅峯最上頭。日隨元氣與沈浮。道心快活雲心似。飛去飛來得自由。梅仙事實

句

官卑豈願乘肥馬。食儉惟知取瘦羊。臘祭謁告作 梅礪詩話

黃靜齋

桃花

雨後桃花作片飛。風前柳絮點人衣。春歸不用怨風雨。無雨無風春亦歸。全芳備祖

張至龍

至龍字季靈。建安人。有雪林刪餘。

宿靈巖

樹杪鐘樓出半層。佛牀黠鼠弄殘燈。五更石上僧猶定。頭滿清霜喚不膺。

齊雲寺

雨疎分點下。略約界橫塘。接竹通生水。褰蘿補壞牆。字塗窗眼黑。香染佛衣黃。未晚螢先出。蕭然兩畫廊。

宿易沖道院

松髮經寒亂不梳。夜來風滅屋茅疎。吟邊凍指僵如鐵。袖裏枯筇畫雪書。

擬韓偓體

一聲阿鵲顛鸞雙。學調新詞未得腔。拜了夜香郎喚睡。旋收鍼線背銀缸。

古別離

扶上花驄酒半醺。望沈鞭影暗消魂。離情恐被行人見。背拂菱花補淚痕。以上雪林刪餘

吳公敏

泊舟

潭影靜沈沈。維舟傍竹林。鄉心寄孤雁。寒信起疎砧。犬吠人家近。燈明樹影侵。客愁元不寐。夜雨更蛩吟。後村千家詩

姚寅

寅號雪坡。派出關西名將後。居湖州東林。

養蠶行

南村老婆頭欲雪。曉傍牆陰採桑葉。我行其野偶見之。試問春蠶何日結。老婆斂手復低眉。未足四眠那得知。自從紙上埽青子。朝夕餵飼如嬰兒。只今上筐十日許。食葉如風響如雨。夜深人靜不敢眠。自遶牀頭逐飢鼠。又聞野祟能相侵。典衣買紙燒蠶神。一家心在陰雨裏。只恐葉溼繰難勻。明朝滿蔴收銀繭。輒

軋車聲快如剪，小姑促湯娘剝紉。嬉嬉始覺雙眉展，縵成白雪不敢閑。錦上織成雙鳳團，天寒尺寸不得著。盡與乃翁輸縣官，君不見長安女兒嫩如水。十指不動衣羅綺，我曹辛苦徒爾耳。依舊績麻冬日裏，吹劍錄

投戴岷隱分教

重席先生閒世才，相逢青眼必須開。手遮紅日汗如雨，不是雪中乘興來。梅壩詩話

劉文晦

種梅

佳人天一方，歲暮音書絕。一枝持贈君，猶帶去年雪。後村千家詩

利登

登字履道號碧澗金川人有散臺

梅川莫令君拉蒼山諸詩友，用予松風首句爲韻。招子游金精，至而盜作，不果游。走佛巖有感。

此行爲山來，至此事已非。雲火四地動，御風誰與期。剝牀漸及膚，欲去迷所之。蒼黃走澗谷，勝遊翻在斯。石梯盤七折，頓豁萬里奇。擁巖千脩篁，中著寒泉飛。天壤有此景，惜哉前不知。逃難乃邂逅，自愧還自悲。山風送萬里，開關知誰爲。亦有如我徒，慷慨來登茲。罹難本因此，不悔乃扳窺。天亦無如何，更供愛日暉。平生江海眼，此志良未癡。忽憶家山遠，寒鳥鳴相依。母子各一方，而皆窘賊圍。欲歸莽無從，痛毒害我衣。

田家

小雨初晴歲事新。一犁江上趁初春。豆畦種罷無人守。縛得黃茅更似人。

癸巳十一月二十五日辭家。雪甚作。愴然有懷。

歲暮游子歸。余始爲行客。朔風萬里長。吹雪犯巾幘。臨行不言苦。不忍母心惻。乾坤迫短景。寒日易傾仄。冰池綠骨巉。凍車瓊網澀。一寒忍已熟。浪出還自責。撫劍睨前岡。雲重楚天黑。

早起見雪

折竹風高曉夢驚。寒鴉一陣噪冬青。起來檐外無行處。昨夜三更猶有星。以上破藥

張澹川

寒食

江城吹笛晚風斜。城郭人稀噪亂鴉。火冷烟青寒食過。家家門巷掃桐花。後村千家詩

馬子嚴

子嚴字莊父。號古洲。建安人。

烏林行

荊州兒曹不足恃。何物老瞞欺一世。兵書浪語十三篇。不料烏林出奇計。隆準雲孫驅伏龍。紫髯強援要。江東戈船植羽蔽。寒日雪浪崩崖驚。晚風行閒一卒如兒戲。持火絕江人不意。灰銷漢賊終老心。功入喬。冢少年培。君不見華容道傍春草生。魂銷不聽車馬聲。哀援夜啼霜月冷。空餘野燐沙邊明。

詩人玉屑。此詩辭意精深，不減張王樂府。陪世無知者，錄遺後人共評之。

宋伯仁

伯仁字器之，茗川人。有雪巖集、馬塍藁。

戲作

青梅黃盡雨無多，柳影重重午日過。忽聽隔籬人語笑，採蓮船子上新河。

寓西馬塍

嘉熙丁酉五月寓京，遭熱僑居西馬塍。

十畝荒林屋數間，門通小艇水彎環。人行遠路多嫌僻，我得安居卻稱閑。尊酒相忘霜後菊，一時難盡雨中山。何年脫下浮名事，只與田翁賸往還。

羊角埂晚行

葛芻蒲履帽烏紗，迤邐乘涼到水涯。數寺晚鐘聲未歇，滿身涼月看荷花。以上馬塍藁

秋晚

西風吹破墨貂裘，多少江山惜倦游。紅葉已霜天欲鴈，綠蓑初雨客吟秋。後村千家詩

魏慶之

慶之字醇父，號菊莊，建安人。與玉林黃昇友善，有詩人玉屑。

過玉林

一步離家是出塵。幾重山色幾重雲。沙溪清淺橋邊路。折得梅花又見君。梅壩詩話

張廣漢

宿梅仙壇

夜宿梅壇境。山寒萬籟空。無才供吏隱。有夢憶仙翁。石齒含殘雪。松髯奮急風。竈烟如可舐。跨鶴問鴻濛。
梅仙事實

徐集孫

集孫字義夫。建安人。有竹所吟臺。

智果寺觀東坡墨蹟參寥泉

羨茗評詩歲月深。堂堂遺像篆烟沈。數閒老屋關興廢。一段清名無古今。碑斷亂雲封字腳。亭荒落葉覆泉心。斜陽影裏夷猶處。仰止高風不敢吟。

水樂洞

路穿巖竇折羊腸。處處亭臺御墨香。流水不隨人事去。尙餘絲竹舊宮商。

重拜和靖先生墓

秋聲爾許悲。懷古若爲思。菊老泉堪薦。山孤草亦萎。高風畱塑鶴。殘雨暗荒碑。依舊梅千樹。無花香似詩。

湖西納涼

小艇撐過第一橋。酌泉橋下擲詩瓢。來遊道院分荷供。擬拉吟僧遣鶴招。暮靄直從漁笛起。月華高過塔

燈遙且於靜處偷清福，人海驚人湧似潮。

玉岑

一抹斜陽挂淺林，細聽山鳥說春心。千年古寺多奇迹，讀了豐碑看玉岑。以上竹所吟藁

徐用亨

用亨括蒼人。

偶作

誰把先生號冷官，令名深媿馥秋蘭。孟公豈是陳驚坐，子夏元非杜小冠。涇渭合流雖若混，雲泥躡絕不相干。寄言世上多風鑑，一笑何妨改眼看。

吹劍錄吾鄉潘元龜授婺州教授鄰

居徐用亨亦呼教授因作詩云云

劉遂初

閣阜山作

春山靈草百花香，誰識仙家日月長。滿院莓苔綠陰市，碁聲何處隔宮牆。詩人玉屑

沈中行

中行號野逸。

游九鎖

青山倚天分九峯。或踞虎豹蟠蛟龍。奔霆白晝鞭玉虹。鐵花冰激青濛濛。中有浩劫元皇宮。彷彿崑閩雙
衡嵩。洞門誰掣烟霞封。玉鼠石燕巢嵌空。列炬仰見仙人蹤。枰碁布子局未終。冥懷欲喚洪崖翁。共翳紫
鳳驂。飛鴻一笑弱水三萬里。他年相見方壺中。洞霄詩集

劉應子

應子號錦山

游九鎖

大滌仙山不易尋。仙人樓閣倚林坰。地環九鎖溪爲路。殿合諸峯石作屏。落日烟嵐呈紫翠。清秋木石寫
丹青。我生素負元龍氣。東望滄溟醉眼醒。洞霄詩集

宋詩紀事卷七十四

錢唐厲鶚輯
海寧陳延賞勘定

吳會

會號北山

訪別嚴儀卿寄郭招甫

言將遠行邁來宿故人家愛爾時相顧回舟日欲斜論心付杯酒別路正梅花不待江湖去今朝鬢已華

詩林萬選

黃君瑞

題草堂寺

草堂禪寺北山陲想見鳴騶入谷時猿鶴如懷海鹽令魚龍猶護紹興碑排巖樹老秋來早上殿僧稀曉
散遲我亦于今抗塵土臨風慙讀孔璋移四川總志

儲泳

泳字文卿號華谷雲間人著華谷祛疑說

題隱者所居

盡日掩柴門。何人得見君。祇因喧寂異。似有聖凡分。瀑近夜疑雨。山深晴亦雲。傳聞九霄翮。落羽正紛紛。
後村千家詩

秋夕懷友

樓高不敢眺。愁思滿滄洲。有夢隔千里。無書過一秋。晴風吹野樹。落日照寒流。客裏添蕭瑟。何時得共游。
詩家鼎鑪

遊東臯園登漣漪閣

傑閣接平川。秋光淡遠烟。窗開園外景。影占水中天。野色歸吟事。征帆過客船。危闌人倚徙。縹緲十洲仙。
至元嘉禾志

潘嶼

嶼四明人。

客中九日

破帽西風急。寒窗敗葉飛。重陽今日是。三徑幾時歸。擔上多黃菊。門前少白衣。吟情澹如水。一雁叫斜暉。
詩家鼎鑪

顏員嶠

古詩

庭梧驚秋風。葉葉凋萎紅。行人何不歸。委魂逐孤鴻。去日良已賒。客身轉飄蓬。千里各一涯。關山月明中。

兩臂恨不羽飛逐君西東 全芳備祖

楊巽齋

巽齋失其名。

牽牛花

青青柔蔓繞脩篁。刷翠成花著處芳。應是折從河鼓手。天孫斜插鬢雲傍。

茉莉

麝腦龍涎韻不侔。薰風移種自南州。誰家浴罷臨妝女。愛把閑花插滿頭。 以上全芳備祖

蔣梅邊

梔子

清淨法身如雪瑩。肯來林下現孤芳。對花六月無炎暑。省爇銅匱幾炷香。 全芳備祖

洪道山

茶蘼

雨後溪流半沒沙。粉牆賣酒是誰家。客中不覺春深淺。開了茶蘼一架花。

一春多雨少晴光。眼底青春去意忙。已恨點衣紅作陣。絕憐滿架雪生香。 全芳備祖

朱正中

正中號力菴。

洛陽橋觀水

點點風帆底處還。似無似有海門山。白鷗卻怕潮頭惡。閑臥汀花野草閒。

梅堯詩話

徐橘隱

秋日

紅蓼黃花取次秋。籬笆處處碧牽牛。風烟入眼俱成趣。祇恨田家歲薄收。

全芳備祖

虞詔

詔號可齋。

絕句

短長亭外柳依依。念我思歸未得歸。粉蝶不知行客恨。也隨飛絮點征衣。

荷花

晚來一棹鑑湖東。隊隊蜂蠻入短篷。一色藕花三十里。淡粧濃抹錦雲中。

以上全芳備祖

周登

登號月窗。

泛舟西湖

湖邊無日欠春風。金碧樓臺面面同。白鳥慣隨船上下。畫橋分斷水西東。百年樂事浮雲外。一段傷心落

照中。老盡風流無問處。藕花。今是幾番紅。

詩林萬選

陳熙

熙號月泉樂清人

病起

病起不知老。山妻笑長卿。一貧眠古屋。多雨落春城。掃案藥香在。開牕樹葉生。因思行樂地。前月是清明。

東甌詩集

江奎

茉莉

靈種傳聞出越裳。何人提挈上蠻航。他年我若修花史。列作人間第一香。

玉簪

雖無艷態驚羣目。幸有清香壓九秋。應是仙娥宴歸去。醉來掉下玉搔頭。

以上全芳備祖

鍾穎

遊九鎖

大滌通華陽。仙家碧雲上。飛泉舞蒼蛟。絕壁浮翠浪。泉石有聲詩。雲烟無盡藏。落日青山多。臨風一長望。

洞霄詩集

翁元廣

漁父

宋詩紀事 卷七十四

一八四九

吳江楓落荻花秋。漁子飄然一葉舟。柔櫓數聲沈晚浦。寒燈幾點泊蒼洲。瀟瀟細雨篷初閉。漠漠輕烟網乍收。何日功名如范蠡。五湖風雨伴沙鷗。後村千家詩

題臨江茶閣

門外黃塵沒馬鞵。溪山對此獨翛然。一杯春露暫留客。兩腋清風幾欲僊。可但喚回槐國夢。不妨更舉趙州禪。凭闌得句未易寫。盡日孤烟白鳥邊。詩林萬選

林逋山

牽牛

圓似流泉碧翦紗。牆頭藤蔓自交加。天孫滴下相思淚。長向秋深結此花。全芳備祖

程、鏗

鏗、鄱陽人。

游大滌洞

松風吹客衣。縹緲凌絕頂。古洞不見日。篝燈入幽暝。蒼苔暈石花。奔泉弄雲影。仙游願初遂。秋山魂未省。我生有宿約。結屋天柱頂。洞霄詩集

彭昌詩

昌詩、號雅林。

游金精山陳千峯索和。

仙去時移境尚同。巖花開落爲誰容。歌沈石鼓泉空響。局冷紋枰霧半封。山上丹桃無核種。甌頭青餽自
機舂。翠眉不是人閒儷。笑殺王孫不再逢。金精風月

徐 觀

觀字庚生永嘉人。

秣陵秋望

諸史六朝事。同爲遠望空。幾年無王氣。今日但西風。客舍秦淮上。行宮夕照中。數株霜後葉。猶傍壞陵紅。
東甌詩集

丁 南

南號鶴林。歸安人居烏墩。

宴沈知丞園

曲徑方塘百畝園。更無煩暑礙風煙。當春庭院花如錦。入夜樓臺月滿天。鄰架插書金屋底。秦箏度曲綠
衣前。主人愛客歸休早。銀燭高烧酒似泉。烏青文獻

陳苒芷

絕句

夢回歷歷雨聲中。窗影分明曉色紅。出戶方知是黃葉。更無一片在梧桐。全芳備祖

程登庸

題唐顯孝饒娥墓

悠悠古憤倚中流。飽閱川陵四百秋。水際叢祠猶昨日。人閒塚土幾荒丘。故鄉愛說饒饒姓。往事空傳柳柳州。滿目夕陽凝睇久。桐花飛落釣魚舟。

饒州府志。饒娥。饒人。饒姓。娥名。父醉漁溺死。娥求屍不得。哭三日。耳鼻流血。氣盡伏死。明

日屍出。黿魚浮死萬數。鄣民葬之。鄣水西橫道上。事詳柳子厚碑記。宋程龔庸詩云。

胡平仲

平仲號虎溪

游金精山

人去壇空幾歷年。塵埃難沒漢山川。竇門深入壺中地。環壁遙開甕外天。致雨土龍如解化。隨時木鶴亦能仙。要知萬劫長生處。古篆惟存石鼓篇。金精風月

黃初菴

遊靈鷲寺

屋畔危岑聳佛青。客歸僧定掩雲扃。洞深窈窕循牆過。几上偷翻貝葉經。咸淳臨安志

董將

題眞如院怪石在鹽官縣

茲山翠成堆。峭骨乃如許。化工妙融結。石罅走青乳。當年女媧氏。煉此不及補。崑崙至于今。丈室枕其股。

我來手摩挲，松陰日亭午。初疑道士羊，亦類將軍虎。坐久肌腸鳴，試作先生煮。咸淳臨安志

黃極

極字舜舉，豐城人。

秋日渡江

雁落平沙一雨收，淡烟斜日荻花洲。憑誰與作王摩詰，爲寫江南水墨秋。南昌府志

林季謙

客中立春

鬢絲無力受風幡，把酒聽歌意不歡。千里同風亦同俗，客懷終作異鄉看。

春寒

悄零數竹綠脩脩，春半餘寒苦似秋。故紙叢中雙倦眼，樵青催喚酪蒼頭。

元夕

燒燈城市又新年，璧月樓臺萬管弦。獨有廣文窮相眼，一篝燈火照殘編。

扇

分無紅粉轉歌喉，入手輕紈意自秋。不見乘鸞月邊女，一雙胡蝶自風流。以上後村千家詩

林稹

稹號丹山。

冷泉

一泓清可浸詩脾。冷暖年來只自知。流向西湖載歌舞。回頭不是在山時。武林舊事

林逢子

逢子字德遇。見劉後村送赴省諸友詩。

鏡香亭

綠楊深處兩三家。幾度凭闌聽吠蛙。雲錦已空煙水闊。空教人憶舊時花。嘉興府志補

上官辰

辰號古尉。

游大滌山

山蟠鼇足雲千丈。溪折羊腸路九迴。神骨肯穿秦斧鑿。古壇曾見漢樓臺。秋山風雨銀河下。月夜笙簫玉佩來。山自青青泉自潔。百年蹤跡幾蒼苔。洞霄詩集

趙穀

穀字成德。休寧人。三請漕貢。試南宮不利。遂隱居。徜徉池園以自娛。號其詩文曰吟嘯。

白杜鵑花

雲樹重重和淚冷。故宮遺廟有知音。秦吳萬里皆芳草。染到山花恨最深。廣羣芳譜

趙克非

克非字志仁永嘉人號荷畔老漁又號尋樂翁

上冢

步入巾峯去冥濛一徑深重泉千古恨寸草百年心
花發空林色嵐生古壁陰徘徊歸向夜薄露溼衣襟

東甌詩集

俞煜

煜號省齋餘杭人

游大滌山

萬山低伏天柱起鬱鬱琳宮鎖幽邃泉聲瀉入松風寒
山光滴破雲根翠仙人不歸白日暮箸下還丹已
千歲天高遼鶴不可呼夢魂夜落青山外

洞霄詩集

倪龍輔

龍輔字魯玉號梅村

宮怨

翠袖無香鏡有塵一枝紅瘦不藏春十年不識君王面始信嬋娟解誤人

詩林萬選

陳月潭

桃花

雙槳春風款款移斜陽平半落芳池不妨暫向橋邊駐更爲桃花了一詩

全芳備祖

雷震

村晚

草滿寒塘水滿陂。山銜落日浸寒漪。牧童歸去橫牛背。短笛無腔信口吹。宋蘇圃集

洪漸

漸字陸翁。號菰巖。淳安人。

舟泊港口

月浸蘆花水浸天。漁翁醉後正堪眠。夜深何處孤猿咽。不管江邊有客船。青溪詩集

施真卿

西湖

一曲新腔紫玉簫。護晴簾幙窄蘭橈。柳迷遠近花張錦。小泊危紅第六橋。後村千家詩

鍾說

題梅壇

萬松護嶺與天齊。中有真人舊隱棲。井冷尚畱丹汞暖。壇高近拜斗星低。回思漢室成惆悵。浪費今人爲品題。我欲從之無路去。同昇不似許仙雞。梅仙事實

林楚良

題黃氏小園

多少名園錢整地。金鈴撼雀護千花。君家無此豪華事。七尺慈孫導母車。詩人玉屑

陳庚生

庚生樂清人。善畫。

賀家湖

風流誰似賀知章。乞得平湖任草荒。今日藕花三百畝。折來依舊屬君王。東甌詩集

程嘉量

題温州江心寺

東西兩寺絕塵囂。齋飯全憑早晚潮。解事江流更分斷。爲君題作小金焦。江心寺志

高彥竹

彥竹號野泉。永嘉人。

送胡彥龍過金陵

金陵往事已成虛。江水清清只見魚。遺廟空存元帝像。故家多有二王書。秋風出塞調生馬。夜月吟淮跨蹇驢。借問新亭諸老淚。而今煙景復何如。東甌詩集

宋詩紀事卷七十五

錢唐厲鶚輯
吳毛德基勘定

文及翁

及翁字時學號本心綿州人登進士第歷官參知政事

和賈魏公大雪遺潛安撫侍郎

身遊廊廡意山林六出花開一片心平地尺書叨載史瞻天玓賀齒諸任屢豐歲事嘗如昔太素風光直
到今收斂神功放晴景白河半夜埽層陰咸淳臨安志

山中夜坐

悠悠天地閒草木獻奇怪投老一蒲團山中大自在天地閒集

陳存

存咸淳中官侍郎

和太師平章魏國賈公大雪遺潛侍郎之作

先臘催開萬玉林人心悅處即天心山河洞徹重瞳遠宮闕高寒一柱任瑞應崆峒知有日塵清洞曲在
斯今神功變化無畱迹便放陽春捲積陰淳咸臨安志

曹元發

元發咸淳開官侍郎。

和太師平章魏國賈公大雪遺潛侍郎

乾坤滿眼盡琪林。擊玉詩傳魏國心。寫琰已增天府重。掌冰匪媿地官任。三千界內清無際。數十年來瑞獨今。喜雪未幾還喜雨。老農歌舞愛春陰。咸淳臨安志

曹 蘧

蘧字擇可。號松山。御前應制。又爲賈師憲之客。

寄豫章詩社諸君子

向來心事劍能知。曾結仙人汗漫期。南浦看花春載酒。西園刻燭夜吟詩。淒涼風月隨殘夢。零落江湖似斷基。千里洪崖秋水隔。暮雲無處說相思。詩林萬選

南徐懷古呈吳履齋

匹馬來逢塞草秋。淮雲一片隔神州。黃昏燈火西津渡。白晝風烟北固樓。猶有斷碑知晉宋。誰將遺石問孫劉。天荒地老英雄盡。落日長江萬古愁。詩家鼎鑿

何夢桂

夢桂字巖叟。初名應祈。字申甫。巖之淳安人。咸淳乙丑。廷對第三人。授台州軍事判官。歷仕至大理寺大卿。引疾去。至元累徵不起。築室小酉源。有潛齋集。

擬古

杞國天柱傾。哀我鞠子疚。蒼鵝飛冲天。妖星大如斗。簾下玉牀移。山摧失鼈負。河南弔遺黎。原野骨未朽。北邙望孤陵。古木叫猿狖。湖風吹塵沙。天寒薄翠袖。南雲山萬重。去去莫回首。

寄王南叟

歌盡驪駒落日寒。相思無處問平安。客愁白髮三千丈。世路青泥百八盤。夜月梅花頻入夢。秋風菰米強加餐。高山如故絲弦在。懶向旁人取次彈。

哭橋陵

百年弓劍入橋陵。豈料三泉化劫塵。空有魚燈照荒土。忍將玉軸問遺民。蒼梧日落啼丹雀。金粟雲深臥石麟。寒食家家上冢家。六宗孟飯屬何人。

弔維揚瓊花

雙鶴揚州問故家。一樽后土弔瓊花。人間驚破霓裳舞。天上徵回玉女車。死彙記曾霑雨露。落英誓不汚泥沙。後庭玉樹今誰主。猶得臺城葬麗華。

己卯春過西湖和諸公

白髮星星紗帽烏。怕隨年少過西湖。清明上冢行人少。寒食開門宮使無。半世行藏隨杖屨。百年悲樂寄樽壺。歸來第五橋邊路。半樹殘陽噪畢逋。

題川無竭寄傲窗

南山有路滑如苔。多少人從半嶺回。不是老僧空傲世。世人自不上山來。以上潛齋集

贈畱中齋歸

昆明灰劫化塵縑。夢覺功名黍一炊。鍾子未甘南操改。庾公空作北朝悲。歸來眼底吳山在。別後心期浙水知。白髮門生羞未死。青衫畱得裹遺尸。

庶齋老學叢談。何探花夢桂。畱中齋知舉日。

及第畱歸贈詩云。按畱夢炎。宋大魁降元。

黃公紹

公紹字直翁。邵武人。咸淳元年進士。隱居樵溪。有在軒集。

競渡權歌

望湖天。望湖天。綠楊深處鼓鬚鬚。好是年年三二月。湖邊日日看划船。
鬪輕橈。鬪輕橈。雪中花卷權聲搖。天與玻璃三萬頃。儘教看得幾吳兒。
權如飛。權如飛。水中萬鼓起潛螭。最是玉蓮堂上好。躍來奪錦看吳兒。
建雲旂。建雲旂。土風到處總相猶。朝了霍山朝岳帝。十分打扮是杭州。
踞青青。踞青青。西冷橋畔草連汀。撲得龍船兒一對。畫欄倚徧看遊人。在軒集

夢梁錄。二月初八日。錢塘門外霍山路。有神曰祠山真君誕聖之辰。其日龍舟六隻。戲于湖中。其舟俱裝十太尉七聖二郎神。神鬼俱行。龍體。匾子黃胖。雖以鮮色旗傘花籃。鬧竿鼓吹之類。其餘皆替大花捲。腳帽子。紅綠戲衫。執棹行舟。帥守出城。往一

清堂彈壓，令立標竿于湖中，挂錦綵銀桅，官楫有一小節，綴黃衫，頂青巾，戴大花，插孔雀尾，乘小舟抵湖堂，構笛杖聲，取指揮，以舟回朝，談龍舟小綵旗，招之俱鳴，鑼擊鼓分兩勢，划棹旋轉，遠列成行，再以旗招之，龍舟並進者二，又以旗招之，其龍舟遠列成行，而先進者，得捷取標賞，聲啞而退，餘者以錢酒支槁也。

史蒙卿

蒙卿，字景正，鄞人，司封郎中彌鞏之孫，咸淳元年進士，江陰軍教授，宋亡不仕，自號靜清處士。

感事

宮花攢曉日，仙鶴下雲端，自是傷心極，那能著眼看，風沙兩宮恨，烟草八陵寒，一掬孤臣淚，秋霖對不乾。

有感

途窮那免哭，哭罷一高歌，白日催年急，青山閱世多，浮生從潦倒，遺恨不消磨，何許南來雁，殷勤掠暝過。

以上吳禮部詩話

史唐卿

唐卿，與兄蒙卿同登咸淳元年進士。

鳳鳴洞

何年雷斧鑿山裂，千尺蒼崖瀉飛雪，青天半夜玉簫寒，喚醒幽人弄明月，甬上耆舊集

汪宗臣

宗臣字公輔婺源人咸淳二年兩中亞選入元不仕有紫巖集

稼稿

稼稿病多雨蕪菁種待晴壘空驚燕去池淨襯鷗明野碓鳴秋杵風簷響夜箏山中涼意早蚊蚋已無聲

十一月宿於潛

蜂迷蜜甕虬絲香蟻泛花甃碧玉漿縣僻人稀寒日晚古松樛翠出危墻以上新安文獻志

范師孔

師孔字學大崇安人咸淳丁卯恩薦充講書有畫餅橐

高樓

高樓高登天美人美如玉美人坐高樓更彈天上曲飛聲落人間誰不注耳目安知妾此心長恐晝夜促
莫羨高樓高莫羨美女美樓頭瞻明月樓下看流水月明圓易缺水流去如駛獨愛山中蘭幽香抱枝死

武夷山

幾與溪山絕世緣重來猿鳥只依然懸崖野瀑飄成雪近午嵐霏暗盡天水尙未疏須識禹山如深入定
逢仙洞中石鼎烹雲處此夜還來借榻眠以上四朝詩

鮑壽孫

壽孫字子壽新安人咸淳丁卯領江東漕舉

句

我無孤雁句，君有倚樓詩。一樽浮大白，千里策飛黃。但喜親庭健，何悲客路長。少日從游今老矣，殘冬話別各凄然。方回桐江集

陳文龍

文龍，字志忠，一字君貴，興化軍人。咸淳四年，廷對第一，累遷參知政事。元兵至杭，文龍乞歸養，益王立于福州，復拜參知政事，充閩廣宣撫使，即興化軍開闢。元兵攻城，通判曹澄孫降，俘至杭，餓死，訃聞行朝，諡忠肅。

三柳軒雜識：陳文龍，度宗朝狀元也。德祐末，歸守本州。北兵入閩，不屈，生縛之。至杭，病卒于杭之貓兒橋巷。初，文龍入太學，累試不利，太學守土之神岳侯也。一夕，夢神請交代，意必老死于太學，常悒悒不樂。既而赴廷對第一，仕宦日顯，前夢不復記矣。及守鄉州，又夢神通書，閱書前面曰：交代。後書年月至元，心甚慢之。未幾，國亡，城陷，家殘身俘，至杭，幽于太學之側。

元兵俘至合沙詩寄仲子

斗壘孤危勢不支，書生守志定難移。自經溝瀆非吾事，臣死封疆是此時。須信繫囚堪擊鼓，未聞烈士樹降旗。一門百指淪胥盡，唯有丹衷天地知。興化府志

李 瓘

瓘，興化軍人，咸淳戊辰進士。

挂冠詩

宋詩紀事 卷七十五

人言學古思入官。我謂學易而官難。平生透出夢覺關。本來面目只儒酸。吾親不俟若爲權。不如歸去臥林閒。殿前三策罄忠肝。多謝皇恩天地寬。戲衫卸了白衣還。扁舟飛過子陵灘。前修亦有逋與搏。聖世許之俱寬閑。何物種放太厚顏。山鬼移文伐其姦。此行無復出閩山。休音息影谷之盤。今朝醞酒酌零壇。便向錢塘門挂冠。

古杭雜記詩集。度宗戊辰龍飛。狀元興化陳文龍。同郡李璣。太學貫道齋。上舍係第三甲。正奏名于唱名之後。乞以本身官致仕。恩例盡以回贈父母。上書畢辭先聖及三魁同舍。出錢唐門。脫綠袍。挂于門之上。泛舟而去。時三魁同舍皆送別。璣有詩云。

董潮

潮彭澤人。咸淳進士。官工部尚書。

小孤山

長江萬里來。一砥中流峙。巨浸沒根深。孤峯插漢起。倒回三峽流。獨據九江水。真是海門關。波濤險莫比。
西江詩話

汪薦

薦一名韶。字東美。黟人。咸淳四年進士。

濱雅

布衣不嫁不歸。巧婦無褐無衣。提壺不可挹酒。絡緯匪來買絲。後村題跋

句

秋風駝臥棘。春雨燕巢林。

後村題跋。汪君此句。

感時傷事。有足悲感。

胡次焱

次焱。字濟鼎。號梅巖。婺源人。咸淳四年進士。授湖口縣主簿。改貴池縣尉。德祐乙亥。微服歸。教授鄉里以終。

媒問媵

媒問媵。汝何傷。汝爲國秀時。辛苦事蠶桑。憫瑟順爲正。婉婉禮自將。笥中有練帶。衣上無明璫。貧女古難嫁。賣犬辦資裝。中年得夫壻。憧憧拜姑嫜。肅容采蘋藻。洗手供羹湯。良人正少年。相期家道昌。良緣天所妒。夫壻奄云亡。自從夫壻亡。十年守空房。素帷代錦幃。苦席易牙牀。孤眠耿夜半。單立黯昏黃。熒熒影徘徊。鞅鞅情彷徨。皓月照孤衾。暴雨頽垣牆。獨寐誰呼喚。獨語誰交相。如凌空失翼。如涉川無梁。媵來吾語汝。琴瑟貴更張。汝篋旣單薄。汝門復淒涼。汝寒何以衣。汝飢何以糧。紡績終難給。春汲勞欲僵。死者不復起。生者宜自詳。鄰有美丈夫。顛顛更昂昂。牛羊量用谷。金玉堆滿堂。畫梁青瑣闥。珠簾耀瑜珈。珮戶金彈丸。寶鞍青絲韁。旌旗明晚霞。劍戟磨秋霜。奴隸厭綺紈。犬貓棄餼餽。門下粲珠履。庭前沸笙簧。出則專城居。入則侍明光。一呼千夫諾。一指萬夫張。一笑生羽翼。一怒起鋒芒。吾慕者蹇脩。與汝解佩纒。以此窈窕

婦配彼駟儂郎。花樹戲蛟螭。蓬浦浴鴛鴦。無煩賦藕花。且喜華枯楊。何妨鸞舞鏡。應被鳳求凰。人無百歲人。倏忽如風狂。莫將泡影身。徒置冰炭腸。死後畱名節。身朽魂茫茫。生前受富貴。志得意洋洋。人生行樂爾。二者試裁量。蔬食不日給。孰與飫膏粱。荆釵不自謀。孰與雲霞裳。年滔滔不反。貌駸駸已蒼。敗某須換局。作戲且逢場。文君慕相如。恢女喚江郎。有髮可重結。有耳何自狀。試問東夷子。何如聲伯孃。信書不如無。未必有共姜。鬼妻變人婦。母作老死孀。

嫠荅媒

嫠荅媒。妾自憐。妾家貧如洗。妾貌妝不妍。中年方擇配。幸逢夫壻賢。藍橋凝仙會。紅葉開良緣。俯以奉箕帚。仰焉供豆籩。粵從定六禮。穩圖偕百年。渠疑有家願。條羅中道捐。城崩哭呦呦。竹斑淚濺濺。空房照明月。幽隴凄寒煙。禽鳥喧墓門。魄降魂翩翩。蟬蟻滿窗戶。心結目涓涓。寮室昔華屋。埋玉今荒阡。恨不卽同穴。何忍續斷弦。翻思合卺初。參透老婆禪。如魚水游泳。如蔦蘿纏綿。奈何死生闊。泛泛水中船。綢繆爲夫婦。反覆如市廛。徒貽陽華醜。寧免柳絮顛。妾頗親筆硯。亦嘗閱簡編。女不踐二庭。婦不再移天。陶嬰寡鵠吟。衛妻孤燕篇。或刑耳自誓。或斷髮自全。或劓鼻假塞。或毀面連連。吾足幸可刖。吾臂不可牽。卓卓節操立。表表鳳孤鶩。藐茲未亡人。有意奉周全。媒雖憫妾寡。媒適重妾愆。妾命春葉薄。妾心頑石堅。栖栖謀尺布。豈不羨鬪甌。皇皇圖斗粟。豈不思董殖。眠手任吞汲。孰與奴婢千。鞠躬踰衡茅。孰與疏綺便。枯荻欣回春。缺月喜再圓。世誰不此樂。妾意獨不然。理義自有閑。物欲常無厭。三少穢難洗。五稼醜莫鐫。浮榮譬似電。遺臭流如川。媒言頗喋喋。媒意遽拳拳。之死矢靡他。斯言當眞詮。文姬殊妖媚。易安亦嬋娟。失身再事

人形管無取焉。節義日以頽。文章何足誇。王母有差事。青鳥信頻傳。毋乃墮人慾。反以汙天仙。婦嬖豈不嫁。空抱老金蟾。所以廣寒宮。萬古清鑒懸。寧貧任勞漉。寧賤受磨研。寧凍如寒蠅。寧餓如飢鷺。終不以快樂而易此憂煎。井底水不汲。山頭石不遷。再拜謝媒妁。歸來雙淚漣。什襲藏破鏡。他年會黃泉。

新安文獻志。右鑿媒答問。宋鄉先生胡公次焱濟鼎之所作也。先生登宋咸淳四年第。授迪功郎。江州湖口縣主簿。以母老。改授池州貴池尉。德祐乙亥。天兵將至池州。都統制張林潛納款。請以城降。先生奉母亡歸。教授鄉里。或勸之仕。先生賦是詩以見意。大德十年。以壽終于家。後三十二年。復爲至元之三年。文自黃竹入郡。其孫師中適在郡中。出是詩。俾文書之。嗚呼。讀柳子河間傳。知邪之得以取正。讀先生是詩。知正之所以勝邪。天理之在人心。猶日月之在天也。可以缺蝕。而不可以喪其光明。若先生之心。孰得而缺蝕之哉。雖與日月爭光可也。鄉後學程文謹記。

梁棟

棟字隆吉。其先湘州人。後遷居鎮江。登咸淳四年進士。選寶應簿。調錢塘仁和尉。宋亡。弟柱。字中砥。入茅山。從老氏學。棟往依焉。乙巳。無疾卒。有梁隆吉詩鈔。

四禽言

脫卻布袴。貧家能有幾尺布。寒機翦盡無可裁。可人不來廉叔度。脫卻布袴。不如歸去。錦官宮殿迷烟樹。天津橋上兩三聲。叫破中原無住處。不如歸去。提葫蘆。今年酒賤頻頻沽。衆人皆醉我亦醉。哀哉誰問醒三閭。提葫蘆。行不得也哥哥。湖南湖北秋水多。九疑山前叫虞舜。奈此乾坤無路何。行不得也哥哥。

山房隨筆云寓意甚遠諸作不及

金陵廢宮

六代俄然又一唐。青山坐閱幾興亡。心知江左非王業。口說中原是帝鄉。落日有時登北固。春風吹夢過錢唐。荆墳檜宅依然在。畱與烏衣話短長。

金陵三遷有感

憔悴城南短李紳。多情烏帽染黃塵。讀書不了平生事。閱世空存後死身。落日江山宜喚酒。西風天地正愁人。任他蜂蝶黃花老。明月園林是小春。

送李北山歸建康

人生無百年。胡爲在遠道。遊子歸故鄉。王孫怨芳草。有田歸去來。無田歸亦好。以上梁隆吉詩鈔

登大茅峯

杖藜絕頂窮追尋。青山世路爭嘔歔。碧雲遮斷天外眼。春風吹老人閒心。大君上天寶劍化。小龍入海明珠沈。無人更守元帝鼎。有客欲問秦皇金。巔崖誰念受辛苦。古洞未易潛幽深。神光不破幽暗惱。山鬼空作離騷吟。我來俯仰一慷慨。山川良昔人民今。安得長松撐日月。華陽世界收層陰。長嘯一聲下山去。草木爲我畱清音。至正金陵新志

至正直記遺編宋末士人梁隆吉有詩名以其弟中砥柱爲黃冠師三茅山嘗往還一日登大茅峯題壁賦長句有黃冠訴于句容縣以爲訕謗朝廷行省聞之都省收梁于獄禮部免罪放還嘗觀其詩集云云其意亦可悲矣

哀毘陵德祐元年元兵攻常州城破知州事姚青統制王安節等死之

荆溪水腥泊船早落日無人行古道
觸髅有眼不識春東風吹出青青草
荒基猶認是人家敗柵曾將當
城堡當時壓境兵百萬不脫鞬尖堪蹴倒
短兵相接逾四旬毒手尊拳日攻討
內儲外援兩消沈一縷人心堅自保
孤臣守土輕性命赤子效死塗肝腦
朝廷有爵媿降附幽壤無恩澤
枯槁願箋司命錄英雄收拾忠魂界穹昊毘陵忠義錄

送存書記

一聲兩聲松子落一片兩片楓葉飛
夕陽在山新月上道人相伴一僧歸清河書畫舫

句

千枝守紅死一點反魂啼雪中見山茶
癡兒嬌勿啼不久當澄霽暴雨家貧忽暴富
菜種一十七癡兒不解事問我何從得
於義苟有違吾寧飢不食賦蔬至正直記遺編

莫崙

崙字子山號兩山江都人寓家丹徒咸淳四年進士入元不仕

癸辛雜識梁棟隆吉鎮江人登第授尉與莫子山甚稔一日有客訪子山爾飲偶不及棟棟憾之遂告子山作詩有譏訕語官捕子山入獄久之得脫而歸未幾病死余挽之詩云癸邸獄成杯酒裏烏臺禍起一詩聞紀其實也

馮困靜語。莫子山。暇日山行過一寺。頗有泉石之勝。因誦唐人絕句以快喜之云。終日昏昏醉夢間。忽聞春盡強登山。因過竹院逢僧話。又得浮生半日閑。及叩其主僧。庸僧也。與語略不相入。屢欲舍去。僧意以爲檀施。苛留作午供。鬱鬱久之。殆不自堪。

因索筆。以前語錯綜其詞。書于壁曰。又得浮生半日閑。忽聞春盡強登山。因過竹院逢僧話。終日昏昏醉夢間。

傷丁氏故基。題一絕于太虛堂。

疎雨斑斑灑葉舟。前山喚客作清游。芳華消歇春歸後。野草荒田一片愁。山房隨筆

張鎮孫

鎮孫字鼎卿。南海人。咸淳七年進士第一。通判婺州。

謝恩詩

當宁宵衣務得賢。草茅何足副詳延。天人要語垂清問。仁敬陳言上奏篇。媿乏謀猷裨乙覽。忽驚姓字首臚傳。乾坤大德知難報。誓秉孤忠鐵石堅。雙槐歲鈔

林一龍

一龍字景雲。永嘉人。咸淳辛未進士。官至史館檢閱。時稱爲石室先生。

山中夜坐

寒灘遠。嘶月遺響到巖壁。悠悠千古心。悄悄一卷易。燈微夜氣分。星冷山露滴。危坐獨何爲。人間睡方黑。十四夜。觀月。張氏樓。

只隔中秋一夕閒。蟾光應未少清寒。時人不會盈虛意。不到團圓不肯看。以上東甌詩集

厲元吉

元吉字无咎。號半村。餘姚人。咸淳辛未進士。仕爲烏程尉。德祐末歸隱從山。至元中訪求前宋故臣。元吉遯跡湖海。白首始歸。有半村集。

黃宗羲云。半村出尉烏程。謝疊山送之詩云。十二街頭三尺雪。駿馬健行如跛躄。生懷故人厲半村。拂袖前行何勇決。疊山居士強欲吟。凍筆如椎硯欲裂。京國青衫十載交。欲言不言情哽咽。願君勿作繞指柔。願君勿作在鑛鐵。甘雨幽遐冤草薺。清風宇宙貪泉竭。循良寧困聖明時。玉燭光華待調燮。疊山詩文零落無幾。余從厲氏子孫。見其墨跡如新。

雨過

漠漠輕雲過野牆。新楓矮柏色蒼蒼。平田鶴迹畱殘雨。深塢鷓聲帶夕陽。

句

免冠思脫三塗難。吐舌甘從五鼎烹。吐鐵。以上姚江逸詩。

趙潛

潛字元晉。號冰壺。忠靖公葵之子。咸淳中沿江制置使。知建寧府。北兵至。其弟淮被執。死于瓜洲。潛自京口遷金陵。棄家南徙不返。死葬海旁山上。

焦山

丹石無光古刹存。蘆沙漁鼓□朝昏。江淮門戶天分合。日月軒窗海吐吞。沙足半沈曾瘞鶴。雲腰中斷□呼猿。丁寧爲我畱佳處。茅屋三閒護竹根。

焦山刻石云。頑石爲山。出色冰壺。欲援東坡故事。爲我佳處畱茅菴。因說偈言。請師作證。咸淳壬申九月。

林景怡

景怡字德和。號曉山。温州平陽人。霽山之兄。

曉起

天雞弄喔咿。殘星在斜漢。整衣出幽扉。山城漏初斷。微微水風生。冉冉田露散。此時遊葛天。淡然空百羨。海上寒梢漸識梅花面。天地閒集

林景熙

景熙字德陽。號霽山。温州平陽人。咸淳辛未上舍。釋褐授泉州教授。歷禮部架閣。轉從政郎。宋亡不出。與王脩竹鄭樸翁胡天放輩尋歲晏之盟。往來吳越。庚戌卒于家。有白石樵唱。

徐沁金華游錄注云。楊璉真伽發陵事。諸書紀載歲月不同。按元史。世祖至元二十一年九月丙申。以江南總攝楊璉真伽發。宋陵家所收金銀寶器修天衣寺。又按宋文憲書穆陵遺骸事。及丘文莊續資治通鑑。皆云至元二十一年甲申。僧嗣占妙高。

上言欲毀宋會稽諸陵。江南總統楊璉真伽與丞相桑哥表裏爲奸。明年乙酉正月。奏請如三僧言。蓋其謀始于甲申。而成于乙酉。與周草窗密癸辛雜識年月正同。是時會稽唐玉潛珪。永嘉林景熙德陽。鄭宗仁樸翁。與臯羽。咸主王監簿家。協謀收掩。

陵骨故別玉潛作冬青樹引以紀其事而景熙答皇羽詩亦有夜夢繞句越落日冬青枝豈非諸公共事之明證乎彭山季本以皇羽引中有白衣種年星在尾之句謂與羅雲溪有開唐義士傳歲次戊寅之說相合善乎彭璋解之曰星在尾者寅月也此卽乙酉

正月耳

鷓鴣案鄭明德蓬昌雜錄云當發陵時林景熙故爲丐者背竹籬挾竹夾遇物夾投籬中潛鑄金牌繫腰間賄西僧求得高孝兩陵骨貯函葬東嘉故夢中作詩有雙匣親傳竺國經之句六陵遺骨癸辛雜識較耕錄俱云葬蘭亭若云高孝兩陵林攜葬東嘉則詩中所云水到蘭亭轉嗚咽不知真帖落誰家又何謂耶當以周草窗陶南村所紀爲是而景熙則共事之人也夢中詩係唐玉潛作云景熙作者非

商婦吟寓思君之意

良人滄海上孤帆渺何之十年音信隔安否不得知長憶相送處缺月隨我歸月缺有圓夜人去無回期回期儻終有白首寧怨遲寒蛩苦相弔青燈鑿孤幃妾身不出幃妾夢萬里馳

鄭宗仁會宿山中

宗仁樸翁也號初心平陽焦下人太學釋褐出身仕至國子學正

挑燈懷舊夢移席近春泉共話忽深夜相看非少年斗垂天末樹燐出雨餘田亦有茅簷下飯牛人未眠

獨夜

客鬢雙蓬老拾遺一燈明滅酒醒時百年回首忽成夢萬竅有聲皆是詩殘夜月枝烏未穩故鄉水草雁多飢袂衣初試新霜冷欲折黃花寄所思

寄林編修名千之字能一平陽人

大雅凋零尙此翁醉鄉一笑寄無功衣冠洛社浮雲散弓劍橋山落照空東魯有詩藏古壁西湖無樹挽

春風巾車莫過青華北。城角吹愁送暮鴻。

曉意

僧鐘覺曙鳥紛飛弄林光。宿雲漸離石。我起開秋房。南山忽入几。相對各老蒼。我老幾何年。山曾見鴻荒。流泉送日月。危石支興亡。問山山無言。啼猿起前岡。

秋夜

片月相隨過竹居。風生荷葉酒醒初。窗扉半掩秋蟲急。猶有殘燈守故書。

新春

衰顏憑酒潤。故國得春新。兵革兒童長。風霜天地仁。草心懸落日。柳眼看行人。擾擾紅塵者。知誰效角巾。

荅鄭卽翁

初陽蒙霧出林遲。貧病雖兼氣不衰。老愛歸田追靖節。狂思入海訪安期。春風門巷楊花後。舊國山河杜宇時。一種閑愁無著處。酒醒重讀寄來詩。

山窗新糊有故朝封事藁。閱之有感。

偶伴孤雲宿嶺東。四山欲雪地爐紅。何人一紙防秋疏。卻與山窗障北風。

酬謝臯父見寄

入山采芝薇。豺虎據我工。入海尋蓬萊。鯨鯢掀我舟。山海兩有礙。獨立凝遠愁。美人渺天西。瑤音寄青羽。自言招客星。寒川釣煙雨。風雅一手提。學士屢滿戶。行行古臺上。仰天哭所思。餘哀散林木。此意誰能知。

夜夢繞句越。落日冬青枝。

重過虎林

虎林山在錢唐舊治北半里亦曰武林今爲縣稱

漠漠江湖夢。蕭蕭禾黍秋。清笳吹落日。白髮過西州。池澗神龍逝。山空老鳳愁。唯餘關外水。寂寞自東流。

故宮

驚風吹雨過。歷歷大槐蹤。王氣銷南渡。僧坊聚北宗。烟深凝碧樹。草沒景陽鐘。愁見花顚月。荒秋咽亂蛩。

飛來峯

在武林

何年移竺國。秀色發稜層。清極不知夏。虛中欲悟僧。樹幽嵐氣重。泉落乳花凝。猶憶烹茶處。閑來語葛藤。

京口月夕書懷

山風吹酒醒。秋入夜燈涼。萬事已華髮。百年多異鄉。遠城江氣白。高樹月痕蒼。忽憶凭樓處。淮天雁叫霜。

宋武帝居今爲壽正寺

青衣夢破滿林烟。一擲乾坤亦偶然。僧屋翠微看月上。江山猶似永初年。

石翁嫗

在丹陽

東艾楚俗愚。鑄金秦民怖。何年斲雲根。偶立此翁嫗。千春衣莓苔。偕老食風露。世人輕結髮。覆水或日暮。乃習無情緣。永與天壤固。停舟一訪古。久欲祛此銅。父老向我言。曾是梁朝慕。衣冠化黃土。古正亦成路。當年殉金棺。茲物獨如故。閱世如過客。興亡了不悟。時借牛礪角。敲火戲童豎。

立春郊行次唐王潛

越州人

道人清事飯溪蔬。無酒閑愁已破除。五夜雪聲梅角底。一春烟景竹筇初。園林芳信愁醒蛙。田野豐年入夢魚。冰下流泉清老耳。東風先已到郊居。

夢回

夢回荒館月籠秋。何處砧聲喚客愁。深夜無風蓮葉響。水寒更有未眠鷗。

冬青花

冬青一名女貞木。一名萬年枝。漢宮嘗植。後世因之。宋諸陵亦多植此木。

冬青花。花時一日腸九折。隔江風雨清影空。五月深山護微雪。石根雲氣龍所藏。尋常螻蟻不敢穴。移來此種非人閒。曾識萬年觴底月。蜀魂飛繞百鳥臣。夜半一聲山竹裂。

送春

蜀魄聲聲訴綠陰。誰家門巷落花深。游絲不繫春暉住。愁絕天涯寸草心。以上白石樵唱

邵桂子

桂子字德芳。淳安人。淳咸七年進士。教授處州。棄官寓家松江。有雪舟勝橐。孫亨貞知名。

次韻方虛谷遷居

家住千峯落照邊。移家三泖白鷗前。東鄰舊日秦侯隱。西路新巢衛叟還。當日釣游頻入夢。何時婚嫁送歸田。會須共跨青溪鶴。點易寒窗伴老仙。嚴州府志

蔬屋詩爲曹雲西作

草菜可食。總名曰蔬。品題有譜。樹藝有書。衡縱町疇。周繞屋廬。繚以樊垣。經以濱渠。晨出抱甕。夕歸荷鋤。

有蔓必嫵。有蝗必驅。風披雨沐。日恒露濡。稗甲怒生。嘉苗蔚敷。芥薑杞菊。韭薤蒜葫。薇蕨藜藿。瓜瓞匏瓠。楮雞桑鵝。籛龍櫻魚。馬齒鹿角。鼠尾虎鬚。薯蕷蔓菁。杜蘅蘼蕪。茵陳菝蘿。芫蘭茹蔥。赤苋銀苳。翠苳墨苳。酸漿辣蕒。甘薺苦荼。庖人調脯。園丁拮据。錡釜鬻煤。筐筥貯儲。椒橙內交。醃醢效劬。以芼以湘。可茹可茹。惟昔仲尼。瓜祭齋如。飲水曲肱。其樂只且。召南蘋藻。韓奕筍蒲。知味羨黃。咬根歎胡。葵蓼飢顛。蔥韭厭徐。火芋明瓊。南菌接輿。庾郎三種。石生一孟。劉參玉版。蘇傳水壺。巢字元修。鮒姓豆盧。菘羔抱孫。蹲鴟將雛。絲滑露葵。練淨土酥。野薺餛飩。水苔脯臠。餅炊菠薐。鮮釀葵蘆。胡麻鑽縮。罌粟醒醐。萍齋西晉。蓴羹東吳。芹擷泥坊。藤采豐湖。沼沚有繁。江漢有萋。岡有常泉。洲有接余。雁門天花。黃河蘑菇。大宛苜宿。太華芙渠。環滌野菽。盤谷山茹。地饒所產。天茁此徒。菲葑是采。口腹以娛。落英未莎。初篁未筮。霜根旋挑。露葉半舒。烹泉石鼎。養火地爐。色炫七箸。香浮杓杆。氣含土膏。味逾天廚。肥生華池。響鳴輔車。商顏飢解。文園渴甦。前招麴生。後引酪奴。饌非羶葷。餉非苞苴。園無羊踏。壤有鼠餘。彼哉肉食。俎列黍芻。心炙椎牛。項禿割豬。春羔秋麇。冬蠶夏胸。猩脣豹胎。麋鸞蟹胥。緇裙解鼈。銀絲膾鱸。羊尾截肪。錦襖脫膚。山殺雉兔。澤羞雁鳧。北饌潼酪。南烹蠹蝻。嗜鼠則鴟。甘帶則蛆。乃笑鄭老。爛蒸瓠臠。乃笑坡翁。夢餐雞蘇。屬厭饕餮。飽死侏儒。語以蔬味。能知否乎。予雅嗜之日不可無。乃顏茲屋。羞供是須。寧蔬而癯。毋肉而腴。易牙司味。敢告膳夫。

餞魏州判鵬舉

松下吟哦幾唱酬。卻攜螃蟹監州。穩挑書擔去環碧。頻寄詩筒來雪舟。異姓弟兄千里月。故山泉石一天秋。葛峯隱者相如問。爲道瓜侯已白頭。以上雪舟墜粟

孫銳

銳字穎叔。吳江人。咸淳七年舉于鄉。宋亡。隱居平望之桑磬村。有耕閑先生集。

漁父詞

平湖千頃浪花飛。春後銀魚霜更肥。菱葉飯。蘆花衣。酒酣載月忙呼歸。

石湖別墅

山水遙通西渡頭。亂雲零落樹還稠。先生唱罷村田樂。戴月披蓑理釣舟。

荻塘柳影

日出烟銷春晝遲。柳條無力萬絲垂。韶光新染鵝黃色。偏愛東風款款吹。以上耕閑先生集

灤灤

灤字深父。高郵人。徙吳官司農卿。宋亡。隨例北行。至莘縣。不食。卒。子璠。入元。爲江浙儒學副提舉。

有存悔齋集

劔池橋梁。久就傾圮。方丈濬公。大禪師。挺出新意。刊石伐木。以遞汲。且併陳樓。悉改舊觀。試下轉語。

請師舉似石侍者。肯一點頭不。

涓涓劔池泉。削厓出石乳。流傳歲千百。評列品三五。輿梁見何時。樓與姓俱古。坐令正壑觀。凜作巖牆懼。霑公大勇猛。咄嗟見未覩。鼓傾變略約。岝嶸移朽腐。連筒稱深汲。惠澤徧下土。幽尋穩登眺。清意逼肺腑。何須鐵作限。只爾天可補。傳聞橋下雲。已作前山雨。虎丘志

宋詩紀事卷七十六

馮坦

坦字伯田號秀石普州安岳人兩魁浙漕咸淳辛未推恩任渝之江津夾漈務西總之龍灣酒庫

錢唐厲鶚輯
歙吳震生勘定

絕句

山腰一抹雲雲起知何處急渡小橋尋天風忽吹去

鷓鴣源樵歌

綺羅巷陌總成塵誰識擔柴老買臣自笑賣柴元似舊買柴換卻舊時人

句

飄風驚日月落葉滿乾坤呈吳履齋井在丹誰煉碑殘墨欲枯廬山白鶴觀因聽敲竹雨便碎賞花心鷓

趁湍流下魚藏石罅間洞廬湖水每向宋清求善藥閑從詹尹卜新年燈影照殘孤枕夢雨聲滴碎兩

年心除夕以上方回桐江集

劉應鳳

應鳳字堯舉號書臺安福人咸淳中登第授建康軍簽判入元不仕

王炎午吾汶稿云。堯舉聞文山再執北行。有句云。天留中子墳孤竹。誰向西山飯伯夷。予問其下句云。伯夷久不死。必有飯之者矣。案堯舉與炎午均爲未識文山之心者。然其志亦可尙矣。

聞文文山北行

喚得嵐鄉作夢回。東風萬里上金臺。出關曾解婆婆否。枝北枝南一種梅。四朝詩

龔孟夔

孟夔字龍友。臨川人。咸淳對策中第。仕終儒林郎。

送孟和卿平陽尋母

杜羔念母心最苦。豈意一朝逢澤潞。母驚兒貌似乃翁。兒抱母啼淚如雨。五十孺慕朱壽昌。刺血寫經毛髮蒼。閒關同州晚相見。迎侍親輿歸故鄉。人年百年一彈指。母恩未報情曷已。團圞尊前舞綵衣。大勝世間朱與紫。子行萬里涉風沙。誓不見母不還家。兒今髮落母應老。道傍看者還咨嗟。臨川孟氏號雍睦。家世來此漚淵族。婆婆老慕紫荊花。料想春風依舊綠。四朝詩

李謹思

謹思字明道。號養吾。餘干人。咸淳中。試禮部。釋褐第一。入元卒。

題文丞相吟嘯集

南人不識兩膝貴。曲摺百態卑。且勞斯人護膝不護頭。故以頸血密君刀。蟠胸孤憤擘不碎。殺氣千丈纏旌旄。援桴親鼓盡南海。背水更用蜚了塵。俘來吮血語神語。咄咄向與天爭豪。須臾赤日減顏色。元雲莽

奔風颺颺。或言巨靈收拾付真宰。讀罷拊臆生長號。又言豐隆列缺對愁絕。疾指玉鞭鞭六鼈。雨瓢倒翻水怪舞。斗樞橫軋天籟號。憐伊肝膽苦復苦。亦見曩昔真離騷。劫灰滿地莫挂眼。蓬萊雖遠容輕舠。長驅癘鬼尙堪戰。儘閑未許飛仙遨。乃言興廢在爾不吾與。吾死吾生吾焉逃。魯叟聞言拍手笑。斯人六經爲骨爲皮毛。斯人捲取六經去。空將贖本傳兒曹。吳禮部詩話。

補疎齋題鵝湖

客來誰與期。微鍾度山椒。松風如起予。閒以笙與簫。逸響諒斯存。幽蹤莽難招。天下同文集。

贈李節婦

猝猝多羝屈。幽幽獨雉經。借渠施粉黛。聊與照丹青。孤檣何年寄。重泉底處局。有人能縮地。不隔短長亭。

郭天錫詩文雜記。謝疊山字君直。妻李節婦。以君直故。與二子繫金陵獄。一將官欲納之。李給曰。爾能脫我械繫。乃可議此。將以爲然。禱上下。釋其獄。李即具湯沐。約翼日出。是夕。伺二子熟寐。解衣帶自經死。稿葬城東壕。二子放還。後數年。子定之復往。

裹骨歸葬。養吾李先生謹思贈云。

寄進士熊退齋

猶存火後書。罕識卷中字。無筆補元經。有金酬載記。漫漫歲月馳。忽忽春秋闕。欲辨已忘言。涕淚空垂泗。殉義若殉財。避名如避箭。況前喜懼交。肯與寵辱踐。百年元亮心。一日宣明面。朱門轍跡多。山路微如綫。

四朝詩。

董師謙

師謙號南江三山人咸淳辛未別院省試魁仕爲平江府教官

錢塘懷古

歷歷庚申事分明在眼前講和如有弊飛渡定無船北使三千里眞州十四年釀成亡國恨一部福華編
玉牀搖帝座青蓋出都城巷哭千家淚燕歌四面聲乾坤遽如許風雪可憐生清曉宮門外猶聽打六更
衣帶一條水靴尖三百州市朝陳迹在圖籍別人收南渡衣冠盡西湖歌舞休久知事當爾曾記五更頭
行人指新寺云此舊宮城坐殿幾朝帝開山何處僧日邊行塔影天外送鐘聲王氣元無了何消鑿秣陵
翰墨大全

俞德鄰

德鄰字宗大號太玉山人永嘉人徙居京口舉咸淳癸酉進士入元不仕有佩章齋集佩章齋輯
聞

過釣臺

行色苦迢遞人烟渺淒涼泊舟值嚴灘濯纓感滄浪赤符識龍圖白水瞻鳳翔涼風協元德落星隱寒芒
桑溟忽變易草木猶芬芳嗟予遭屯蹇垂老悲興亡溪湍兀小艇嵐氣昏戰場安得釣臺釣向友狂奴狂
題白廷玉所藏白馬圖

八尺龍駒蹄削玉霜毛雪鬣超凡俗騎嘶顧影食場苗朝暮逍遙在空谷詔書欵下徵騏驎香街紫陌驚

行人金環壓轡出天廐。不數駮駱驢駟。三品豆芻飽終日。終日不鳴鳴輒黜。何如不藝亦不維。騰霧簡雲金玉質。

秋日客中

楓落秋江寒雁賓。客懷依舊憶鱸鱸。百年三萬六千日。半世東西南北人。滿目空村爭虎豹。何時高閣繪麒麟。由來管葛皆天意。霄漢泥塗任此身。

書齋

寂寂書齋萬慮空。恍然赤甲古城東。烏呼幽夢日方午。花惱醉吟春正中。軍將送茶驚諫議。門生載酒過楊雄。飛詩識字皆爲累。閑殺江頭獨釣翁。

登六和塔

僧舍倚松北。浮圖界竹西。江通嚴瀨遠。雲壓越山低。槐里三原隔。襄城七聖迷。臨風悲往事。月落凍烏啼。

老病

老病幽棲覺嬾吟。眼觀時態獨關心。古今不泯春秋筆。天地難欺暮夜金。幸有別腸堪貯酒。未愁短髮不勝簪。柴門一閉從春盡。桃李飛花葉又陰。

淮安天慶觀夜坐

邊城寂寞歲將闌。濁酒頻斟醉不歡。一點青燈霜月白。野鳧風起石窗寒。

以上佩章齋集。

宋慶之

慶之字元積一字希仁永嘉人咸淳進士有飲冰詩集

劉後村跋云舍著有

餘思要是世間好詩

戊婦詞

君去無還期妾思無已時軍中無女子誰爲補征衣

後村題跋

開爐日賦

筋力已非舊逢寒亦自憐風霜在簷外妻子語燈前紙被添新絮茶甌煮細泉雖云方寸地春意一陶然

項園卽事

時節飛花盡幽林亦自香閑來看新水獨立又斜陽簷角鳥鳴霽樹根魚就涼一春風雨過遊事極相妨

寓武昌報恩寺

孟宗祠下竹依然借得空房竹樹邊貧寺少逢僧過夏遠鄉多是客經年倩人汲水時煎茗就佛分燈夜照眠家信不來心欲斷明朝又買漢陽船

以上東甌詩集

句

城中豈云隘我見無夷途所以龐德公車不向此驅斜陽挂林杪野花續春餘

和陶

數年何處客昨夜獨

歸船喜弟歸

飄泊知何處艱難亦到僧

送僧

更長初過雁蟄後稍無葢

旅夜

多年翁仲在寒食子孫稀

墓以上後村題跋

吳錫疇

錫疇字元倫。休寧人。做諸孫。咸淳間。南康守葉闔聘爲白鹿洞書院堂長。不赴。有蘭皋集。

春望

春事今如此。憑高興未闌。半簾疎雨過。一院落花閑。草色迷幽徑。禽聲出晚山。東風能育物。不政鬢毛斑。

春日

韶光大半去。恩恩幾許幽。情遞不通燕。未成家寒食。雨人如中酒。落花風一窗。草逆濂溪老。五畝園私涑。水翁無賦招。魂難獨笑。且排春句。荅春工。

方岳跋云。予嘗于何人卷中見左史公稱說著梅花定說君之句。不知其竹洲後人也。意王愷之珊瑚扶疎二尺。美止此矣。比吳君過予崖下。出其寶。則三四尺六七株。如燕未成家寒食雨人如中酒。落花風者。尙多也。子其祕之。毋使豆粥菲齋爲帳下。

兒所賣。彼愷輩。那得與君爭長。寶

祐甲寅十月既望。秋崖方岳拜手。

林和靖墓

遺橐曾無封禪文。鶴歸何處認孤墳。清風千載梅花共。說著梅花定說君。

山中雜言

小小柴門傍竹開。幽深不慣有人來。頗嫌老鶴無情思。啄損庭前一徑苔。

山居寂寥與世如隔。是非不到榮辱兩忘。因憶秋崖工部嘗教以我愛山居。好十首追次其韻聊寫

窮山之趣存四首

我愛山居好，蔬畦閒蒔花。篔泉歸鑿舍，篝火乞鄰家。苗嫩貓頭笋，焙芳雀舌茶。野人曾拜號，何用給黃麻。我愛山居好，荒磯一釣竿。白鷗春水闊，黃犢綠坡寬。徑菊香秋晚，溪梅報歲寒。人間幽意足，詩思倚闌干。我愛山居好，粉榆老故丘。好峯當戶立，遠水護田流。鼓響移秧日，枷鳴穫稻秋。年豐身老健，一飽外無求。

楊花

爲見春風不久歸，顛狂上下弄晴暉。只饒天與無拘束，入幕穿簾任意飛。以上蘭皋集。

汪若楫

若楫，字作舟，休寧人。官宣城令。咸淳間，爲紫陽書院山長。有秀山集。

絕句

萬木驚秋各自殘，葦聲扶砌訴新寒。西風不是吹黃落，要放青山與客看。新安文獻志。

尤冰寮

冰寮，錫山人。袤曾孫。咸淳中，官新安別駕。有扣角吟。

句

三條椽下歸空榻，百尺樓中透遠峯。晚鐘 蟻返愁尋穴，鴉歸喜見巢。落葉 方回桐江集。

宋自遜

自遜，字謙父，金華人。自適弟，號壺山居士。

瀛奎律髓慶元嘉定以來，乃有詩人爲謁客者，千求一二要路之書，謂之關匾，副以詩篇，動獲千萬緡，如壺山宋謙父，一謁買似道，獲楮幣二十萬，以造華居是也。錢唐湖山，此曹什伯爲羣，阮梅峯秀實，林可山洪，孫花翁李蕃，高菊圃九萬，往往雖黃士

大夫口
吻可畏。

五月菊

東籬千古屬重陽，此本偏宜夏日長。會得淵明高臥意，故來同占北窗涼。

後村千家詩。

一室

一室冷如冰，梅花相對清。殘年日易晚，夾雪雨難晴。身計繭千緒，世紛棊一枰。麴生差解事，談笑破愁城。

瀛奎律髓。

阮秀實

秀實號梅峯，興化軍人。早見知於趙昌甫，僑居吳門，游賈秋壑之門最久。人號阮怪，咸淳初攝蕪湖茶局。

孟享仰瞻聖駕

紫烟斂翠碧天長，柳蔭旌旗午尙霜。一朵彩雲擎瑞日，光華盡在舜衣裳。

景靈宮恭謝駕回丞相以下皆簪花

宮花密映帽簷新，誤蝶疑蜂逐去塵。自是近臣偏得賜，繡鞍扶上不勝春。

以上隨隱漫錄。

鄧克中

景靈宮恭謝駕回丞相以下皆簪花

輦路春風錦繡張。裁紅剪綠鬪芬芳。黃羅傘底瞻天表。萬疊明霞捧太陽。隨隱漫錄

歐陽慶甫

慶甫咸淳中道州處士。

白魯井石刻詩

地僻人稀能幾家。清泉漱玉石敲斜。客來訪我慙無具。洗甌炊香更點茶。永州府志

車嘯

嘯字獻之。共先蜀人。徙居湖州。端明學士子。才之子。擢進士。官至大理少卿。宋亡時。獻之已退。不任事。與子應龍。一門父子自爲師友。討論經學。以義理相切磨。應龍遂以文章大家見推於東南。獻之有陵陽集。

東坡九日尊俎蕭然。有懷宜興高安諸子。姪和淵明貧士七首。余今歲重九。有酒無肴。而長兒在宜興。諸兒蘇杭溧陽。因輒繼和。

驚颿舉落葉。意氣何軒軒。秋高百卉盡。寂寞但空園。何異富與貴。變滅隨雲烟。緬襄陶彭澤。平生極幾研。朗吟貧士詩。相對如晤言。今人之所恥。古人以爲賢。

翁媪共白髮。蕭然老江干。大兒荆溪游。折腰豈爲官。諸兒走異縣。亦各營一餐。別多會面少。端復坐飢寒。

諸幼且眼前。笑語開我顏。勿問賢與愚。懷抱俱相關。
好惡豈不察。鑿垣植蒿蓬。而比庭前菊。鋤灌少人工。此物抱至潔。有似楚兩龔。留香待嚴凜。意與烈士同。
糞土笑伯始。金錢鄙鄧通。千載一元亮。舍此安將從。

送婁伯高游吳

桃花水暖清明前。長隄柳色青如烟。男兒年少重意氣。春風買醉吳江船。西湖三月春更好。笙歌錦繡神
仙島。紫燕樓深翠黛閑。碧羅天淨楊花老。興亡往事置勿論。千金不惜酌歌尊。酒酣莫作後庭曲。游人思
斷江南魂。去去知君訪陳迹。吳山吳水青歷歷。花殘鈿碎館娃空。春草年年爲誰碧。君行正樂我爲愁。白
髮送君思舊遊。平生漫浪無似我。努力功名須黑頭。

贈厲白雲上人

雙徑聞鐘罷。而今但熟眠。事須紅日上。身在白雲邊。古貌應違俗。高吟不礙禪。爐頭煨芋火。相對各欣然。
和雨中

但聽四簷滴。眞成萬事休。空村就誰飯。高樹繫吾舟。那忍田翁笑。還憐木偶流。老人渾忘事。略記酉年秋。
四安道中所見

蒼涼初日破林霏。幾度言歸不得歸。兀兀籃輿續殘夢。門前兒女挽人衣。以上陵陽集

家鉉翁

鉉翁號則堂。眉州人。以廩補官。賜進士出身。歷端明殿學士。簽書樞密院事。元兵至杭。以參知政

事介丞相吳堅等充祈請。從留燕。宋亡，守志不仕。改館河間。至成宗卽位，放還。賜號處士。以壽終。

寄江南故人

曾向錢唐住，聞鶻憶蜀鄉。不知今夕夢，到蜀到錢唐。天地閒集

寄洞霄道友清溪翁

漢家中郎年七十，霜鬢垂垂人不識。冬深破屨踏層冰，暑到露頭走赤日。窮堅老壯本分事，百年未死爲形役。洞天九鎖鬱嵯峨，古來相傳神仙宅。我嘗結茅天柱前，屐齒蒼苔印行跡。劫火洞然城郭非，清境不壞還如昔。安期羨門我輩人，圓嶠方壺一咫尺。夢魂幾度如相逢，別來已久知相憶。願分仙家九轉丹，服之身輕生羽翼。周遊八表任去來，跳出陰陽寒暑域。洞霄詩集

九日登瀛臺

此地無山喜有臺，南瞻北眺兩宜哉。衰翁無事日傾倒，佳客何人時一來。孤鶴飛鳴知我在，征鴻嘹唳爲誰哀。老來萬事如歸宿，不爲憂愁強把杯。河閒府志

李珣

珣，字元暉，號鶴田。又號廬陵民。吉水人。年十二，通書經。召試館職。除祕書省正字，批差充幹辦御前翰林司，主管御覽書籍。除閣門宣贊舍人。宋亡後，不出。年八十九而終。有雜著四集。錢塘百詠行于世。

劉統柱隱集題李鶴田穆陵大事記後云宋自穆陵升遐元氣盡矣時橫宮屬官李廷記其本末頗詳橋山劍寫歷歷如見異代覽之亦爲凄然因用鶴田先生昔陵下元夕韻以識感慨云陵寢鬼蛾十二關西興吹角浙江寒老臣無限遺弓淚寫與人

閒異
代看

南郊紀事

嚴更頻報夜何其萬甲聲傳遠近隨
梔子燈前紅炯炯大安輦上赴壇時
武林舊事

題汪水雲湖山類稿

天地事如許英雄鬢已斑
淚添東海水愁壓北邙山
湖山類稿附

雪中寄友

石角雲層道路難黑風三日晝漫漫
吟筇直指西湖柳合與梅花共此寒
皇元風雅

題王右丞懶川圖

園圖親畫早流傳已是人間五百年
凝碧池頭秋句在當年幾負此林泉
珊瑚網

題崇元觀

舟維楊柳岸來拜晉英靈
碑古龍紋暗劍寒蛟血腥
江春半篙綠山曉一樓青
燈火旌陽殿鐘聲過客聽

四朝詩

句

此水自當兵十萬，昔人曾有客三千。

梅磻詩語。江陰乃春申舊封。浮遠堂瞰江對。淮爲一郡佳境。李鶴田一聯云。人多傳誦。

陳世崇

世崇字伯仁，崇仁人。一作臨川郁子。隨父入宮禁，仍充東宮講堂說書，兼兩宮撰述。後任皇城司檢法。賈似道忌之，遂歸於鄉。入元，著《隨隱漫錄》多述宋季事。

題曾氏諸帖

南豐而後艇齋君，忠義詞章萃一門。手澤流芳凌劫火，欽承猶得到來孫。鐵網珊瑚。

呂三餘

三餘號雪屋。

賀陳隨隱以布衣除東宮掌書

青宮樓觀近堯階，班列屏風閒坐開。人羨杜閑生杜甫，天教蘇頌繼蘇瓌。馬歸禁苑行邊柳，鶴伴平山隱處梅。我恨長鑱劖黃獨，老年無計策衰頹。隨隱漫錄。

柳桂孫

桂孫號月磻。

賀陳隨隱以布衣除東宮掌書

鏤玉裁冰字字奇。少年親結九重知。君臣際遇榮千載。父子推敲冠一時。疊進楚蘭春奏雅。餅分陶菊夜聯詩。五雲樓近開黃道。金紫連班進赤墀。集隱漫錄。

劉彥朝

彥朝字雷厓。

贈陳隨隱

坎止流行只任天。吟廬新傍紫微邊。夜窗低過宮花月。曉巷深橫御柳烟。五字肯同餘子說。一燈親自乃翁傳。雖然不作功名念。卻恐功名逼少年。隨隱漫錄。

張彝

彝號溪居。

贈陳隨隱歸江西

醞藉中涵廊廟姿。詩文都好見宸批。只蒙四字君王寵。蟻蝨微臣不用題。隨隱漫錄。

吳石翁

石翁字一齋。

贈陳隨隱

大隱君家小隱君。得名大半忌人聞。秋窗吟共緜山月。曉榻眠分華嶽雲。鶯欲引雛先出谷。馬纔生驥便離羣。新詩卻要多拈出。突過郎罷張我軍。隨隱漫錄。

杜汝能

汝能字叔謙號北山太后諸孫居西湖之麴院有能詩聲

秋日

寂寥籬戶入泉聲不見山容亦自清
數日雨晴秋草長絲瓜沿上瓦牆生

全芳備祖

贈陳隨隱

父子名相繼如君又出奇
乾坤鍾秀氣湖海誦新詩
放鶴春風遠橫琴夜月遲
未應隨大隱閑過聖明時

隨隱漫錄

黃力敍

力敍號梅堂江西人

贈陳隨隱歸江西

詩在天地閒風清月明處
若爲深閉門而可覓佳句
夫君小元龍豪氣隘區宇
青春發詩材秀茁長膏雨
流水與行雲吾不見滯住
乘月滌吟毫玉椀三危露
超詣自透脫悟在觀劍舞
入宮畫蛾眉胡爲衆女妒
君詩亦何憾千載一時遇
向也詩道昌吟聲喧禁籞
應制沈香亭龍巾曾拭唾
今焉詩道厄短筇策江路
悲嘯梁父吟侘傺離騷賦
浮雲時卷舒睨此知出處
此其隨之義大隱會境趣
天地梅又春風緊雪飛絮
一笠灑橋驢吟詩向臨汝
得句從人傳傳今亦傳古
要知是家傳審言以傳甫
傳之而又傳衣鉢傳宗武

隨隱漫錄

黃鵬飛

鵬飛字桂隱莆田人

送陳隨隱游廬山

天下廬山第一奇。西風楚楚送行時。晦菴白鹿書猶在。非是游山只愛詩。
曾從圖畫識廬山。山好誰知畫亦難。畫好不如詩好讀。就煩詩筆畫來看。隨隱漫錄。

虞德觀

德觀亡其名蜀郡人

句

我因國破家何在。君爲唇亡齒亦寒。

虞集道園遺藁云。從兄德觀父與集同出榮州府君。宋亡。隱居不仕而歿。集來吳門。得兄遺蹟。有句云云。不知爲誰作也。

宋詩紀事卷七十七

錢唐厲鶚輯
海寧陳沆定

曹業

業、官著作郎。

登南山塔

平生登塔與登樓，亂盡鄉心送盡愁。試上南山山下塔，依前懷古復悲秋。咸淳臨安志。

李敷

敷、臨安縣令。

雙林院

雙林高寺秀峯環，我欲題爲小徑山。炎月一遊神骨爽，天風杳送出松關。咸淳臨安志。

李邦美

題句容酒肆壁

青葙白面閩挑菜，茅舍竹籬疎見梅。春事隔年無信息，一聲啼鳥喚將來。山房隨筆。

趙萬年

萬年南渡時。從武科備戎行于襄陽。屢卻敵人。有裨幄集。

程機宜宅喫豆粥

豆紅米白間青蔬。髣髴來從香積廚。異日大官還飽飫。不應忘卻在蕪婁。

偶成

一心憂國不憂家。掠面黃塵帶晚沙。郵傳不通音問隔。家人夜夜卜燈花。以上曹氏歷代詩選

王執禮

執禮號竹寮。金華人。

遊玉仙洞題碧雲石崖在臨安縣

已從鹿巖遊。更入龍洞去。橫足螃蟹行。連臂猿狖度。徑滑鑿蠟屐。陰屋然樺炬。振策扶顛躓。捫蘿猛攀附。塗險幾欲窮。境勝思有遇。豁舒通石竇。參差流石乳。形開趣彌深。興集理自裕。便將遺世紛。且復滋幽步。紆徐窮冥搜。淹留迫頽暮。題詩識蒼壁。聊寫心跡素。重遊豈無期。恐忘來時路。

錢王太廟

數間老屋半塵埃。宗社雖存沒草萊。尚有遺民呼太廟。可堪游鹿上荒臺。花開陌路空餘恨。麥被陵陂不盡哀。三節還鄉平日志。化爲杜宇定歸來。

錦溪

微雲淡日半昏明。初換春衫步履輕。行到小橋幽絕處。高吟詩句答溪聲。以上戴淳臨安志

周芝田

芝田、浙人。

彈琴

膝上橫陳玉一枝。此音唯獨此心知。夜深斷送鶴先睡。彈到空山月落時。

句

淋漓滿腹藏春雨。突兀半拳生曉雲。石上兩竹草香花落後。雲黑雨來時。以上山房隨筆。

盛雪巢

偶作

臯夔不著書。周召不決科。端坐廣堂上。四海臻泰和。吾道固如是。後來文藝多。嗒然空山中。獨抱明良歌。

吳禮部詩話。

陳柏

柏字茂卿。號南塘。

懷友

攜書入空山。幾若與世絕。俯仰一室間。頗見古人別。良朋令人思。思君意彌切。食芹差自甘。那得共君啜。

吳禮部詩話。

趙聞禮

聞禮字立之號釣月見絕妙好詞。

句

西風昨夜摧黃葉。秋亦無心在菊花。全芳備祖。

張 樞

樞號雲窗。

游大滌

一曲朱闌百尺餘。仙人自是愛樓居。松風不動千山靜。月滿天壇人步虛。洞霄詩集。

林次麟

曲竹出臨平山。相傳唐丘隱士丹成羽化植杖于此。其竹皆曲。

直節棱棱是此君。耳孫卻以曲爲名。首陽山下知難種。只可斜封向管城。咸淳臨安志。

樓楚材

句

晚歸烟樹立猶見。曉向雪汀飛若無。鷺有時移向西堂去。一座青山逐手來。屏風 方回桐江集。

張 偉

偉號芝田。

馬陸

水拍田塍路半斜。悄無人跡過農家。春風自謂專桃李。也有工夫到菜花。

薦菊泉一名寒泉

近來湖上風光改。古蹟三賢亦就遷。獨有菊泉能定力。歲寒堅守此山前。
以上咸淳臨安志

李介山

梅雨潭

靈源分左界。千仞落飛泉。散作一空雨。長如四月天。挂岳寒練直。濺席水珠圓。湫石龍應在。山扉浮翠烟。
仙岳寺志

俞 琰

琰字玉吾。長洲人。咸淳末。應舉無成。入元。隱林屋山。以讀易自娛。有林屋山人集。書齋夜話。席上腐談。

焦山寺夜坐偶作

夜宿焦山寺。月明聞櫂歌。蜀江到吳盡。海舶過淮多。風浪翻龍窟。霜林露鳥窠。詩成忽有酒。不飲欲如何。
客裏送春

擠排落絮隨風去。分付殘花趁雨飛。自笑鶴身歸未得。卻從客裏送春歸。

贈華陽道院琴士商碧山

來往晴巒縹緲中。滿身空翠溼衣濃。相尋欲聽蓬萊曲。還在華陽第幾峯。
以上林屋山人集

海牒

生以鰕爲目。來從水母宮。堆槃凝凍結。停筍使消融。瑩緊玻璃白。編欄瑪瑙紅。酒邊嘗此味。牙頰響秋風。
書齋夜話

鄭震

震更名起。字叔起。號菊山。連江人。所南翁其子也。有倦遊橐。清雋集。

宿虎丘

到晚歸不去。因而此宿休。雲深千古寺。月冷一天秋。崖裂池如束。天虛塔欲浮。最宜初日上。高處看雲收。
餘杭道上

五年茲路上。頻往又頻還。歲月孤松老。風霜苦竹斑。溪流天目水。雲出洞霄山。馬上因閑眺。蜉蝣宇宙閒。
歸去

歸去豈不好。平田帶淺林。春猿鳴雪澗。晴日轉雲岑。世久無鳴犢。時當學展禽。吾生今老矣。梁甫豈能吟。
荆南別賈制書東歸

來時秋雨滿江樓。歸日春風度客舟。回首荆南天一角。月明吹笛下揚州。

卜居

久欲謀歸力不任。浮雲蹤跡謾巢林。功名未入屠龍手。貧賤常懷買鶴心。月下開門微雨過。樓頭聞笛二更深。世間萬事俱陳迹。空倚西風閱古今。
以上清雋集

王夢應

夢應字聖與，一字靜得。長沙攸縣人。咸淳十年進士，調廬陵尉。元兵陷臨安，起兵勤王。兵敗，奔永新卒。

鄧光薦文丞相督府忠義傳。吳希夔、陳子全、王夢應，皆攸縣土人。自適于同督府與趙璠相應。景炎卽位事聞，承制授官，各有差。

東歸

一權仍爲別，他鄉復避兵。客隨風雨老，春著鼓鼙輕。宇宙關何事，艱危得此生。門前一溪水，幾日到江城。

甲申元日

上日仍漂寄，尊前客又非。鄉心眠聽雨，病骨晚添衣。街鼓春將動，簾燈寒未歸。梅花經一雪，幾片不曾飛。

呈李書史

火龍騎日雪飛空，勁草亭亭不見風。臣亮南陽今未老，一鉏雲碎日猶紅。以上四朝詩。

陳觀

觀字國秀，奉化人。咸淳十年進士，調新城尉。有蜩竅集。

題甄氏訪山亭

水流花落日生雲，日靜風暄草欲薰。老去風流猶未減，一丘一壑要平分。四朝詩。

雨後西山翡翠堆，結亭直欲近巖隈。從今記取溪頭路，一日須來一百迴。

熊 銖

銖字位辛。初名禾。字去非。世居建陽之鼈峯。咸淳十年進士。授寧武州司戶參軍。有勿軒集。

遊武夷山

我來武夷山。遠意超千古。嘗疑混沌開。疏鑿未經禹。峽山猶古梁。洪濤莽回互。行舟留大壑。營巢餘斷樹。巖崖波濤痕。隱隱皆可覩。陶然上古民。要服固深阻。秦威何桓桓。薄海猶廣土。六合皆湧沸。一枝豈寧處。嘗言十三君。隱隱避秦侶。一日厭塵寰。冷然遂高舉。上山娛賓雲。下山滿豺虎。神仙何渺茫。虹橋想虛語。桃源亦其類。好事自誇詡。風氣日已開。蛇斷出真主。遂令閩山陬。盡入職方宇。漢志名始彰。祠堂用魚脯。流傳世代久。琳宮粲衣羽。至今此山名。號爲神仙府。恭惟我遜翁。辭闕厥功溥。于焉卜精廬。溪山九曲五。圖書盡在是。斯地儼鄒魯。我以負笈生。來茲有年數。自慚仁智心。未覩高深趣。斯遊亦何意。會心覬眞遇。侃侃平生友。惠然肯來顧。攜手敦夙好。抗志企遐慕。招我山中遊。茲遊適予素。巍巍大隱屏。屹屹天一柱。前瞻晚對亭。考槃固其所。何當同心人。相與薤榛莽。長松期歲寒。脩竹倚日暮。我自愛此山。躊躇不忍去。

擣衣曲

北望悠悠音信少。空房遠念心常早。流螢煜煜夜稍青。寒雁嚙嚙寒已到。細絲清水練方新。在機半溼日中明。隔籬翁媪寐不熟。月落尙聞砧杵聲。將軍錦帳環歌舞。百戰尙遲歸寸土。老農肩米肉成瘡。思婦裁衣淚如雨。以上勿軒集。

曾子良

子良字仲材號平山南豐人徙金谿咸淳進士仕爲淳安令宋亡隱陶塘

輓知臨安府兼浙西制置使曾公淵子

德祐思良弼江西出大臣報忠昭漢議靖獻有殷仁皦日五朝老清風百世人幾時歸衮繡秋草臥麒麟
永紹傳賢啓慈元拱女堯鼇山猶鼉屬鵬海極扶搖宮殿春旗曉簾帷社飯朝龍髯攀不及鸞馭去何遙
立海終風黑洗光雙日紅餘波濺渤澥仙仗岌崆峒宗廟神靈在公師禮數崇平生精履屐尙覺小臣忠
返輶榮歸寢帷堂哭設衣神情如夢叶滄海悵心違百世功言立千年城郭非任安猶未死哀淚不堪揮

忠義集

吳龍翰

龍翰字式賢號古梅歙人咸淳鄉貢後以薦授編校國史院實錄院文字至元丙子鄉校請充教授尋棄去有古梅吟藁

程訥齋元鳳云閱吳君詩藁句老而意新咀之雋永殊非苟作

樂府

妾心江岸石千古無變更郎心江上水倏忽風波生
製衣寄夫壻妾有冰雪段中間連理枝不忍翦教斷

方虛谷云式賢詩有驚人語如樂府諸篇尤子所深喜者

重陽客中

愁裏重陽近。他鄉酒易沽。秋風詩鬢短。寒夜客燈孤。筇笠月穿破。荷衣霜打枯。有懷吟不就。端不爲催租。

晚舟過臨平

烟鐘喚起夕陽愁。淼淼臨平春事幽。唯有風蒲愛吟客。岸邊撩亂綰行舟。

嚴灘對月憶雪壺六弟

共君看月此徘徊。今夜月明君不來。安得清光刀翦破。爲分一半到泉臺。

題荆公讀書堂

六籍紛紛盡可奴。翻騰字說乃舊畬。可知山半青燈夜。只讀商君一卷書。以上古梅吟藁。

登金陵鍾山絕頂

萬仞鍾山著屐登。中原今隔幾峻嶒。自憐不及天邊雁。歲逐春風到八陵。新安文獻志。

汪涯

涯字萬頃。漢陽人。事母孝。宣撫賈似道請爲客。當作露布獻捷。涯瞋目曰。啗人以利而退其師。又兒弄主上。似道大怒。搃殺之。其母曰。汝以直死。我則不辱。可以下報先君矣。亦自沈。

江帆

江帆去去可腸斷。千古萬古越王臺。掃空黃葉晚風定。飛盡碧鳥青天回。半生無成坐筆硯。萬事不理問尊壘。年年看梅今白首。已矣英雄留七哀。

江行

江陵白魚如斫玉，挂帆獨去風日寒。封題兩甕寄白髮，兒涯不是作魚官。
秋光蕩漾滿行色，鄰舟吹笛不堪聞。洞庭濯足一尊酒，夫君不來空白雲。以上谷音。

高晞遠

晞遠，字照菴，通州人。咸淳德祐間，通判平江府。

心遠堂

種竹期十年，栽橘盈千頭。雖云多遠慮，無乃爲身謀。高人絕塵累，俟德居此丘。泰宇無畦畛，虛空有天游。仁義尙蘧廬，道德成安流。結茅依翠微，極目際平疇。白雲度寥廓，黃鶴下滄洲。百世此周覽，我志尙可求。祇應柴桑翁，真趣共悠悠。四朝詩。

曹良史

良史，字之才，號梅南，錢唐人。咸淳故老，與周草窗游。有詩詞三摘。

俞宗大序云：曹君故宮詞十九首，與夫拜景靈、游湖曲、登北城、悼今思古所謂哀而不傷，怨而不怒，忠厚而悱惻者也。

句

雲生畫佛壁，葉落病僧房。閑來閉門處，認得讀書聲。牆圍敗屋知無主，風響荒林似有人。深樹月昏神火出，斷烟雪霽獵人回。

方虛谷跋曹君良史錢唐人衣冠佳盛湖傲山醜則有咸淳詩摘兵火變遷江淮奔走則有梅南詩摘句如雲生畫佛壁云云展轉征旗戰鼓十年閒筆力益老矣

錢穎

穎號菊友

賦翁仲魏明帝景初元年徙長安銅人承露盤盤折聲聞數十里重不可致留于霸城大發卒鑄銅人二號翁仲列坐司馬門外武皇騎龍朝帝后露溼銅仙古苔繡景初命名翁與仲無復衣冠仍漢舊桓圭大劔高嵯峨不動如山巖鎮守豈知屹立司馬門九鼎暗移司馬手變遷陵谷亦何易洛陽塵埃一回首因嗟寵辱非可常世間何者爲長久君不見後來荆棘埋銅旄坐想失身橫隴畝隨隱漫錄

秋胡子

郎恩葉薄妾冰清郎說黃金妾不膺若使偶然通一笑半生誰信守孤燈詩林萬選

家之巽

之巽字志行宋季臨安府倅

定林寺二首王荆公讀書處

功名良苦賦歸歟兩鬢霜花百念枯鍾鼎樓臺渾一夢數間茅屋亦浮屠
十載浮雲幾變更歸來鐘阜碧嶙峋早知山色無今古只與青山作主人景定建康志

福勝院在臨安縣福金山

三過山中寺。勞生有底忙。梵書蟲蠹紙。佛界燕巢梁。曉日光明藏。野花知見香。豐碑如會意。讀罷更彷徨。
咸淳臨安志。

劉敏求

敏求字好古。號松菊老人。泰和人。長于詩。宋末累舉不第。

題滕王閣

閣中環佩知何處。游子再來春欲暮。鶯啼紅樹柳搖風。疑是當年舊歌舞。古來興廢君莫嗟。君看紅日西山斜。西山不改舊顏色。換盡行人與落霞。
南昌府志。

劉光

光字元輝。生宋季。有曉窗吟卷。

句

仙館無人春寂寂。一林紅日鍊櫻丹。曉來多謝梁間燕。盡把春愁舉似人。山翁何事衝寒往。知有梅花在隔溪。
方回桐江集。

韋奇

奇字學易。號若溪。居安次子。二十五歲歿。

題倪文昌玉湖書院

齊齋老子今安在。一去人間餘卅載。白衣蒼狗幾千回。惟有溪山長不改。吳興勝槩誇玉湖。鵝溪一幅元

暉圖。天光上下渺無極。寒玉倒浸清冰壺。晴波萬頃瑩如洗。一卷石向波心起。先生具眼此結廬。收拾溪山入詩裏。漁人艇子時往還。笞笞擲下前溪灣。一聲欸乃水天碧。回頭卻羨沙鳥閑。樓高望極情思遠。前揖衡山後蒼弁。陌頭楊柳幾春風。當年曾識齊齋面。我今懷古心悠悠。古人不見今人愁。夕陽收盡暝烟浮。扁舟載月歸來休。梅磻詩話。

俞演

演字則大臨安人。

句

殘燈吟夜雨。破榻臥秋山。方回桐江集。

徐子美

子美號芝石。武林人。

句

杯行曲水春如昨。字入昭陵土亦香。蘭亭。方回桐江集。

俞君錫

君錫字仲疇。苕溪人。有竹屋詩藁。

句

洗瓢魚隱石。埽葉蜨移家。荒店難尋酒。長途半趁船。葢聲依壞砌。樹影倒寒池。方回桐江集。

江石卿

石卿、有得一文豪。

句

太傅數日別。劉公一紙書。方回桐江集。

汪崇亮

崇亮、有白雲漫漶。

青溪主客歌

野王手奏淮淝捷。門戶歸來有旌節。伸眉一笑紫髯秋。袖中猶挾柯亭月。山陰主人載雪舟。掀篷繫纜青溪頭。平生耳熱欠一識。若爲牽挽行雲留。一聲橫玉西風裏。蘆花不動鷗飛起。馬蹄依舊入青山。柳梢不動天如水。方回桐江集。

方至

至、號天慵。分水人。

句

缺多圓。少人如月。盛極衰來物易秋。方回桐江集。

曾澈

澈、盱江人。鮑輓過盱江。遇一童子。眉目疎朗。語必援古今。驚問。逆旅主人子也。明年載訪。死矣。得

其詩一首于其同舍生

九齡行

我生九齡氣食牛。暗鳴頓挫無匹儔。白雲無根起天末。一身萬事同悠悠。低頭拱手事先覺。談笑未了成仇讐。一譽不足勝百毀。言語起滅如浮漚。聖賢可與知者道。麟鳳豈在山中遊。遽然夢覺大槐國。江花昨夜生涼秋。谷音

孫璉

璉字器之。大庾人家貧嗜書善吟詠。不應舉。躬耕織屨以爲食。壽百歲。

述懷

坐倦秋樹根。攝衣步前丘。橫河澹如練。破月西南流。獨持一尊酒。悠然發清謳。俯仰無不足。吾生焉所求。谷音

薛美

美號獨菴。永嘉人。

薛瓜廬吾宗人也。吾不得而見之。得見其詩。斯可矣。太息而題于卷杪。

結廬兄弟近長安。弊卻儒冠竟不彈。自茹芝萊輕漢召。寫將瓜去博唐官。貧多樂事清無盡。手寫新詩墨未乾。史筆須評隱君傳。姓名應作古人看。瓜廬詩附

詠柳

一撮嬌黃染不成。藏鴉未穩早藏鶯。行人自謂傷離別。枉折無情贈有情。全芳備祖。

許庚

庚字伯先。號萬松。武林人。

句

花盡辜啼鳥。麻深沒過人。硯潤浮殘墨。琴乾響斷弦。方回桐江集。

黃灤

灤、灤。昭武人。

句

橋影不隨流水去。漁歌偏帶夕陽來。當年不作南行客。他日應無北狩人。題鄭介夫祠。方回桐江集。

戚明瑞

明瑞字子雲。橋李人。讀書會稽五雲山。

句

舊夢不堪游蜩國。生涯只合在漁舟。鶴鷗歡喜舞南風。望帝花飛春尙寒。方回桐江集。

王儀

儀字仲履。

題婺源江氏琅玕閣

詩仙長倚玉闌干。句脫塵凡妙不難。六月雪霜侵几研。一生煙火隔心肝。鳳凰管徧風旋應。翡翠窗深露不乾。記得月明扶醉上。骨輕毛豎怯清寒。

偶作

五月蘋花思渺然。綠波憶蕩浦西船。寧穿布韉青鞵底。不醉琵琶綠繭弦。山郭鶯啼春又暮。蕭齋人靜澹無烟。一言滿慰三年別。借枕風前對榻眠。以上吳禮部詩話

李商

記化蝶事

碧梧翠竹名家兒。今作栩栩蝴蝶飛。山川阻深網羅密。君從何處化飛歸。

癸辛雜識。楊旻字明之。娶江氏。少艾。連歲得子。明之客死。之明日。有蝴蝶大如掌。徊翔于江氏傍。竟日乃去。及聞訃。聚族而哭。其蝶復來。繞江氏飲食起居不置也。蓋明之未能割戀于少妻稚子。故化蝶以歸耳。李商作詩記之。

王庭

庭金華人。賈似道幕官。似道敗。自殺。

明堂侍祠

唱徹巖更鳳輪開。侍祠濟濟列崇陔。小臣亦忝廊西獻。惟秉溫恭對越來。玉佩珊珊出禁扉。金蓮分炬散芳菲。祠班咫尺臨黃道。惹得天香滿袖歸。咸淳臨安志。

宋詩紀事卷七十八

蔣捷

捷字勝欲，陽羨人，德祐進士，自號竹山，遁跡不仕，以詞名。

錢唐 厲鶚 輯
錢唐 汪啓淑 勘定

東坡田

老去紅灰酒盞前，向來青草瘴江邊。卜居自爲溪山好，不是區區爲買田。毘陵志。

王易簡

易簡字理得，號可竹，山陰人。宋末登進士，除瑞安主簿，不赴。隱居城南，有山中觀史吟。

九鎖山十詠存二首

大滌洞

蕭灑殊庭西，玉室甚孱顏。華陽隱邃道，元蓋浮塵寰。秋秋天鼓鳴，爛爛巖石斑。誰懸隔凡石，此石非人間。羣仙本容物，爲我開重關。

來賢巖

絕壁中嵌空，秀石下插地。緬懷玉局仙，于此冠蓋萃。雲泉儼昨遊，卉木遺古意。青山日迎客，何者傳姓字。

斯人千載名，覽勝乃餘事。以上洞霄詩集。

奉題高房山尚書夜山圖

高侯妙筆生夜光，李侯正倚牛斗傍。公略浙江行省照磨，寓居吳山。淒涼看盡吳山月，玉鏡臺前翠鳳凰。鐵網

珊瑚。

游寶林寺

元度存遺跡，元英有舊詩。城中獨高處，雪後最佳時。拂壁書行紀，逢僧問一作談。故祠闌干頻徙倚，不奈

朔風吹。越詠

錢大椿

大椿字坦仲，淳安人。宋末舉進士。

春夜

燕子銜泥已下簾，深深庭院薄寒天。海棠枝上黃昏月，楊柳梢頭淺澹煙。句引芳情春夢蝶，頻催愁緒夜

啼鵲踏青年。少歸來晚，斗酒花陰枕石眠。青溪詩集

盧珏

珏字登父，淳安人。宋末舉進士，有可菴集。

天邊風露樓漫題

十二闌干俯碧溪，憑高一覽衆山低。晴灘歷歷輕帆上，烟樹重重幽鳥啼。但覺興隨流水遠，不知身與白

雲齊年來欲問東皇信。多種梅花在竹西。嚴州府志。

眞山民

山民自呼山民。或云名桂芳。括蒼人。宋末進士。李生喬歎以爲不媿迺祖文忠西山。以是知其姓眞。痛值亂亡。深自湮沒。世無得而稱焉。惟所至好題詠。因流傳人間。張伯子謂爲宋末一陶元亮云。有山民集。

幽居雜興

松桂小菟裘。山扉幽更幽。蜂王衙早晚。燕子社春秋。鬢禿難遮老。心寬不貯愁。年來把鋤手。無復揖公侯。

山亭避暑

怕礙青風入。丁寧莫下簾。地皆宜避暑。人自要趨炎。竹色水千頃。松聲風四簷。此中有幽趣。多取未傷廉。

泊白沙度

日暮片帆落。渡頭生暝烟。與鷗分渚泊。邀月共船眠。燈影漁舟外。湍聲客枕邊。離懷正無柰。況復聽啼鶻。

渡江之越宿蕭山縣

昨夜大江舟。今宵小驛樓。隻身千里客。孤枕一燈秋。市酒難成醉。鄉書莫寄愁。胸中無史記。浪作會稽遊。

兵後劉秀寬見過

冉冉歲云暮。閑居安所知。途窮身是累。痛定語猶悲。衰鬢數莖雪。空囊一卷詩。儒衣例如此。惜也不逢時。

東粵廟

頽闌斜照網蛛絲。陳迹淒涼萬古悲。朽木尙鳴亡國怨。山松曾見受封時。碑因苔蝕無完字。城爲田侵失舊基。當日東甌知幾戰。如今贏得一荒祠。

三峯寺

寂寞烟林噪亂鴉。青鞵步入野僧家。雲深不礙鐘聲出。日轉還移塔影斜。廊下蝸黏沿砌蘚。佛前蜂戀插瓶花。竹牀紙帳清如水。一枕松風聽煮茶。

梅仙山

西都不知壽。安用獨長年。縱有丹爐在。難吹漢火然。

九日

懶把黃花插滿頭。正緣老大見花羞。年來頗恨儒冠誤。好倩西風吹去休。以上山民集

吳仲軒

仲軒進賢人。宋末進士。隱居教授。元初程鉅夫疏薦不起。

謝程鉅夫學士

抱疾經年久。何期徵詔臨。芸窗書已蠹。竹葉徑尤深。空返皇華使。難忘鷗鳥心。懷君雖感激。衰鬢不勝簪。西江詩話

汪元量

元量字大有。號水雲。錢唐人。以善琴事謝后王昭儀。宋亡。隨三宮留燕。後爲黃冠師。南歸。往來匡

廬彭蠡間。世莫測其去留。長身玉立。修髯廣額。音若洪鐘。江右人以爲神仙。多畫其像祀之。有水雲集湖山類稿。

李鶴田湖山類稿跋云。往時讀泣血錄。爲之淚下。因歎德祐之事。意必有杭之文章鉅公。書于野史。後人見而悲之。未必不若余今日之讀泣血錄也。一日吳友汪水雲出示類稿。紀其亡國之戚。去國之苦。問關愁歎之狀。備見于詩。微而顯隱而彰。哀而不怨。歎而悲。甚于痛哭。豈泣血錄所可並也。開元天寶之事。紀于草堂。後人以詩史目之。水雲之詩。亦宋亡之詩史也。其詩亦鼓吹草堂者也。其感恩抑鬱不可復伸。則又有甚于草堂者也。噫。水雲留詩與後人哀耶。留詩與後人愁也。可感也。重可感也。敬賦二十字。書續卷尾云。天地事如許。英雄鬢已斑。淚添東海水。愁壓北邙山。

錢塘歌

錢塘江上龍光死。錢王宮闕今如此。白髮宮娃作遠遊。漠漠平沙千萬里。西北高樓白雲齊。欲落未落日已低。古人不見今人去。江水東流烏夜啼。

醉歌

亂點連聲殺六更。熒熒庭燎待天明。侍臣已寫投降表。臣妾僉名謝道清。湧金門外雨晴初。多少紅船上下趨。龍管鳳簫無韻調。卻搥戰鼓下西湖。

賈魏公府

湖邊不見碾香車。斷珥遺鈿滿路塗。門徑風輕飛野馬。亭臺火盡及池魚。海棠花下生青杞。石竹叢邊出

紫蘇卻憶相公游賞日。三千衛士立階除。

送琴師毛敏仲北行

西塞山前日落處。北關門外雨來天。南人墮淚北人笑。臣甫低頭拜杜鵑。
蘇子瞻喫惠州飯。黃魯直度鬼門關。今日君行清淚落。他年勛業勒燕山。

北征

北師有嚴程。挽我投燕京。挾此萬卷書。明發萬里行。出門隔山嶽。未知死與生。三宮錦帆張。粉陣吹鸞笙。遺氓拜路傍。號哭皆失聲。吳山何青青。吳水何泠泠。山水豈有極。天地終無情。回首叫重華。蒼梧雲正橫。

秋日酬王昭儀

愁到濃時酒自斟。挑燈看劍淚痕深。黃金臺迥少知己。碧玉調高空好音。萬葉秋風孤館夢。一燈夜雨故鄉心。庭前昨夜梧桐語。勁氣蕭蕭入短衿。

太皇謝太后挽章

大漠陰風起。羈孤血淚懸。忽聞天下母。已赴月中僊。哀樂浮雲外。榮枯逝水前。遺書乞骸骨。歸葬越山邊。
女道士王昭儀仙游詩

吳國生如夢。幽州死未寒。金閨詩卷在。玉案道書閑。苦霧蒙丹旆。酸風射素棺。人間無葬地。天上有僊山。

瀛國公入西域爲僧號木波講師

木老西天去。袈裟說梵文。生前從此別。去後不相聞。忍聽北方燕。愁看西域雲。永懷心未已。梁月白紛紛。

全太后爲尼

南國舊王母。西方新世尊。頭顱歸妙相。富貴悟空門。傳法優婆域。誦經孤獨園。夜闌清磬罷。趺坐雪花繁。
以上湖山類聚。

題賜硯

斧柯片石伴幽閑。堪與遺民共號頑。試憶當年承賜事。墨痕如淚盡成斑。

改蟲齋筆疏。水雲以善琴供奉。國亡隨三宮入燕。久之。請爲黃冠。南歸。藏有賜硯。背刻天錫永寶四字分書。右刻水雲二篆字。左刻楷書絕句云云。其北征古詩云。北師有嚴程。挽我投燕京。挾此萬卷書。明發萬里行。則硯必並載入燕。以詩書授瀛國公。皆此硯矣。

李吟山

贈汪水雲

青雲貴戚玉麟兒。曾逐鸞車入紫闈。王母窗前窺面日。太真膝上畫眉時。滄溟水闊龍何在。華表秋深鶴未歸。三尺焦桐千古意。黃金誰與鑄鍾期。
水雲集附。

吳仁傑

送汪水雲入湘

碧水波翻海亦摧。奮身鼉背護蓬萊。忍隨天上紅雲散。卻馭關中紫氣回。天道有常須變化。元關無鑰任

敲推攜琴更拜蒼梧野。口想南薰入調來。水雲集附。

游古意

送謝疊山先生北行。

滿懷忠孝有天知。不管人間事已非。萬里乾坤雙草屨。百年身世一麻衣。行藏自信牀頭易。臥病惟餐隴首薇。儻過宗周見禾黍。幾多新淚灑殘暉。疊山集附。

葉愛梅

送謝疊山先生

后土茫茫兩鬢行。綱常事重此身輕。大江有士一人口。千載見君雙眼明。俯仰元無媿今古。英雄何必盡公卿。早知莫賣成都卜。省得人知大隱名。疊山集附。

毛靜可

送謝疊山先生

一襟書傳日星懸。湖海聲名五十年。事不求知惟此理。文之未喪豈皆天。人方驚怪歐陽子。我獨悲傷魯仲連。看鏡倚樓秋已暮。風巾霜屨重依然。疊山集附。

魏天應

天應號梅野。建安人。疊山門人。

送疊翁老師北行和韻

先生心事炳丹青。頭影何曾媿獨行。商嶺芝能如橘隱。首陽粟不似薇清。綱常正要身扶植。出處端爲世重輕。安得寒泉來會宿。參同極論到天明。疊山集附。

蔡正孫

正孫、號蒙齋、疊山門人。

送疊翁老師北行和韻

山色愁予渺渺青。平生心事杜鵑行。霜饜雪虐天終定。歲晚江空水自清。肩上綱常千古重。眼前榮辱一毫輕。離明坤順文箕事。此是先生素講明。疊山集附。

陳達翁

達翁、建安人。

送疊山先生

流落崎嶇二十年。幾回灑血杜鵑前。一雙芒屨乾坤窄。萬古丹心日月懸。案上靈龜元不食。樊中孤鶴且安眠。逃名不得名終在。行止非人亦有天。疊山集附。

王濟淵

濟淵、字道可、疊山門人。

送疊山先生

希夷何意出山中。心事當年漢臥龍。行止但憑天作主。別離初不淚霑胸。定知晚菊能存節。未必寒松有

受封大義昭明千載事。前程儘更好從容。疊山集附。

謝 鎰

鎰字君殷。號草堂。晞髮道人鎰之父也。

旣月有感

入夜茶甌苦上眉。眼花推落石牀基。舉頭卻恨天邊月。顛倒山河作樹枝。天地間集。

謝 翱

翱字臯羽。一字臯父。閩之長溪人。後徙浦城。咸淳中。試進士。不第。丞相文信公開府延平。署咨議參軍。信公被執後。避地浙東。在浦江。主吳渭家。與方鳳、吳思齊遊。度釣臺南地爲文冢。名會友之所曰汐社。期晚而信集同好名氏作許劍錄。取吳季子意。乙未八月。寓杭。終于婦劉氏舍。友人方鳳、吳思齊輩。歸其骨。葬於釣臺。從初志也。有晞髮集。

鄧牧心謝翱傳略云。臯父。性耿介。不以貧累人。所居產薪若炭。率秋幕載至杭。易米卒歲。少裕。則質之江海。訪前代故實。著宋史補。唐詩人無傳者三十餘篇。傳近世隱逸數篇。歲甲午。與杭人鄧牧相遇。會稽。結爲方外友。牧因爲言。杭大都會。文士輩出。余知若干人。盍往見之。旬日別去。逮牧歸杭。君已挈家錢唐江上。問所從遊。皆前所聞者。其信好學也。乙未秋。牧薄遊山水間。君病篤。望牧不至。懷以詩曰。謝豹花開桑葉齊。戴勝芊生草藥肥。九鎖山人歸未歸。蓋絕筆于此。

任松鄉謝處士傳略云。臯羽常布衣杖策。參入軍事。晚登子陵西臺。以竹如意擊石。歌招魂之詞。曰。魂來兮何極。魂去兮江水黑。化爲朱鳥兮。其味焉食。歌闋。竹石俱碎。失聲哭。何其情之悲也。

方韶卿謝臯羽行狀略云君遺篋在時舊所爲悉棄去今在者手抄詩六卷雜文五卷唐補傳一卷南史贊一卷楚辭等芳草圖譜一卷宋鏡歌鼓吹曲騎吹曲各一卷睦州山水人物古蹟記一卷浦陽先民傳一卷東坡夜雨句圖一卷浙東西遊錄九卷春秋左氏續辨歷代詩譜未脫彙選唐韋柳諸家及東都五體在集外

烏棲曲擬張司業

吳宮草深四五月。破楚門開烏啼歇。美人軍裝多在船。歸來把弓墮弓弦。越羅如粟越王獻。宮中養蠶不作線。轆轤出屋井水淺。梔樹花萎子如繭。烏栖烏啼官燭秋。越女入宮吳女愁。

廢居行

海濤翻空秋草短。白蛇入窠啗雀卵。經年廢屋無居人。孕婦夜向船中產。歸來多雨白生魚。穴蟲祝子滿戶樞。鄰家置屋供官役。買得沂王園令宅。

古斂歎

刑徒鬼火去飄忽。息婦堆前殯齊發。白烟溼樵叟來。拾得慈獻陵中髮。青長七尺光照地。髮下宛轉金斂二。持歸薰沐置高堂。包裹恐爲神所將。妻兒朝拜復暮拜。冉冉臥病不得瘥。省知天物厭凡庸。夜送白龍潭水中。叩頭卻顧祈免死。永入幽宮伴龍子。

瓊花引

后土祠前車馬道。天人種花無瑤草。英雲藥珠欲上天。夜半黃門催進表。酒香浮春露泥泥。二十四橋雪

如洗。陰風吹雪。月墮地。幾人不得揚州死。孤貞抱一不再識。夜歸闔風曉無蹟。蒼苔染根煙雨泣。歲久游魂化爲碧。

後瓊花引

揚州城門夜塞雪。揚州城中哭明月。墮枝溼雲故鬼愁。西來陰風無健鶴。神鴉愁空衆芳歇。一夕蒼苔變華髮。宮花織簾塵掩轍。玉華無因進吳越。灘灘淮水山央央。誰其死者李與姜。

飛仙引遊沃洲水簾谷作

亦城後門桃花尾。溼浸靡蕪洗蒼耳。小支菩提海上來。天風吹下谷簾水。斜珠界左轉復右。華蓋縣肝三葉紫。內閒肉芝承乳流。鬼母仙姝臨洗胃。蒼龜守關朝太微。色阻讒神誣奏事。海桑男子在謫籍。驅鹿行車閏年至。

和靖墓

山中處士白麻履。死後無書獻天子。青童元鶴晝上天。夜下玉棺葬湖水。湖隄四合葑如髮。芳樹玲瓏倚春雪。百年鳳舞雲霧空。玉腕人閒出句越。宮嵐塔雨恍如失。飛網繞湖冠聚鷗。琳宇焚芝秋寂歷。斗下無人祠太乙。

冬青樹引別玉潛

冬青樹。山南陲。九日靈禽居上枝。知君種年星在尾。根到九泉雜龍髓。恆星晝竇夜不見。七度山南與鬼戰。願君此心無所移。此樹終有開花時。山南金粟見離離。白衣人拜樹下起。靈禽啄粟枝上飛。

翠鎖亭避雨

自注亭有魏王妃所題字尙新王嘗以王子成德軍節度使鎮明故妃至其處

客有遊山衣著久如薜荔。行行萬翠亭。忽作風雨憩。仰面無所覩。梁閒有題字。問此何人書。婉婉有弱氣。云昔魏王妃。書字學李衛。乘雲到此山。灑墨在空翠。塵風吹土花。倏忽景物異。疑此夢與仙。不類人間世。

聽雨

山廚壓炊烟。野雨起薄暮。孤客臥空牀。不識門前路。回風已若休。入壑忽如赴。荒林啼鬼車。往往不見處。鄰翁起厭勝。咒作禹餘步。聽雨雜咒聲。起歌和其語。咒靜雨亦止。還眠向窗曙。

飲飛廟迎神引

劍歌兮擊筑。菱青兮蓼綠。夕濟甬兮沈玉。步巫兮禹孫。葺神藩兮楚軍。神之乘兮海雲。嚶芳兮越咒。斬將兮神祐。秋零露兮爲醕。春集鴉兮神語。風蕭蕭兮滿旗。雲之車兮來思。

鴻門讌

天雲屬地汗流字。杯影龍蛇分漢楚。楚人起舞本爲楚。中有楚人爲漢舞。鵬鶴淬光雌不語。楚國孤臣泣。俘虜他年疽。背怒發此。芒碭雲歸作風雨。君看楚舞如楚何。楚舞未終聞楚歌。

有洗舊語綾作青色。鬻將以爲緣。以紺繒易得之。作手卷。賦小樂章。求好事書其後。

吳官輦路傷行客。繭冰壓雲凝曉色。門前新掃染家鄰。借人鋪設殘衣帛。官花剪綾連院號。覆取翻看成一道。織紋宛轉敕字新。知是初誰六尺誥。城霞失彩宮薜病。中與海圖上衣領。改顏倖售緣所遭。褪藥元香洗藍影。青綢易得淚承睫。擊筑楚歌無故業。歌殘求書好事人。異代儻傳誥綾帖。

雪中方四隱君訪宿。有詩憶鹿田風雨舊遊。奉和併呈吳六贊府。

金華入北山。空響出靜竈。鹿田在其顛。肺石鳴風雨。有客六七人。昔遊至其處。唯我愁不眠。起坐蹴君語。謂此定何聲。百感生離緒。玩非琴與瑟。復異砧將杵。醉者呼不應。愁者自爲苦。空櫺冷孤衾。展轉如巢樹。溼歌散餘悲。以足拊柱礎。爾來又七年。欲至困羈旅。傳聞老桑門。已復蟬蛻去。入山惡少年。巾鉢空其聚。乃知人世閒。何者爲客主。而我同懷人。忽復異處所。夢中遙相望。各抱不售賈。有客不同遊。亦是同懷者。地主況有期。輿馬不待假。儻規宿山中。畸人不應舍。

效孟郊體

閑庭生柏影。苕藻交行路。忽忽如有人。起視不見處。牽牛秋正中。海白夜疑曙。野風吹空巢。波濤在孤樹。閨中玻璃盆。貯水看落月。看月復看日。日月從此出。愛此日與月。傾瀉入妾懷。疑此一掬水。中涵濟與淮。淚落水中影。見妾頭上釵。

哭正節徐先生

淒涼攜子女。冠佩赴重陰。塲井千年事。青年此夜深。哀辭山石刻。卹典海舟沈。里族南薰夢。東都直至今。

送汪十

多年隱賣漿。此去結山房。埽菌侵花落。種松如草長。老期秋欲至。貧味水初嘗。歲晚逢樵獵。音書定不忘。

哭所知

總戎臨百粵。花鳥瘴江村。落日失滄海。寒風上薊門。雨青餘化血。林黑見歸魂。欲哭山陽笛。鄰人亦不存。

山陰道中呈鄭正樸翁

楊柳遠天色，野風來水涯。異鄉同夢客，今雨故人家。越樹夜啼鳥，禹陵冬落花。悠悠江海意，爲爾鬢先華。

寒食姑蘇道中

頻年感烟草，荒冢幾人耕。吳楚逢寒食，山村見獨行。天陰月不死，江晚汐徐生。到海征帆影，悠悠識此情。

秋日憶過秦國公主園

野影林檎盡，山昏瓦塔齊。涼宵風雨過，一雁西南啼。嵐霧洗巾幌，井泉生蒺藜。傷心拂塵塵，衣淚溼空綈。

西臺哭所思

殘年哭知己，白日下荒臺。淚落吳江水，隨潮到海迴。故衣猶染碧，后土不憐才。未老山中客，唯應賦八哀。

萬松道中望南太白

筍輿行萬山中，有十里亭。老樹祇一色，野公逾百齡。柴關當太白，藥氣近樵青。岡草黏枯翼，巢枝落退翎。期探幽谷水，共斲松根苓。艾納下天雨，塵風吹冥冥。

採藥候潮山宿山頂精藍夜中望海

蛟門南去鳥，此地望迢迢。積溼侵幡黑，生寒入夢飄。見燈歸舶夜，聞偈解衣朝。土植皆爲藥，山枝不滿樵。暗光珠母徙，秋影石花消。擬候槎回漢，寧甘客老遼。卻尋徐福島，因問秦皇橋。于彼看日出，羽旌焉可招。

以上晞髮集

過杭州故宮

禾黍何人爲守關。落花臺殿暗銷魂。朝元閣下歸來燕。不見前頭鸚鵡言。
紫雲樓閣讌流霞。今日淒涼佛子家。殘照下山花霧散。萬年枝上挂袈裟。
重過

隔江風雨動諸陵。無主園池草自春。聞說就中誰最泣。女冠猶有舊宮人。

春閨詞

手觸殘紅頭懶梳。香隨蝴蝶上衣裾。暖風吹睡無言語。又向牀頭看夢書。

山中道士

山中道士服朝霞。二十修行別故家。留客一杯清苦蜜。蜂房知是近梅花。

秋夜詞

愁生山外山。恨殺樹邊樹。隔斷秋月明。不使共一處。

秋社寄山中故人

燕子來時人送客。不堪離別淚霑衣。如今爲客秋風裏。更向人家送燕歸。
以上啼髮道人近藁。

方鳳

鳳字韶卿。一字景山。婺州浦江人。試太學。舉禮部不第。特恩授容州文學。歸隱仙華山。同里義烏。令吳渭闢家塾。敬事之。疾革。命子樗題其旌曰容州。示不忘也。時稱爲巖南先生。有存雅堂彙。

契聖子評前南詩云。由本論之。在人倫。不在人事。等而上之。在天地。不在古今。

北山道中

起犯春霜一徑寒。清遊乘興約吟鞍。眼中最恨友朋少。塵外頻聞山水寬。溪落舊痕枯野埠。樹浮空翠溼危欄。巖頭幾處懸冰白。已作羣羊化石看。

西鹿田寺聽雨

禪棲投倦客。山雨起更闌。窗葉散幽響。石林生峭寒。洞深猶暗瀑。江遠忽風湍。想像雲蘿外。應宜晚色看。

賦三洞

金華北山三洞天。垂髻欲往金華顛。春風吹衣雨洗履。瘦筇忽拄蒼山烟。山高地平走幽澗。根絡石上森榷楠。步從飛橋瞰石洞。厓色製世知幾年。風痕霧迹化異物。龍首昂左尾右旋。就中暗穴如墓頤。急水瀉碧鳴渦弦。迥流束炬照徒涉。肩背擦石行拳攀。水窮路夷內景得。以炬交燭窮幽元。細紋蹇波湧浪接。皓彩凝雪飛霜鮮。大爲獅子虎犀象。瑣碎亦復蜂屯然。蜿蜒雙蟠角尾具。一一玉爪拏蒼堅。穹龜負甲色深墨。長蛇白質相縈纏。鐘能鐘聲鼓能鼓。不假權虞知誰懸。直樞斜檻藏福室。短畦長町移原田。青雲白霓五色霞。笑畫敗絮留丹鉛。中途經過最深窅。伏身低眺洞口泉。空明一隙隔遠見。秋蟾浴海光嬋娟。左巖架衣頗橫亘。疊摺衆皺垂蹁躑。自餘神怪不可極。似鑿非鑿鑿非鑿。出登山腰叩中洞。外視石井聞潺潺。入深蹈險思絕綆。長竿揭炬後且先。水簾可俯心爲掉。到此十九歸言遄。嗜奇不憚歷磊砢。足以目故差。

輕便翻身卻望水簾處。銀河天落懸吾前。常情疑復下百尺。積水定作神龍淵。石乾徑闢卻易進。玉筍拔地修而圓。宜爲淵處乃爲室。亦或摩藓題新篇。同遊疑我久未出。笑謂豈欲井底眠。林幽風起日已晚。猶睨高洞山之巔。薪蒸可買樵我導。不遠數里仍攀緣。傍從右壁入深壑。如鐵戶限瓊爲櫺。儼然海相挂珠絡。熟視豈信非夸傳。左爲朝真正面入。便想笙鶴邀羣仙。雲霞波濤仙衣裳。奇詭豈必下洞專。欵然修梁架巖起。左右蒼白龍形全。望中極底勝漆黑。雙扉隱隱起半邊。天光一道燭扉內。知此明罅從何穿。霽深壁峭不可往。安得插羽如飛鳶。嗟余茲遊尙牽俗。身所驟歷辭難宣。但思乞水學坡老。洗眼看字消餘年。

金華紀遊詩

赤松上下雨霏微。八詠樓頭重拂衣。西港晴來汀草長。北巖幽處洞泉飛。風敲定磬鹿春過。月滿丹臺鶴夜歸。歷覽因知古詞客。盛誇雲夢未全非。以上存雅堂遺藁。

哭陸秀夫

祚微方擁幼。勢極尙扶巔。鼇背舟中國。龍胡水底天。鞏存周已晚。蜀盡漢無年。獨有丹心皎。長依海日懸。

金華雜識

仙華山

仙華蠡萬仞。我乃廬其東。日夕與山對。今茲踏岑巒。起左信奔鹿。當前任啼猿。大嘯崖石裂。一覽天宇空。蒼松飽風雨。絕壑挂老龍。樵斧不得睨。撫根憇吾躬。邈哉軒轅氏。問知由崆峒。龍髯一以遠。千載悲遺弓。猶傳少女靈。鍊玉于焉宮。山林重帝冑。香火明民衷。我來重懷古。攬涕臨西風。何當速刺飛。一洗磊落胸。

吳思齊

思齊字子善括蒼人家永康由任子入官監新城稅調嘉興承宋亡後主浦陽吳渭清翁家與謝
臯羽方韶卿交好同臯羽登嚴陵西釣臺哭文丞相臯羽卒又與同人會哭于小爐峯嘗與韶卿
倡和臯羽序而題其編曰風雨集曰瑄按臯羽西臺慟哭記語多度詞稱文山為唐宰相魯公三友人為甲乙丙明

初張孟兼丁注以甲為吳思齊乙為馮桂芳丙為翁衡程敏政宋遺民錄思齊由任子入官為嘉興縣丞洪提刑起畏辟置類
田吏用事者言辦此可通籍思齊曰以民怨祿非得也賈氏柄國上將以兩簿臨其母喪文侍郎及翁將上疏論之懼禍中止
思齊以書勗之曰叱嗟而母婢也公不可默俄不願仕請監南嶽廟流寓桐廬值宋亡不出獨與方鳳謝翱方養友善自號全
歸子大德辛丑卒

宋濂吳思齊傳思齊所著書有左氏傳闕疑
擬周文瑾平荆州碑司馬孚贊汝社詩集

題鹿苑寺壁閒記魯簡肅公羅漢見夢事

是法本平等無怠亦無敬如何證無生卻來見參政姚桐壽樂郊私語

詹本

本字道生建安人温言正行丞相江萬里薦為郎先致書本本方坐門前石上釣使者至問本居
本曰前即持竿渡溪去不知所終

春日攜客游武夷

山脚健枝梧。百里插蒼峭。粼粼石可把。曙色坐遠釣。風水眞笙竽。歷落太古調。衣冠帶莽蒼。山鬼驚二妙。雲月正忘年。花鳥更索笑。迴船翠凌亂。吾道付長嘯。

閑中

萬事問不知。山中一樽酒。埽石坐松風。綠陰滿巾袖。

宿天台

風泉隔西屋。獨夜寒自生。開窗失山色。白雲壓前楹。累盡得瀟灑。去住俱不驚。鬢息答僧鐘。霜露入殘更。
以上谷音。

皇甫明子

明子字東生。四明人。性豪宕。乘小舟。挂布帆。載琴尊書籍釣具。往來江湖。至元丙子。發狂。痛哭蹈海。

水國

水國淒涼往。秋宵爛漫眠。歸雲猶帶雨。墮月忽明船。社稷資長算。髭鬚近暮年。亂離棲不定。百口託浮田。

海口

窮島迷孤青。颶風盪頑寒。不知是海口。萬里空波瀾。蛟龍恃幽沈。怒氣雄屈蟠。崢嶸挾秋陰。挂席潮如山。熒惑表南紀。天去何時還。雲旗光慘澹。腰下青琅玕。誰能居甬東。一死諒非難。嗚呼朝宗意。會見桑土乾。

京口行

京口兵可用，酒可飲。一語參差，族成血。忠賊相持，各凜凜。豈知好醜，隔形骸。父爲孔鸞子爲鳩，人衆天定理則那。遺臭流芳，且高枕。以上谷音。

鮑 輓

輓字以行，括蒼人。性嗜酒，授簡萬言教授，得錢悉送酒家。遇客盡飲乃去，晚益傲誕，衲衣髻結，游青城不返。

襄陽行

今日何來春氣柔，東城騎馬花綢繆。爲君停馬一呼酒，花前倒披紫綺裘。玉脂汎濫魚鳥飮，歌舞倦矣蛾眉愁。千金萬壽好賓主，今我不樂歲如流。豈比世上狂馳子，一語不合行掉頭。嗚呼天倫古所定，非有大故寧相尤。

天馬

天馬抱奇相，緊骨瞳方明。出入百萬中，有如一鳥輕。宇宙莽超踏，風雲慘經營。獨倚雄傑態，蕭蕭隨北征。朝飲南海頭，夕秣乃幽并。失主坐黯淡，別羣奮長鳴。豈無輕俠兒，金羈懸朱纓。但感束帛義，不忍負死生。低頭爲君老，喑喑萬里情。

重到錢唐

生死雙飛正可憐，若爲白髮上征船。未應分手江南去，更有春光七十年。

無賴山光疊疊青。玉魚金盃早飄零。冷思禹穴真奇事。千古衣冠託杳冥。
萬家歌舞送浮生。曾有涓埃答太平。猿鶴沙蟲天始定。不須辛苦怨南征。
聞道深春雪打圍。誰憐身上藕絲衣。莫憂白壁成塵土。解逐南風萬里歸。
唯有寒潮不世情。朝朝暮暮過空城。百年車馬閭門外。獨獨春風草又生。
以上谷音。

崔 璆

璆字子玉。京口人。美風儀。善談論。晚病狂。攜大瓢貯酒行市。拍掌歌笑。未死十日。自表石。題曰醉鄉伯崔璆之墓。

攜戮鉞汎江

酒星落京口。化爲崔子玉。孤舟載壺觴。水花紅映肉。小兒唱銅斗。大兒倒醺醪。一笑不知年。浩蕩天地屋。慎勿臨寶呼。人生隨轉燭。嗣宗禮法仇。鍾會被殺戮。

咄咄

咄咄復咄咄。小兒成老翁。么微各形色。追琢元化工。不知春風去。又見千綠叢。主人美客懷。載酒行溪東。一步一回首。十步尊已空。靈均與太白。醒醉同所終。願見化蟻蠓。生死託壺中。

今日一何好

今日一何好。花下醉狼藉。醉中有奇事。夢見生羽翼。浩蕩排虛空。靈君好顏色。朱衣持大篆。授我醉鄉伯。頓首玉墀下。臣璆才蟻蝨。封此抑何功。請陳愚頑臆。臣家京口東。門前大江碧。臣願駕長風。吹作酒萬石。

萬象各千鍾。拍拍大庭國。推枕在山中。紙衾霜曉月。以上谷音。

魚潛

潛字德昭。姑孰人。孰重和易。推分澹泊。不忤于物。所居環堵。埽地焚香。彈琴讀書。養鵝鴨百頭。以給食。終八十餘。

楊白花

楊白花。誰教度簾幙。搖蕩春風能幾何。不比無情自漂泊。人生祇合作支離。長秋鷓啼江水落。

古意二首

青青陵上柏。落落勁不摧。人生百年內。朝夕變所懷。斗酒命同好。萬里不顧回。聞有昌國君。談笑黃金臺。柔言更長跪。信是富貴媒。但恐氣習移。古今不同才。寄言去國者。歲晚有餘哀。

權衡豈公平。天駟但伏櫪。東井不救渴。倉庫何時實。元工寫假借。名器甚可惜。如何萬萬古。不行督責術。

送鄭祕書南歸

垂老乃如此。憑高俱惘然。空能正幾字。好去作千年。童子歌鷓鴣。幽人拜杜鵑。江花獨爛漫。春去得誰憐。

聞歌

流雲行水出名姝。酒盡花前雙玉壺。此曲江南都忘卻。春風轉調小單于。以上谷音。

柯芝

芝字士先。瑞陽人。早通五經。善詞賦。又詣行在所見章祕書。求讀書省中。益通諸家。教授生徒。著

書百餘卷

餘髮

餘髮蕭蕭白垂頰。十年一拙門庭冷。來頻沙鳥頗相識。起晚鄰雞已三請。形骸挂樹豈復好。心緒如蓬不能整。平生幾緗空馭駮。老去一杯先酩酊。俗言祇虞方鑿迂。人事但慙幽居屏。聖賢未必盡芻狗。天地何堪共鼃黽。若爲苴履曾足芥。幸不柳衫真欲瘦。一聲樵響何處來。獨立看雲發深省。

耳耳

耳耳非佳語。陸陸難爲顏。我生胡不淑。多戚長鮮歡。搖落復已綠。春風滿江干。最靈起予興。欲言骨肉酸。園桑摧爲薪。桃李亦半殘。翹羹企晴燠。九室十更寒。飛錢如美色。乃入貴者闌。正閭有穀賣。窮欄朝無饘。不售信蹙隱。徒手良抱歎。宛轉愒餘息。溝壑分斗閒。吾輩正不免。遑暇卹彼瘝。

橫江

橫江一片碧。攜鶴上漁船。收綸不成下。卻抱釣竿眠。以上谷音。

柯茂謙

茂謙字退之。芝之子。

江行早發

陶鑪煮孤影。寒燈沸青花。冰開數江樹。月落失人家。

魯港賈似道喪師之地。

十年回首付霑襟。斷甲沈沙齒齒深。可惜使船如使馬。不聞聲鼓但聲金。人歌鬼哭都堪淚。木落江空正獨吟。遺老蕭條漸無語。酒旗颯颯出蘆林。以上谷音。

師嚴

嚴字道立。襄陽人。讀書識大義。善槊射。自園中拔身。走行在所。上書論事。不報。拂衣去。客死武陵。

蘭五見訪

漢陰美人青兕裘。獨騎瘦馬尋荒丘。花前下馬迎一笑。珠玉在側形骸羞。酒酣散髮箕踞坐。錦帶爛爛懸吳鉤。剝蛟刺虎好身手。碧瞳如水涵清秋。惜哉科目大脫略。壯士豈爲章句囚。中原格鬪困不已。江波木落寒悠悠。

武陵客居

浩蕩千年調。飢寒八尺身。不愁逢魍魎。可笑繫麒麟。殘雪江村路。空山澗水春。時危終遠去。道在豈全貧。

公安早發

去國秦公子。窮途阮步兵。別離如昨日。豪俠異平生。江月爲誰好。巴船何處行。高秋伴搖落。早發若爲情。以上谷音。

邵定

定字中立。廬陵人。溫粹博雅。通周易春秋。宅邊植梅竹蘭桂蓮菊各十餘本。深衣大帶。婆娑其間。自稱六薊老人。

山中

白日看雲坐，清秋對雨眠。
眉頭無一事，筆下有千年。

漁家

漁家臨水住，春盡無花開。
年年謝流水，流得好花來。
以上谷音。

